

Dill' wen dill' kob daa bzej Lúcaza'

Dga bzej Lúcaza' na' bseleen lao Teófilona'

¹ Ben' zan ba goklall'gake' wzejgake' to to diika' ba gok ladjnto'ni

² kon ka wna ben'ka' bli' bsemi neto', ben'ka' ble'gakile' daa gok dezd nech na' gok lo na'gake' be'gake'n dill'.

³ Na' ka'kz nad', ba wñabyoll' nakyen'an gok dezd nech. Na' chakid' nakan wen wzej' li', Teófilo, kon ka gok to to diiki,

⁴ kwenche inezilo' daa ba bli' bsemi'gakile' li' nakan dowalj dii li.

Wdixjee anjla' galj Juanna'

⁵ Kana' chñabia' rey Heródeza' gana' mbani Judeana' wzoa to ben' wlie' Zacarías, goke' toz bñozka' nonlen dii Abíaza'. Na' xooole', Elizabeta', lekzka' goke' xiin dia che dii bñoz Aarónna'.

⁶ Na' chop xooltie' chongake' wen lao Chioza', na' chongake' yog'lolte daa nllie' bia'.

⁷ Na' aga no xiingake' wzoa daa nak Elizabeta' nool will; na' ba naktegage' ben' gol.

⁸ Na' to shii ka bidol' bñozka' nak Zacaríaza' txen gongake' xshin Chioza' daa nak lo na'gake',

⁹ bengake' to wyitj, ka yoologake' chongake', kwenche got'bia' noe' yidol' lljlo' llen yala' loo lill xlatj Xancho Chioza'. Na' bidol' Zacaríaza' gone'n.

¹⁰ Na' shlak chgwee llen yala' loo yoodo'na', ben' zan bgaan chyoolə choe'lwillgake' Chioza'.

11 Na' bli'lao to anjl che Xancho Chioza' Zacaríaza', na' anjla' zie' shlaa de shlina' gana' chzeygake' yala'. 12 Ka ble'i Zacaríaza' anjla', bikza' bi billet-lallee gone' daa le bleebe'.

13 Na' anjla' chi'ene':

—Bi illebo' Zacarías, la' Chioza' ba bzenague' daa chnabilo'ne', na' xoolo' Elizabeta' sane' to xiino' na' wsi'ob' Juan.

14 Na' yibachgailo' kat' galjb', na' lekzka' ben' zan yibayi,

15 la' xiino'na' gakb' to ben' zakii lao Chioza'. Bi chiyal' wnixb' vino wa bichla' dii gonan ka sollib', na' Espíritu Sántona' soloe' inabi'e yichjlall'do'baa ka zi' galjlab'.

16 Na' yigoob' ben' zan xiin dia che Israela' lo xnez Chioza', beena' nak Xangake'.

17 Na' kwialob' lao Xanchona', na' soalen Espíritu che Chioza' leb' ka wzoalene' Elíaza', na' gapb' yel' wak ka daa wdape'. Na' ye'b' ben'ka' bi zoalen xiine'ka' wen, yizoagake' mbalaz. Na' gom' ka wzenag ben'ka' bi cheeni wzenaggake' dill' sin' che ben'ka' zej shli lao Chioza'. Na' diikin gom' kwenche kat' za' Xanchona' na' gonlilall'gake'ne'.

18 Na'ch che' Zacaríaza' anjla':

—¿Nakra gak inezid' shi lekzilo'n?, la' ba nak' ben' gol na' lekzka' nool cha'na'.

19 Na'ch che' anjla'ne':

—Nadaan anjl Gabriela', na' chon' xshin Chioza', na' kwine' bselee nad' kwenche zaa zidnia' li' dill' wenni.

20 Na' daa bi wyajli'o daa wnia' li', idap shi'ona'. Bich gak inio' axt kat'ch illin lla gak yog' dga ba wnia' li'.

21 Na' ben'ka' lle' chyoolə chbezgake' yichej Zacaríaza', goklejjgakile' daa wllaile' loo yoodo'na'.

22 Na' ka bicheje' bich chak inie', senzə chone', na' gokbe'gakile' nan nochodan' bli'lao le' loo yoodo'na'.

23 Na' ka biyoll ben Zacaríaza' daa lia bia' gone' yoodo'na', na'ch biyaje' lille'na'.

24 Na' ka wde gok diiki, na' bia' xoole', Elizabeta'. Na' lao gay' beo' bichkzə ga bcheje', na' wne':

25 “Xancho Chioza' ba goklene' nad' kwenche bich sia' yel' zto' lao ben'.”

Wdixjee anjla' galj Jesús'

26 Na' ka gok xop beo' noa' Elizabeta', bsel' Chioza' anjla' le Gabriel yella' le Nazaret daa lia gana' mbani Galileana',

27 gana' zoa to nool wew' lie' María. Na' Maríana' ba nakan wshagna'lene' to ben' le José, na' Joséna' nake' xiiñ dia che dii rey Davina'.

28 Na' wyoo anjla' gana' zoa Maríana' na' chi'ene':
—iChwap' li' chiox, nool, ben' ba goklen Chioza' kwenche gak dii wen cho'! Xanchona' zoalene' li', na' ba benleeyche' li' aga ka yog'lojte nool.

29 Na' Maríana' bibanile' daa golle'ne' ka', na' gokile' berache naz beeni nad' ka'.

30 Na' che' anjla' le':

—Bi illebo' María, la' Chioza' ba wleje' li' kwenche gone' to dii wen cho'.

31 Na' ñaa woo to bdo' na' kat' galjb' na' wsi'ob' Jesús.

32 Na' gakb' to ben' zakii na' ye'gake'b' Xiin Chios, beena' nak liizelozi ben' choo ben' xen. Na' Xancho

Chioza' gone'b' to ben' wñabia' ka dii xoxxtob' Davina'

³³ kwenche toshiizi inabia'b' le' ben' Israel, le' nakle xiin dia che dii Jacoba', na' yel' wñabia' che'baa bi yiyoll yidon.

³⁴ Na'ch wñabi Maríana' anjla', chi'ene':

—¿Nakra gakz wa', lla?, la' aga no ben' byo zoalen'.

³⁵ Na'ch che' anjla' le':

—Espíritu Sántona' yidsoalene' li', na' yel' wak che Chioza', beena' nak liizelozi ben' choo ben' xen, soalenan li'. Na' bi'do'na' galj gakb' lall' na' Chioza' na' ye'gake'b' Xiin Chios.

³⁶ Lekzka' dialla cho' Elizabeta' ba no'e, la'kzi ba nake' ben' gol. Na' la'kzi chaki ben' nake' nool will, ba gok xop beo' no'e.

³⁷ Aga bi de dii bi chak gon Chioza'.

³⁸ Na'ch che' Maríana' anjla':

—Xmos Xancho Chiozan' nak', na' wak gone' cha' kon ka ba wno'.

Na' biza' anjla' gana' zoa Maríana'.

Jawia Maríana' Elizabeta'

³⁹ Na' lii wza'te Maríana' wyaje' to yell dii llia yaa yao che Judeana'.

⁴⁰ Na' blline' lill Zacaríaza' na' bwape' Elizabeta' chiox.

⁴¹ Na' ka bwap Maríana' le' chiox, gokbe'i Elizabeta' bxit' bdo'na' loo li'ena'. Na' wzolo wñabia' Espíritu Sántona' loo yichjlall'do'ena',

⁴² na' wñie' zillj, chi'ene':

—Chioza' ba benleeyche' li' ladj yog'lol nool, na' lekzka' bdo' cho'na'.

⁴³ ¿Nora nak' nad' zidwia'zə xña' Xan'na' nad', lla?

44 La' kon ka bwapo' nad' chiox, lii bxit'te bdo' cha'ni loo li'ani daa chibaib'.

45 Chakomba li' wyajli'o ka wna anjla', la' yog' daa wna Xanchona', aga wde bi gakan.

46 Na'ch wna Maríana':
Do yichj do lallaa choe'lawaa Xancho Chioza'.

47 Chibayi yichjlall'dawaani lao Chioza', beena' chisla nad'.

48 Ba biyesh'lallile' nad' nak' xmose',
naa solo yog' beñ' ine' nad': "Chakomba li'."

49 La' Chioza', beena' nap yel' wak choo yel' wak xen, ba bene' dii wen inleeb cha'.

Nake' liizelozi beñ' li beñ' shao',

50 na' chiyesh'lallile' yog'te beñ'ka' chall chleeb-gake'ne'.

51 Dii zakii nleeb ba benlene' yel' wak che'na'.

Ba bchinj bselle' yog'lol daa nan gon beñ'ka' chep cha'lall'.

52 Ba bikwase' yel' wñabia' che beñ' wñabia'ka',
na' beñ'ka' ble'gakile' nakzi, Chioza' ba bene' legake' beñ' zakii.

53 Na' beñ'ka' chbil chdon, ba bzesh bzeljile' legake' kon dii wen dii shao' che'na',
na' bilague' beñ' wni'aka' to ka cha'gake'.

54 Ba goklene' cho' beñ' Israel, cho' nakcho xmose',
na' toshiizi chiyesh'lallile' cho',

55 kon ka bchebe' gone' che dii xoxzto'cho Abrahamama'
na' yog' beñ' zizaak lo dia che'na'.

56 Na' Maríana' bgaane' ka do shon beo' lill Elizabetha', na'ch bizee ziyaje' lille'na'.

Golj Juanna'

57 Na' ka bllin lla wxan Elizabeta', wxane' to bi' byodo'.

58 Na'ch ka wnezi beṅ' wlill che'ka' na' beṅ' di-
alla che'ka', wyajgake' bibalengakile'ne' daa ba
biyeshii Xancho Chioza' le'.

59 Na' ka gokib' to xman, jloogake'b' seṅ daa ne'
circuncisión, na' goklall'gake' wsi'gake'b' Zacarías
ka le xabaa.

60 Na' che' xṅa'baa:

—¡Bi gakan! Juanan chiyaḷ' wsi'nto'b'.

61 Na' gollgake'ne':

—¿Biḷe wsi'zo'b' ka'? La' aga no dialla cho' le
ka'.

62 Na'ch bengake' seṅ kwenche wṅabgakile'
xabaa bi cheenile' wsi'e bdo'na'.

63 Na'ch wṅabe' to yagla'do' kwenche bzeje'n,
na' daa bzeje' nan: “Juanan wsi'nto'b'.” Na' yog'
beṅ'ka' bibani.

64 Na' lii gokte biṅe Zacaríaza', na'ch wzoloe'
choe'lawee Chioza'.

65 Na' beṅ' wlill che'ka' bllebgake' ka nak daa
gok, na' yog' yellka' lle' ladj yaa yao che Judeana'
wze dill' ka gok.

66 Na' yog' beṅ'ka' beni ka gok, gogkakile':

—¿Noran gak bi'do'ni, lla?

Wnagake' ka', la' nakbia' zoalen Xancho Chioza'
leb'.

Daa wna Zacaríaza'

67 Na' Espíritu Sántona' wṅabi'e yichjlall'do' xab'
Zacaríaza' na' bi'e cho'a xtill' Chioza', wne':

68 Choe'lawaa Xanchona', beena' nak Chios
checho, cho' beṅ' Israel,

- la' ba bide' ladjchoni, cho' nakcho ben' yell che',
kwenche yisle' cho' lawi dii mala'.
- 69 Na' ba bselee to ben' nap yel' wak xen yisle' cho',
na' zee lo dia che dii Davina', beena' gok xmose'.
- 70 Ba chak ka bchebe' gone' kani'yi daa golle' dii
ben'ka' wdixjee cho'a xtilleena', ben'ka' gok
lall' nee.
- 71 Bchebe' yisle' cho' lao ben'ka' bi chle'shii cho',
na' lao yog' ben'ka' chakzi' chakzbani cho'.
- 72 Na' golle' dii xoxcto'choka' yiyeshile' legake',
na' bi gal-lallee ka nak diika' bchebe' gone'.
- 73 Ki nak daa bcheb Chioza' gone' che dii
xoxcto'cho Abrahamama':
- 74 Bchebe' yisle' cho' lao ben'ka' bi chle'shii cho'
kwenche we'la'ochone' na' bibi wwall wsheban
cho',
- 75 na' gon kwincho lall' nee na' goncho ka yiy-
oolallile' shlak mbancho.
- 76 Na'ch Zacariaza' chi'e bdo' che'na':
Na' li', xiindawaa, ina ben' li' ben' chyixjee daa na
Chioza', beena' nak liizelozi ben' choo ben'
xen.
- Na' kwialozego' lao Xanchona' kwenche wzenag-
gake' che' kat' zee.
- 77 Wzenilo' ben' wlall chechoka' daa chiyal'
gongake'
kwenche yizi'xen Chioza' saaxya che'ka' na' yisle'
legake' bi tegake' lo yel' zak'zi'na'.
- 78 La' Chios chechona' chakile' cho' na'
chiyesh'lallile' cho',
na' wselee to ben' za' yabana' nsee to beeni' che
yichjlall'do' ben' yell-lioni

79 kwenche sho' beeni'na' loo yichjall'do' ben'ka'
 chda gani nak shgasj shchol ni che dii mala'
 daa nsa' yel' wit,
 na' wliile' cho' nez li che'na' na' soacho mbalaz.

80 Shlak bgol Juanna', ben Chioza'ne' ben' wal.
 Na' wzoe' to latj gana' bibi chashj chleb ax̣t ka
 bllin lla wzoloe' be'lene' ben' Israelka' cho'a xtill'
 Chioza'.

2

Golj Jesúza'

(Mt. 1:18-25)

1 Kana' chnabia' César Augústona', bene' byen
 ibab bal ben' lle' to to yell doxen yell-liona' gana'
 chnabi'e.

2 Na' ka wbabgake' dii nech, beena' le Cirenio
 nake' gobernador che Síriana'.

3 Na' benan byen biyaj yog' ben' yell che
 chegake' kwenche jada' lie'ka'.

4 Na' daa nak Joséna' xiin dia che dii Davina',
 bizee yell Nazareta' daa llia gana' mbani
 Galileana', na' biyaje' yell Belénna' gana' golj
 dii Davina', daa llia gana' mbani Judeana'.

5 Na' kwenche ibabgake' biyaje' yell Belénna' len
 Maríana', beena' ba nakan ikee. Na' Maríana' ba
 no'e.

6 Na' shlak zoagake' Belénna', bllin lla sane'.

7 Na' wxane' to bi' byodo' nakb' bi' nech, na'
 btobe'b' lechaa na' wdixje'b' gana' chao bayix'ka',
 la' bich bi latj bllel gana' chigaan ben'.

Jtixje'i anjla' ben'ka' chap xil'ka' ba golj Jesúza'

8 Na' lle'na' goljb', gaozə yell Belénna' lle' xonj
 ben' chapgake' xil' che'ka'.

9 Na' gokxe to anjl che Xancho Chioza', na' yel' chey cheeni' che Xanchona' bzeeni'n gana' lle'gake', na' le' bllibgake'.

10 Na' che' anjla' legake':

—Bi illeble, la' zidtxje'id' le' dill' wen dill' koba' daa gonan ka yibachgayi yog' ben'.

11 La' naa yell che dii Davina' ba golj beena' yisla le' lao dii mala'. Na' len' Xancho Crístona', beena' chbezle wsel' Chioza'.

12 Na' kwenche yillelileb', ki nak gana' deb': deb' gana' chao bayix'ka' na' ndobb' lech'.

13 Na' ka biyoll goll anjla' ka', lii bllinte anjl zanch kwite'na', na' choe'la'ogake' Chioza', nagake':

14 ¡We'la'ocho Chioza' zoa yabana'!

Mbalaz ben'ka' zoa yell-lioni, ben'ka' ba bli'yi Chioza' yel' goklen che'na'.

15 Na' ka biza' anjlka' ziyajgake' yabana', na'ch che' lijwell ben'ka' chap xil'ka':

—Li yidoshki Belénna', li sho' diwiashki daa ba gok, daa ba wdixje'i anjl che Xanchona' cho'.

16 Na'ch ziyajdogake' Belénna' na' bllingake' gana' zoa Maríana' len' Joséna', na' bdo'na' deb' gana' chao bayix'ka'.

17 Na' ka biyoll ble'gakile'b', na' be'gake' dill' lao ben' wlall che'ka' daa goll anjla' legake' che bdo'na'.

18 Na' yog' ben'ka' beni ka wna wap xil'ka' biban-gakile' ka dillaa be'gake'.

19 Na' Maríana' kon ka biyoll bzenague' dill'ka' na' bgaanān loo yichjlall'do'ena', na' gokile' bera zevin dga.

20 Na'ch ziyaj wap xil'ka' choe'la'ogake' Chioza' daa ba ben ble'gakile' yog' daa goll anjla' legake'.

Jwa'gake' Jesúza' yoodo'na'

21 Na' ka gokib' to xman, wloogake'b' sen daa le circuncisión, na' bsi'gake'b' Jesús kon ka goll anjla' Maríana' kana' zi' weeb'.

22 Na' kon ka na ley che dii Moiséza' gongake', wlezgake' ka bzaa llaka' bixi biyech Maríana' len bdo' che'na', na'ch wyajlengake'b' Jerusalénna' kwenche jengake'b' lo na' Xancho Chioza'.

23 Bengake' ka', la' ley che Xanchona' nan: “Bi' byo nech che yog'lol ben', chiyal' gongake'b' lo na' Chioza'.”

24 Na' jaake' je'la'ogake' Xancho Chioza' jengake' ka na leya' daa nan chiyal' witgake' chop ngolbex wa chop palom.

25 Na' kana' jwa'gake' Jesúza' yoodo'na', zoa to ben' le Simeón Jerusalénna'. Nake' to ben' chon dii wen dii shao' na' choe'lawee Chioza', na' chbeze' batan wsel' Chioza' beena' gaklene' ben' Israelka'. Na' zoalen Espíritu Santo che Chioza' le'.

26 Na' Espíritu Sántona' ba bzenile'ne' nan aga wete' shi bin' ile'ile' Crístona', beena' chbezgake' wsel' Xancho Chioza' kwenche inabi'e.

27 Na' Espíritu Sántona'kz bseleene' yoodo'na', na' na' zie' ka bllinlen xaxna' Jesúza' leb' kwenche gongakile'b' ka na leya'.

28 Na'ch blen Simeónna' leb' na' be'lawee Chioza', chi'e:

29 Chios cha', be' latj guet' mbalaz naa,

la' ba beno' daa bchebo' gono' cha', nad' nak' xmoso'.

30 La' ba ble'id' beena' yisla neto',

31 beena' ba bseloo lao yog'lol ben' yell-lioki.

32 Len' kwee beeni'na' loo yichjlall'do' beñ'ka' bi nakgake' beñ' Israel.

Na' gone' ka neto' beñ' Israel sho'nto' balaan, neto' naknto' yell cho'.

33 Na'ch Joséna' len xña'ba bibangakile' ka nak daa wna Simeónna' cheb'.

34 Na'ch wñabi Simeónna' Chioza' gaklene' legake', na' chi'e Mariana', xña' Jesúsza':

—Ba nchogbi'a Chioza' che bi'do'ni gom' kwenche zan beñ' Israelka' kwiayi'gake' na' lekzka' zane' yila. Na' wliib' beñ' ka nak yel' wak che Chioza', na' beñ' zan inegake' zban cheb' na' bi shajle'gake' cheb',

35 na'ch gakbia' ka chza'lall' beñ' loo yichjlall'do'eka'. Na' ka nako' li', loo yichjlall'do'na' gakan ka'kzə ga chaz to spad ka ile'ilo' daa illaglob'.

36 Na' lekzka' yoodo'na' zoa to nool goldo', beñ' chyixjee daa che' Chioza'ne', na' lie' Ana. Nake' xiin dii Fanuela' na' xiin dia che dii Asera'. Beñ' xkwid'ze' bshagnee, na' gall yizchga wzoalene' beñ' che'na' ka wite'.

37 Nake' noolə wizeb na' ba gokile' taplalj tap yiz. Na' toshiizi zoe' yoodo'na', na' ka wal' ka tella zoe' choe'lawee Chioza', na' tlizi chzoe' wbas' na' choe'lwille'ne'.

38 Na' lekzka' wbiguee kwite'ka' na' bi'e Chioza' yel' choxken daa ba bselee beena' gaklene' beñ' Israelka'. Na' bi'e dill' che Jesúsza' lao beñ' Jerusalénka', beñ'ka' chbez wsel' Chioza' beena' yisla legake' lao dii mala'.

Biyajgake' Nazareta'

39 Na' ka biyoll bengake' yog' daa nllia ley che Xancho Chioza' bia', na'ch biyajgake' lalle'ka' daa le Nazaret daa llia gana' mbani Galileana'.

40 Na' Jesúza' bgolb' na' zejch gokb' bi' wal na' bi' sin', na' le goklen Chioza' leb'.

Jesúza' jashaljlem' ben' sin'ka' yoodo'na'

41 Xaxna' Jesúza' chajgake' Jerusalénna' yog' yiz kat' chal' lni Paskwa'.

42 Na' ka goki Jesúza' shllin yiz, wyajlengake'b' lnina' kon ka yoologake'.

43 Na' ka wde lnina' biza' xaxna'baa, na' bi gokbe'gakile' bigaan Jesúza' Jerusalénna'.

44 Gokgakile' do ladj ben'ka' ziyajlengake' zilem', na' kon bigootezgake' nez do lla. Na' ka biyiljgake'b' ladj ben' dialla che'ka' na' ben'ka' nom-bia'gake'

45 aga billelgakile'b'. Na' bibiigake' jadiljgake'b' Jerusalénna'.

46 Na' ka gok shonə lla billelgakile'b' yoodo'na', chi'b' ladj ben'ka' chli' chsedi leya' chzenagb' xtilleeka' na' chnabib' legake' che daa choe'gake' dill'.

47 Na' yog' ben'ka' chzenag xtill'baa chibangakile' yel' chajni che'baa na' ka chilliib' xtill' ben'ka' chli' chsedi leya'.

48 Na' ka ble'i xaxna'baab' bibangakile'. Na'ch che' xna'baa:

—Xiindawaa, ¿biche benzilo' neto' ka'? Xo'ni na' nad' ba gokshejlall'chgainto' biyiljnto' li'.

49 Na'ch che' Jesúza' legake':

—¿Biche chiyiljzle nad'? ¿Abi nezile chiyal' soa' lill Xa'na'?

50 Na' aga wyajni'gakile' bi zejin daa gollb' legake'.

51 Na'ch Jesúza' biyajlem' legake' Nazareta' na' bzenagb' chegake' toshiizi. Na' xna'baa aga gol-lallee diika' gok.

52 Na' Jesúza' zejch bgolb' na' wdapchb' yel' sin', na' Chioza' bibachile'b', na' lekzka' bibayi ben' leb'.

3

Juanna', beena' bchoa ben' nis

(Mt. 3:1-12; Mr. 1:1-8; Jn. 1:19-28)

1 Na' ka gok shin' yiz chnabia' César Tibériona', na' Poncio Pilátona' chnabi'e gana' mbani Judéana', na' Heródeza' chnabi'e gana' mbani Galileana', na' ben' bishee Felípena' chnabi'e gana' mbani Ituréana' len Traconítena', na' Lisániaza' chnabi'e gana' mbani Abilíniana',

2 na' Anáza' len Caifáza' nakgake' bxoꝝ choo bxoꝝ xen che ben' Israelka'. Na' kana'yen' wne Chioza' Juanna', xiin Zacaría'za', kana' zoe' to latj gana' bibi chashj chleb.

3 Na'ch wyaj Juanna' jte' doxen yell-liona' de cho'a yao Jordánna' na' wdixje'ile' ben' chiyal' yiyaj yilengakile' na' choagake' nis kwenche yizi'xen Chioza' chegake'.

4 Bene' kon ka bzej dii Isaíaza' gana' nan: To ben' gosyee latja' gana' bibi chashj chleb, na' ine':

“Li se kwas wzenagle che Xanchona' na' wsalj yichjlall'do'leka' kat' zee.

5 La' le' gone' ka chon ben' chillée ga nak xitj yao, na' ka ben' chchinj yaa kwenche chileshe'n.

Na' chilie' yog'lol nez dii nyok nlew,

na' chillee xitjka' chi' lo neza'.

⁶ Na' yog'lol ben' ile'gakile' ka gon Chioza' yisle' ben' lawi dii mala'."

⁷ Na' ben' zan chllin lao Juanna' kwenche wchoe' legake' nisa', na'ch kat' chllingake' lawe'na', chi'e legake':

—¡Le' naklikzle ka bel znia! ¿Achakile wak wxonjile' yel' zak'zi' daa wsel' Chioza'?

⁸ Li gon ka gakbe'i ben' nan dii li ba biyaj bile-nile'. Na' bi gakzile bibi yel' zak'zi' ile'ile daa inazle: "Neto' naknto' xiin dia che dii Abrahama'." Ni inia' le' axt yajki wak gon Chioza' xiin dia che dii Abrahama'.

⁹ Yog'lol-le shi bi chonle ka chiyoolallii Chioza' na' gak chele ka chak che to yag dii choe' dii zix dii bi nak wen, na' lii chchogtegake'n na' chzal'gake'n lo yi'na'.

¹⁰ Na' ben'ka' chzenag xtil' Juanna' che'gake'ne':

—¿Beran chiyal' gonnto', shka'?

¹¹ Na'ch che' Juanna' legake':

—Beena' de chop kwe' xe', chiyal' wi'e shkwe' che beena' bi de che'. Na' beena' de dii cheej chawe', chiyal' gaolene'n beena' bi de cheyin.

¹² Na' lekzka' bllin bal ben' wchixjka' kwenche wchoa Juanna' legake' nisa', na' wñabgakile'ne':

—Maestro, ¿beran chiyal' gonnto', shka'?

¹³ Na'ch che' Juanna' legake':

—Bi wchixjle dii xenclə ka to daa chiyal' wchixjle.

¹⁴ Na' lekzka' bal ben'ka' nak soldad wñabgakile'ne':

—¿Shera neto', beran chiyal' gonnto' shka'?

Na'ch che' Juanna' legake':

—Bi wwall wsheble beṅ' kwenche ikaazole bi de che', ni bi wtobilene' dii bi nak ka'. Li gon banez laxjlēna'.

¹⁵ Na' beṅ' zan yoo yichjgake' ila' Crístona', beena' wsel' Chioza' kwenche inabi'e, na' yog'ze' gokgakile' Juanna'ljan Crístona'.

¹⁶ Na' Juanna' golle' legake':

—Zi' za' beena' napch yeḷ' wak xench ka nad'. Na' nad' ni bi zakaa gak' xmose' kwenche wleḗh'j' xeḷe'na'. Nad' chchoa' le' nis daa chiyaj chilēnile, san len' gone' ka yidsoa Espíritu Sántona' loo yichjlall'do'lēna', na' beṅ'ka' bi chiyaj chilēni, wselee legake' lo yi' gabilā'.

¹⁷ Na' daa gon Crístona' che beṅ' chzaklebin ka daa chon beena' nox' yag xoz' daa chpa'ile' trígona', na' yitope' trígona' kooshaween na' wzeye' beb cheyinna' lo yi'na' daa biga yiyolkzə.

¹⁸ Kan' nak diika' bzajni' Juanna' beṅ'ka', na' dii zanch dill' dii be'lēne' legake' kana' bi'e dill' wen dill' kob che Chioza'.

¹⁹ Na' Juanna' lekzka' bsheshlēne' Heródeza', beena' wṅabia' Galileana', daa bikee Herodíaza', xool beṅ' bishee Felípena', na' che bichlə dii malka' ba bene'.

²⁰ Na'ch Heródeza' benche' bish' ljwell dii malka' ba bene' daa wlo'e Juanna' lillyana'.

Wchoa Jesúza' nisa'

(Mt. 3:13-17; Mr. 1:9-11)

²¹ Kana' chchoa Juanna' beṅ' nisa', len Jesúza' bchoe'n. Na' shlak choe'lwill Jesúza' Chioza', byalj yabana'

22 na' betj Espíritu Sántoná' jsoalene'ne', na' ble'gakile' Espírituna' ka to palom. Na' bengakile' shii Chioza' za'n yabana', chí'e:

—Lin' nako' Xiin', chakchgaid' li' na' le chibaid' li'.

Ben'ka' nak dia che Jesucristona'
(Mt. 1:1-17)

23 Na' do shichoa yizi Jesúza' ka wzoloe' bene' yog' daa llia bia' gone'. Na' yog' ben' wngake' xiin Joséna'. Na' Joséna' goke' xiin Elína',

24 Elína' goke' xiin Matata', Matata' goke' xiin Levína', Levína' goke' xiin Mélquina', Mélquina' goke' xiin Jánana', Jánana' goke' xiin Joséna'.

25 Joséna' goke' xiin Matatíaza', Matatíaza' goke' xiin Amóza', Amóza' goke' xiin Nahuma', Nahuma' goke' xiin Éslina', Éslina' goke' xiin Nagaina'.

26 Nagaina' goke' xiin Maata', Maata' goke' xiin Matatíaza', Matatíaza' goke' xiin Semeina', Semeina' goke' xiin Joséna', Joséna' goke' xiin Judána'.

27 Judána' goke' xiin Joánana', Joánana' goke' xiin Résana', Résana' goke' xiin Zorobabela', Zorobabela' goke' xiin Salatiela', Salatiela' goke' xiin Nérina'.

28 Nérina' goke' xiin Mélquina', Mélquina' goke' xiin Ádina', Ádina' goke' xiin Cosama', Cosama' goke' xiin Elmodama', Elmodama' goke' xiin Era'.

29 Era' goke' xiin Josuéna', Josuéna' goke' xiin Eliezera', Eliezera' goke' xiin Jorima', Jorima' goke' xiin Matata'.

30 Matata' goke' xiin Levína', Levína' goke' xiin Simeónna', Simeónna' goke' xiin Judána', Judána'

goke' xiiñ Joséna', Joséna' goke' xiiñ Jonánna',
Jonánna' goke' xiiñ Eliaquima'.

³¹ Eliaquima' goke' xiiñ Meleana', Meleana'
goke' xiiñ Mainána', Mainána' goke' xiiñ Matátana',
na' Matátana' goke' xiiñ Natánna'.

³² Natánna' goke' xiiñ Davina', Davina' goke' xiiñ
Isaína', Isaína' goke' xiiñ Obeda', Obeda' goke' xiiñ
Booza', na' Booza' goke' xiiñ Salmónna', Salmónna'
goke' xiiñ Naasónna'.

³³ Naasónna' goke' xiiñ Aminadaba',
Aminadaba' goke' xiiñ Arama', Arama' goke' xiiñ
Ezroma', Ezroma' goke' xiiñ Fáreza', Fáreza' goke'
xiiñ Judána'.

³⁴ Judána' goke' xiiñ Jacoba', Jacoba' goke' xiiñ
Isaaca', Isaaca' goke' xiiñ Abrahama', Abrahama'
goke' xiiñ Taréna', Taréna' goke' xiiñ Nacora'.

³⁵ Nacora' goke' xiiñ Seruga', Seruga' goke' xiiñ
Ragauna', Ragauna' goke' xiiñ Pelega', Pelega'
goke' xiiñ Hebera', Hebera' goke' xiiñ Sálana'.

³⁶ Sálana' goke' xiiñ Cainánna', Cainánna' goke'
xiiñ Arfaxada', Arfaxada' goke' xiiñ Sema', Sema'
goke' xiiñ Noéna', Noéna' goke' xiiñ Lameca'.

³⁷ Lameca' goke' xiiñ Matusalénna',
Matusalénna' goke' xiiñ Enoca', Enoca' goke'
xiiñ Jareda', Jareda' goke' xiiñ Mahalaleela',
Mahalaleela' goke' xiiñ Cainánna'.

³⁸ Cainánna' goke' xiiñ Enóza', Enóza' goke' xiiñ
Seta', Seta' goke' xiiñ Adánna', na' Adánna' goke'
xiiñ Chioza'.

4

Dii xiwaa goklalliin kooyela'n Jesúza' gone' ka

*cheenin**(Mt. 4:1-11; Mr. 1:12-13)*

¹ Ka biza' Jesúza' cho'a yao Jordanna', Espíritu Sántona', beena' chñabia' loo yichjlall'do'ena', bchi'ene' latja' gana' bibi chashj chleb.

² Na' na' wzoe' choa lla, na' dii xiwaa goklalliin kooyela'n le' gone' ka cheenin. Na' shlak wzoe' na' ni lat' bibi wdawe', na' ka gok choa lla, wdone'.

³ Na'ch che' dii xiwaane':

—Shi leilo' nako' Xiin Chios, goll yaji yiyakan yetxtil.

⁴ Na'ch che' Jesúza':

—Cho'a Xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban chegake'.”

⁵ Na'ch ka wde, bche' dii xiwaa Jesúza' to lo yaa sib wal, na' tolbe'do' bliin le' yog' yellka' llia yellioni.

⁶ Na'ch che'n le':

—Gon' li' doxen yel' wñabia'na' na' yel' zakiina' daa de che yog' yellki, la' ba nakin cha' na' wak wi'an kon no cheenid'.

⁷ Na' gona'n li' shi wchek' xibo'na' we'lawoo nad'.

⁸ Na' che' Jesúza':

—Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

⁹ Na'ch ka wde, bizche' dii xiwaa Jesúza' Jerusalénna' na' blepan le' yichj yoodo'na' gana' nakch sib wal, na' gollan le':

—Shi leilo' nako' Xiin Chios, lla bxit'shki ni.

¹⁰ La' Cho'a Xtill' Chioza' nan:

Chioza' wselee anjl che'ka' gap wwiagake' li',

¹¹ na' gox'gake' li'

kwenche ki koo wchewo' yajka'.

12 Na'ch che' Jesúza':

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenche xenlalloo shi gone' ka ba wne'.”

13 Na' ka bi gok kooyel' dii xiwaa Jesúza' gone' ka cheenin, na'ch bkwasan kwite'na' shloll.

*Wzolo Jesúza' bi'e Cho'a Xtill' Chioza' Galileana'
(Mt. 4:12-17; Mr. 1:14-15)*

14 Jesúza' billine' gana' mbani Galileana' ziyoochgue' yel' wak che Espíritu Sántona', na' doxenzə na' wze dill' daa chone'.

15 Na' chjali' chjasedile' ben' Israelka' gana' chdop chllaggake' choe'lwillgake' Chioza', na' yog' ben' nagake' le xochi cho'e dill'.

*Billin Jesúza' yell Nazareta'
(Mt. 13:53-58; Mr. 6:1-6)*

16 Na'ch biyaje' Nazareta', yella' gana' bgole'. Na' ka bllin lla sabda', llana' chombaən ben' Israelka', wyaje' gana' chdop chllaggake' choe'lwillgake' Chioza' kon ka yooloe' chone'. Na'ch wzollee lawe'ka' kwenche blabe' Cho'a Xtill' Chioza'.

17 Na' be'gake'ne' yisha' daa bzej dii Isaíaza', beena' wdixjee daa goll Chioza'ne', na' ka bzeshe'n blabe' gana' na:

18 Espíritu che Xancho Chioza' zoalene' nad', na' Chioza' ba bzoe' nad' zidyelen' ben' yesh'ka' dill' wen dill' kob che'na'.

Ba bselee nad' kwenche zidtip' lall' ben'ka' chakyeshii yichjlall'do'eka',

na' zidtxje'id' ben' wak yisell yilaagake',

na' gon' ka ile'i ben' lcholka',

na' gaklen' ben'ka' chchi' chsak' ben' legake',

19 na' wi'a dill' ba bllin lla gaklen Xanchona' ben' yell-lioki.

20 Ka biyoll blabe' yisha' na'ch bitobe'n na' biyo'en beena' ngoo lall' neen, na' bibi'e. Na' yog' ben'ka' lle' na' shin chizozgakile' chwiagake'ne'.

21 Na' wzoloe' cho'e dill', chi'e:

—Naa billinin ka na Cho'a Xtill' Chioza' dga ba benile.

22 Na' yog' ben'ka' lle' na' che' ljwellgake' le chon beeni, na' chibangakile' ka xochi cho'e dill'. Na' che' ljwellgake':

—¿Aaga beenin xiin Joséna'?

23 Na'ch che' Jesúsza' legake':

—Wnaljale cha' ka dillaa de: “Wen rmech, biyon kwino'.” Na' lezkza' wnaljale nad': “Daa beninto' beno' Capernaúma' lezkza' benschkin lallchoni.”

24 Na' be'che' dill' chi'e legake':

—Dii li nia' le', to ben' chyixjee daa che' Chioza'ne' aga no shajle' che' yell che'na'.

25 Na' nia' le', zan nool wizeb wlle' gani mbani Israeli kana' wzoa Elíaza', beena' wdixjee daa goll Chioza'ne', kana' aga bi yej gok shon yiz yoo gashjə na' wche'chga wbinna' doxen gani mbani Israeli.

26 Na' bi bsel' Chioza' Elíaza' kwenche' gaklene' nool wizebka' lle' ni, san bseleene' to yell zit' daa le Sarepta, daa llii gaozə yell Sidónna', gana' goklene' to nool wizeb zoa na'.

27 Na' lezkza' gok kana' wzoa dii Elisewa', beena' wdixjee daa goll Chioza'ne'. Ben' zan ben' Israelka' che'gakile' yillwe' daa le lepra, per ni toe' bi biyone'. Toz ben' Síriana' biyone', beena' le Naamán.

28 Na' yog' beṅ'ka' lle' gana' chdop chllaggake' le bllaagake' daa wna Jesúza' ka'.

29 Na' lii wzolla'tegake' bibejgake' Jesúza' yella', na' bche'gake'ne' to ga ze bdiṅj xen wal, gok-lall'gake' lljachixgake'ne'.

30 Per Jesúza' bicheje' ladje'ka' na' ziyaje'.

Bibej Jesúza' dii xiwaa yoo to beṅ'

(Mr. 1:21-28)

31 Jesúza' wyaje' Capernaúma', sto yell daa lia gana' mbani Galileana', na' bli' bsdile' beṅ'ka' lla sabda', llana' chombaṅ beṅ' Israelka'.

32 Na' bibangakile' ka chli' chsedi Jesúza', la' bli' bsdile' legake' lega beṅ' nap yel' wṅabía'.

33 Na' gana' chdop chllaggake', len to beṅ' yoo dii xiwaa na' bgosyaan le' zillj wal, chi'e:

34 —jJwayi neto', Jesús, beṅ' Nazaret! ¿Abido' kwenc̄he wlliyoo neton'? Nad' nombi'a li', na' neṅid' nako' liizelozi beṅ' li beṅ' shao' che Chios.

35 Na'ch bsheshlen Jesúza' dii xiwaa, golle'n:

—jLlizə wzoa! jBichej!

Na' chwiate beṅ'ka' bchix btoḷ dii xiwaa beena', na' bichejan na' bikzə gayile' bi goki.

36 Na' yog' beṅ'ka' lle' na' bibangakile', na' che' ljwellgake':

—¿Naktekan nak cho'a xtill' beeni, lla? Ka chṅeze' chillesh dii xiw'ka' yoo beṅ' daa napchgue' yel' wṅabía' na' yel' wak.

37 Na' doxen na' wze dill' ka nak daa chon Jesúza'.

Biyon Jesúza' tobiṅ che Simón Pédróna'

(Mt. 8:14-15; Mr. 1:29-31)

38 Na' biza' Jesúza' gana' chdop chllaggake' na' biyaje' lill Simónna'. Na' tobiṅ che Simónna' bi

shawee, yoochgue' dii lana', na' wñabgakile' Jesúza' gaklene'ne'.

³⁹ Na'ch wbig' Jesúza' kwite'na' gana' die' na' bsheshlene' dii lana' na' bichejan. Na' lii biyaste noola' wzoloe' bene' dii weej wdaogake'.

Jesúza' biyone' ben' zan

(Mt. 8:16-17; Mr. 1:32-34)

⁴⁰ Na' ka ba chxoa wbillá', ben'ka' lle' na' jwa'gake' lao Jesúza' ben'ka' chak wde wdeli yillwe'. Na' bñxoa neena' to togake' na' biyakgakile'.

⁴¹ Na' bibeje' dii xiwaa yoo ben' zan, na' ka bichejgakan chosyaagakan zillj inleeb, che'gakan:

—Lin' nako' Xiin Chioza'.

Na'ch bsheshlen Jesúza' legakan. Bi bi'e latj inegakan la' nezgakin len' nake' Crístona', beena' chbez ben' Israelka' wsel' Chioza' inabi'e.

Wda Jesúza' bi'e Cho'a Xtill' Chioza' Galileana'

(Mr. 1:35-39)

⁴² Ka wyeeni', bchej Jesúza' yella' na' wyaje' ga kono lle'. Per ben' yellka' biyiljgake'ne', na' ka bllingake' kwite'na', goklall'gake' wzag'gake'ne' kwenche yigaañlene' legake'.

⁴³ Na'ch goll Jesúza' legake':

—Lekzka' chiyal' chixje'id' ben'ka' lle' yell yoblá ka nak yel' wñabia' che Chioza', la' daan bselee nad'.

⁴⁴ Na' wda Jesúza' wdixji'e cho'a xtill' Chioza' to to gana' chdop chllag ben' Israelka' choe'lwillgake' Chioza'.

5

Wxengake' bel' zan

(Mt. 4:18-22; Mr. 1:16-20)

1 To shii bllin Jesúza' cho'a nido' che Gene-sareta' na' bllin beṅ' zan wal axt bdakwyill-gake'ne', daa cheengakile' wzenaggake' cho'a xtill' Chioza'.

2 Na' ble'i Jesúza' chop barkw chi'gakan cho'a nido'na'. Ba bichej beṅ' wxen belka' na' ba chiy-ibgake' yixj che'ka'.

3 Na'ch wyoo Jesúza' loo barkw che Simónna', na' wṅabile'ne' wllig' zilateen loo nido'na'. Na' wche' Jesúza' loo barkwa' na' wzoloe' bli' bsedile' beṅ'ka'.

4 Na' ka biyoll bli' bsedile' legake', na'ch chi'e Simónna':

—Wyajlen barkwi gana' zitj na' wzal'le yixj chelena' kwenche senle belka'.

5 Na'ch che' Simónna':

—Maestro, do yel ba bennto' llinna' na' ni tlish'b bi bdolinto', per shi kan' no', wzal'chnto' yixjki.

6 Na' ka bzal'gake' yixj che'ka', wxenan bel zan inleeb. Na' ka nan yibejgake' yixja' wzolo chcheza'n.

7 Na' blaa neeka' beṅ'ka' lle' loo barkwa' sto kwenche jaklengake' legake'. Na' ka bllin beṅ'ka', na'ch bissha'chagake' chopte barkwka' axt ba chakgakan ka dii kwe' yel.

8 Ka ble'i Simón Pédróna' ka gok, bchek' xibe'na' lao Jesúza' na' chi'ene':

—Bikwasgach kwitii Xan', la' beṅ' saaxyaz nad'.

9 Golle'ne' ka' daa bibanile', na' ka'kzə beṅ'ka' lene' bibangakile' daa bdol' bel zan inleeb.

10 Na' lekzka' bibani Jacóbona' len Juanna' xiin Zebedewa', la' lengaken' nakgake' txen Simónna'. Na' che' Jesúza' Simónna':

—Bi illebo'. Kon ka chono' naa chbejo' belki loo nisi, ka'kzan gono' yibejo' ben' lao dii mala'.

¹¹ Na' ka billinlengake' barkwka' cho'a nisdo'na', na'zə bkwaangake'n len xshinlaze'ka' na'ch janogake' Jesúza'.

Biyon Jesúza' to ben' chake' yillwe' daa le lepra
(Mt. 8:1-4; Mr. 1:40-45)

¹² Na' shlak zoa Jesúza' to yell, bllin to ben' lawe'na' chak doxen kwerp che'na' yillwe' daa le lepra. Na' ka ble'ile' Jesúza', bchek' xibe'na' lawe'na' na' bchek' yichje'na' axt lo yona' na' got'yoile'ne', chi'ene':

—Xan', nezid' wak yikwaso' yillwe'ni chak' shi cheenilo'.

¹³ Na'ch Jesúza' bxoa neena' yichj beena', na' chi'ene':

—Cheenid'x. Na' naate yikwasa'n.

Na' kon ka golle' ka' lii biyakteyi beena'.

¹⁴ Na'ch che' Jesúza'ne':

—Kono yoo ka ba ben' cho'. Lete wyaj lao bxoza' kwenche ile'ile' ba biyakilo', na' jwa' daa chiyal' lljoo che Chioza' daa nllia dii Moiséza' bia' kwenche inezi ben' ba biyakilo'.

¹⁵ Na' la'kzi golle'ne' ka', zizikchli wzeyi che', na' ben' zan bdop bllaggake' kwenche bzenaggake' cho'a xtilleena' na' kwenche biyone' bittezə yillwe' dii chakgake'.

¹⁶ Per Jesúza' yooloe' chaje' ga kono ben' chak kwenche chjelwille' Chioza'.

Biyon Jesúza' to ben' net ni'a neena'
(Mt. 9:1-8; Mr. 2:1-12)

17 To lla ka chli' chsedi Jesúza', xonj fariseoka' na' ben'ka' chli' chsedi leya', na' ben'ka' za' yog' yellka' daa mbani Galileana' na'ch daa mbani Judeana' na' lekzka' ben' za' yell Jerusalénna', chi'gake' chzenaggake' dill' daa cho'e. Na' yel' wak che Chioza' wzoalenan Jesúza' kwenche gok biyone' ben'ka' bi shao'.

18 Na'ch bllin to chop ben' n'engake' to ben' net ni'a neena' n'xoagake'ne' to lo daa. Goklall'gake' sho'lengake'ne' loo yooná' kwenche lljwa'gake'ne' lao Jesúza',

19 per bi gok sho'lengake'ne' daa nyichachga ben'ka' loo yooná'. Na'ch wyepgake' koll' yooná'lə na' bkwasgake' dexka' kwenche gok b'letjgake'ne' do daa che'na' ladj ben'ka' lle' na' kwenche blline' lao Jesúza'.

20 Na' ble'i Jesúza' le n'xenilall'gake'ne', na'ch chi'e ben' we'na':

—Bish'dawaa, ba biyakxen saaxya cho'ka'.

21 Na'ch ben'ka' chli' chsedi leya' na' fariseoka' wza'lall'gake', chakgakile': “¿Nora beeni chonz kwine' ka Chioza? ¿La' toz Chiozan' chak chizi'xene' saaxya che ben'!”

22 Na' gokbe'i Jesúza' daa wza'lall'gake', na'ch golle' legake':

—¿Berache chza'lall'zle ka'?

23 ¿Achakile chyalljchid' yel' wak xench yep' beeni: “Ba bizi'xen' saaxya cho'na”, ka daa yepee: “Biyas na' bigoo nez”?

24 Na' wliid' le', nad', Ben' Bsel' Chioza', nap' yel' w'nb'abia' yell-lioni kwenche yizi'xen' saaxya che ben'.

Na'ch golle' beena' net ni'a neena':

—Naa nia' li', biyas, bitob daa cho'na' na' biyaj lillo'na'.

²⁵ Na' lii biyaste beena' chwiate ben'ka' lle' na', bitobe' daa che'na' bizee ziyaje' lill-le' choe'lawee Chioza'.

²⁶ Na' yog'lol ben'ka' bibangakile' na' be'la'ogake' Chioza', na' do chllebzgake' che'gake':

—Naanlla ba ble'icho dga chonan ka chibanicho.

Gox Jesúza' Levína'

(Mt. 9:9-13; Mr. 2:13-17)

²⁷ Ka biza' Jesúza', na' ble'ile' to ben' wíchixj lie' Leví, chí'e gana' chchixjgake'. Na' chí'ene':

—Da, dino nad'.

²⁸ Na'ch lii wzolla'te Levína', wlej yichje' xshine'na' na' janoe' Jesúza'.

²⁹ Na' Levína' bene' to lñi xen che' Jesúza' lille'na'. Na' wyaj ben' zan ben' wíchixjka' na' zi bal ben' yoblə wdaogake' txen.

³⁰ Na' fariseoka' na' ben'ka' chli' chsedi leya' wzologake' chakdil-lengake' ben'ka' nak Jesúza' txen, che'gake':

—¿Berache cheej chaolenle ben' wíchixjka' na' ben' malka'?

³¹ Na'ch che' Jesúza' legake':

—Beena' zoa shi'a shao' aga no wen rmech chyalljile', san beena' bi shawaan chyalljile'ne'.

³² Aga bid' ni che' ben'ka' nak ben' li ben' shao', san bid' kwenche' yep' ben' saaxyaka' chiyal' yiyaj yilengakile'.

Wnabgakile' Jesúza' che' wbasaa

(Mt. 9:14-17; Mr. 2:18-22)

³³ Na' wnabgakile' Jesúza', che'gake'ne':

—Ben'ka' nak Juanna' txen na' ben'ka' nak fariseoka' txen zekizezi chzoagake' wbas' na' choe'lwillgake' Chioza'. Na' ¿bera¿che ben'ki nakgake' li' txen bi chzoagake' wbas'?

³⁴ Na' chi'e legake':

—Kat' de to ye'l' wishagna', aga wak gonle byen ben'ka' chdop chllag soagake' wbasaa shlak zoalengake' bi'na' chshagna'. Na' ka'kzan ben'ki nakgake' nad' txen, cheej chaogake' naa zoalen' legake'.

³⁵ Per wllin lla wkwas ben' nad' ladje'ka', kana'chan soagake' wbasaa.

³⁶ Na' lekzka' bzoe' sto jempl, chi'e legake':

—Ni to ben' bi chchogue' xa kobe'na' na' chideen lee xe' dii gola'. La' shi gone'n ka', na' wlliyee dii koba', na' dii gola' aga wnelebin lech' koba'.

³⁷ Na' ni kono chгаа vinona' daa zi' chchejte to loo yid gola'. La' shi no gon ka', vino koba' wchezaan yid gola' na' chopten kwiayi'.

³⁸ San vino koba' chiyal' shollan loo yid koba'.

³⁹ Na' lekzka' to ben' ba yooloe' cheeje' vino gola' aga weenile' yeeje' dii koba', daa chziachile' dii gola'.

6

Wdishgake' do che trígona' lla sabda'

(Mt. 12:1-8; Mr. 2:23-28)

¹ To lla sabd, llana' chombaan ben' Israelka', wdelen Jesúza' ben'ka' nakgake'ne' txen to ga naz ben' trígona', na' ben'ka' zejlengake'ne' wzolo wdishgake' trígona' na' wxobgake'n wdaogake'n.

² Na' bal fariseoka' gollgake' legake':

—¿Bi_{che} chonzle daa bi chiya_l' goncho llani chomba_añcho?

³ Na'ch che' Jesúza' legake':

—¿Abi_n' wlable gana' cho'en dill' ka ben dii Davina' len be_n'ka' nakgake'ne' txen ka wdon-gake'?

⁴ Wyo'e loo lill x_latj Chioza' na' wdoyoe' yetxtilka' daa naki che Chioza' daa toz b_xozka' de lsens gaogake'. Na' lekzka' bi'en be_n'ka' nakgake'ne' txen.

⁵ Na' lekzka' chi'e fariseoka':

—Nad', Be_n' Bsel' Chioza' Yell-lioni, ch_nabi'a lao llani chomba_añcho.

Biyon Jesúza' to be_n' lla sabda'

(Mt. 12:9-14; Mr. 3:1-6)

⁶ Na' sto lla sabd, llana' chomba_añ be_n' Israelka', wyaj Jesúza' gana' chdop chllaggake' choe'lwillgake' Chioza' na' wzoloe' chli' chsedile' legake'. Na' ladj be_n'ka' len to be_n' net nee de sh_lina'.

⁷ Na' fariseoka' na' be_n'ka' chli' chsedi leya' lle'gake' chwiayen'gake' shi wiyon Jesúza' beena' llana' chomba_añgake', kwenche gaogake' xya che'.

⁸ Na' gokbe'i Jesúza' daa chza'lall'gake', na'ch golle' beena' net t_laa neena':

—Wzolla' na' wze gcho_la'.

Na'ch wzolla' beena', wzie' gcho_la'.

⁹ Na'ch goll Jesúza' be_n'ka':

—Ni inabid' le': ¿Beran na leya' chiya_l' goncho lla sabdka'? ¿Agoncho dii wenna' anti goncho dii mala'? ¿Ayislacho be_n' anti witchone'?

¹⁰ Na'ch bwia Jesúza' legake', na' chi'e beena' net t_laa neena':

—B_li noona'.

Na'ch bli neena' na' biyakin.

11 Na' fariseoka' na' ben'ka' chli' chsedi leya' le bllaagake' na' choe'gake' dill' nak ka gongake' che Jesúza'.

Wlej Jesúza' postlka' shllin

(Mt. 10:1-4; Mr. 3:13-19)

12 Na' wyaj Jesúza' to lo yaa kwenche jelwille' Chioza', na' do yel be'lwille'ne'.

13 Ka wyeeni', goxe' ben'ka' nakgake'ne' txen na' ladj ben'ka' wleje' ben'ki shllin na' bsi'e legake' postl:

14 Simónna' beena' bsi'e Pedro, len ben' bishee Andréza', na' Jacóbona', Juanna', Felípena', Bartoloména',

15 Matewa', Tomáza', Jacobo xiin Alfewa', Simónna', beena' bsi'gake' Zelote,

16 Judas, ben' bish' Jacóbona'* na' Jud Scariota', beena' bene' Jesúza' lo na' ben' malka'.

Bli' bsemi Jesúza' ben' zan

(Mt. 4:23-25)

17 Na'ch biyetjlen Jesúza' legake' lo yaana' na' billingake' to ga nak lesh'. Na' na' lle' ben' zan inleeb, ben' zaak doxen gana' mbani Judeana' na' yell Jerusalénna', na' ben' zaak cho'a niso'na' gana' mbani yell Tírona' na' yell Sidónna'.

18 Wyajgake' kwit Jesúza' kwenche wzenag-gake' xtilleena' na' yiyakgakile' bi yillwe' dii chak-gake'. Na' lezkka' biyaki ben'ka' chsak'zi' dii xiw'ka' legake'.

* **6:16** Ben' bish' Jacóbona': ben'ka' nsed nagake' chiyal' inan xiin Jacóbona'.

19 Yog'z beṅ' goklall'gake' idi'gake' Jesúza' daa ba neṅgake' chchej yel' wak che'na' na' chiyaki yog' beṅ'.

Ben'ka' zoa mbalaz na' beṅ'ka' bi zoa mbalaz
(Mt. 5:1-12)

20 Na'ch bwia Jesúza' beṅ'ka' nakgake'ne' txen, na' chi'e legake':

—Chakomba le' nakle beṅ' yesh' daa chleble yel' wṅabia' che Chioza'.

21 Chakomba le' chbiḷ chdonle naa; wllin lla yesh yeljile.

'Chakomba le' chbell-le naa; wllin lla yixill-le.

22 'Chakomba le' shi chakzbani beṅ' le', shi bi chongake' le' txen, shi biya dii nagake' le', na' shi chongakile' le' nakzi ka chongakile' to beṅ' wen dii mal ni cha', nad', Beṅ' Bsel' Chioza' Yell-lioni.

23 Li yibayi, na' li soa mbalaz kat' ba chongakile' le' ka', la' yabana' gaple to dii wen dii shao'. La' ka'kzə beni dii xoxxtoe'ka' beṅ'ka' wdxijee daa goll Chioza' legake' kani'yi.

24 Nyesh'laz gak chele, le' nakle beṅ' wni'a, la'kzi le wen chak chele naa.

25 Nyesh'laz gak chele, le' de dii cheej chaole naa, la' wllin lla ibil idonle.

'Nyesh'laz gak chele, le' chyitj chxill-le naa; wllin lla kwellyesh'le.

26 Nyesh'laz gak chele, le' choe'la'o yog' beṅ' le', la' ka'kzə be'la'o dii xoxxto'leka' dii beṅ'ka' benzə ka chyixjee daa che' Chioza' legake'.

Chiyal' gakicho beṅ'ka' chakzbani cho'
(Mt. 5:38-48; 7:12)

27 'Le' chzenagle naa, nia' le', li gaki beṅ'ka' chakzbani le'. Li gonigake' wen.

28 Li inabi Chioza' gone' ka gak wen che ben'ka' chyishj bia' blag' chele. Li inabi Chioza' gaklene' ben'ka' chiya dii nagake' chele.

29 Shi no kap' xag'lēna' tlaa, li wze daa zi shlaa. Na' shi no koyō xachel-lēna', li we'tega len xkamis-lēna'.

30 Nottezə ben' shi bi inabe' chele, li we'n. Na' ka', shi no ikaa bi de chele, bi yinabzilēnē'n.

31 Li goni ben' kon ka cheenile gongakile' le'.

32 'Shi to ben'ka' nllagzile chakile, ¿garan de dii wenna' daa chonle? La' ka'klen chon ben' saaxyaka'.

33 Lekzka' shi to ben'ka' chonzi le' wen chiyonile wen, ¿garan de dii wenna' chonle? La' ka'klen chon ben' saaxyaka'.

34 Na' shi chōe'le bi chōe'le ben' daa nezile yig-wee wzonna', ¿garan de dii wenna' daa chonle? La' ka'klen chon ben' ssaxyaka', chōe'gake' bi chōe'gake' daa nongake' lez wigoogake' wzon che'ka'.

35 Na' le', naalla, chiyal' gakile ben'ka' chakzbani le', na' gonle wen chegake'. Na' shi we'le dii we'le legake', bi gonle lez yiyongake'n. Shi ka' gonle, Chioza' yiyone' dii xench chele, na' inēzi ben' nakle xiin Chios, beēna' nak ben' choo ben' xen, la' le' chōne' wen che ben'ka' bi chōe' le' yel' choxken na' ben' wen dii malka'.

36 Chiyal' yiyeshii ljwell-le ka chiyeshii Xacho Chioza' yog' ben'.

Bi wwia wyile bi chon ben'

(Mt. 7:1-5)

37 'Bi wwia wyile bi chon ben', kwenche bi gon Chioza' xya chele. Bibi wtobile' ben', kwenche bi

gaple dol' lao Chioza'. Li si'xen che ljwell-le, na' Chioza' si'xene' chele.

³⁸ Li we' ben' bi chyalljile' na' Chioza' yiyone'n. Na' yiyonchle' dii xench, ka chon ben' chzanile' do yichj do lallee kat' bi wi'e, chzoayaa chzoalline'n. La' kon ka chonle chzanile' we'le ben' bi de chele, ka'kzan goni Chioza' le'.

³⁹ Na' bzoa Jesúza' to jempl, chi'e legake':

—Nezicho bi gak to ben' lchol wchi'e sto ben' lchol, la' choptegake' ljabixgake' to loo yech.

⁴⁰ Na' beena' chsed bi gak ine': “Chonch' ka beena' chli' chsedile' nad'.” Kat'ch yiyoll yido wsede', kana'chan gake' ka beena' bli' bsedile'ne'.

⁴¹ '¿Biche chwiazó' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'?

⁴² Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': “Ben'shki yibej' bicha' yoo loo jalawo'na'”? ¿Ben' wxiye'! Zigaate bwia cho'na' na' tech wwio' che' bish' ljwello'na'.

Daa chbia to yag chli'n bi yag daa

(Mt. 7:17-20; 12:33-35)

⁴³ 'Biga zoa to yag wen na' kwiazan dii bi nak wen, ni biga zoa to yag dii bi nak wen kwiazan dii nak wen.

⁴⁴ Ka ile'icho daa chbia to yag, na' chnezicho bi yag daa. Yag yeshaa aga wbian yixwewa', na' lekzka' yag bisgaana' aga wbian uvana'.

⁴⁵ Ka'kzan beena' nak ben' wen, choe' dill' wen, la' loo yichjlall'do'enan' yoo dii wenna'. Na' beena' nak ben' mal, cho'e dill' dii nak mal, la' loo yichjlall'do'enan' yoo dii mala', la' yog' daa chnecho chchejan loo yichjlall'do'chona'.

*Chop ben' bengake' twej yoo**(Mt. 7:24-27)*

⁴⁶ '¿Berache nazle nad' "X̄an', X̄an'", na' bi chonle daa nia' le'?

⁴⁷ Ni inia' le' no zaklebi beena' chone' nad' txen na' chzenague' cha' na' chone' ka nia'.

⁴⁸ Zaklebile' beena' ben to yoo. Zigaate wdene' zitj wal na' wleke' leninna' lo yaja'. Ka wde yawa' na' wyoon le'inna', aga bizoyin yisheen daa, la' chi'cha leninna' lo yaja'.

⁴⁹ Na' beena' cheni cho'a xtillaana' na' bi chone' ka nia', zaklebile' beena' ben lille'na' lo yona' na' bibi lenin wleke'. Na' ka wde yawa' wyoon le'inna', lii billeeten na' wlliyi'tekkzan.

7*Biyon Jesúza' xmos x̄an soldadka'**(Mt. 8:5-13)*

¹ Ka biyoll be'len Jesúza' ben'ka' dill', biyaje' Capernaúma'.

² Na' yella' zoa to ben' Roma ben' chñabi'e to guiyoa soldad, na' zoa to xmose' lille'na', beena' le chakile', na' chake' to yillwe' dii chonan ka witan le'.

³ Na' ka beni x̄an soldadka' choe'gake' xtill' Jesúza', na'ch bselee bal' ben' golka' chñabia' Israela' kwenche ljet'yogakile'ne' ljayene' beena' bi shao'.

⁴ Na' ka bllin ben' golka' kwit Jesúza', got'yogakile'ne', che'gake':

—X̄an soldadka' chidolee gakleno'ne',

⁵ la' le chakile' cho' ben' Israel na' len' bene' yoon'a' gana' chdi'anto' choe'lwillnto' Chioza'.

6 Na'ch wyajlen Jesúza' legake'. Na' ka ba zoa yillingake' lille'na', xan soldadka' bselee bal ben' nllaguile' kwenche jellgake' Jesúza' dill'ki:

—Xan', bi sio' wneyi yido', la' bi chidolaa shoo loo lillii.

7 Daan bi biyaxjid' yid' kwin' yidtil' li'. La'ch' to chop cho'a dill' shel' ino' na' yiyakile'.

8 La' zoa no chnabia' nad', na' lekzka' chnabi'a soldad cha'ka'. Na' kat' chep' toe': “Wyaj ni”, na' chaje'. Na' kat' chep' stoe': “Da ni”, na' chide'. Na' kat' chep' xmosaa: “Ben dga”, na' chone'n.

9 Na' ka beni Jesúza' xtill' beena' na' bibanile', na' biyechje' bwie' ben'ka' zjanogake'ne', na' chi'e legake':

—Dii li, ni to ben' Israel bin' illag' ben' gonlilall'likze' nad' ka chonlilall' beeni nad'.

10 Na'ch ziyaj ben'ka' bsel' xan soldadka', na' ka billingake' lille'na' ble'gakile' ba biyaki xmose'na'.

Bisban Jesúza' xiin to nool wizeb bi' ba wit

11 Ka wde, na' wyaj Jesúza' sto yell dii le Naín kon ben'ka' nakgake'ne' txen na' lench zan ben' yoblə.

12 Na' ka bllingake' cho'a yella', ble'gakile' zjak-wash' ben'ka' to bi' wet. Na' bi'na' wit nakb' bi' tlish', na' xna'baa nake' noolə wizeb. Na' ben' zan ben' yellka' zjakwash'gake'b'.

13 Na' ka ble'i Xancho Jesúza' noola', na' biyeshile'ne', chi'ene':

—Bi kwello'.

14 Na'ch jabiguee bexee gana' xoa bi' weta', na' wlez ben'ka' nɔngake'b'. Na' golle' bi' weta':

—Bi' xkwid', nia' li', jbiyas!

15 Na' bi' weta' lii bibanteb' na' bibe'b' na' wzolo chineb', na' biyon Jesúza'b' lo na' xna'baa.

16 Na' ka ble'i beṇ'ka' daa bene', yog'lolze' blleb na' wzologake' choe'la'ogake' Chioza', nagake':

—Ladjchoni ba bla' to beṇ' zakii beṇ' chyixjee daa che' Chioza'ne'.

Na' lekzka' nagake':

—Chiozan' ba blee kwenche gaklene' cho' nakcho yell che'.

17 Na' doxen gana' mbani Judeana' na' yellka' lia gaozə wnezgakile' daa ben Jesúza'.

Beṇ'ka' bseḷ' Juanna' lao Jesúza'

(Mt. 11:2-19)

18 Na' beṇ'ka' nongake' Juanna' txen jayell-gake'ne' yog' diika' chon Jesúza'. Na'ch Juanna' wnie' chope'

19 na' bselee legake' gana' zoa Jesúza' kwenche janabgakile'ne' shi leyeṇ'en' beena' lia bia' yid wa shi chiyal' kwezgake' sto beṇ' yoblə.

20 Na' ka bllin beṇ'ka' bseḷ' Juanna' kwit Jesúza', che'gake'ne':

—Juanna', beena' chchoa beṇ' nisa', bselee neto' kwenche zidṇabinto' li' shi li'yeṇ'kzan nako' Crístona', beena' chbeznto' wseḷ' Chioza' kwenche inabi'e, wa shi chiyal' kweznto' stoe'.

21 Na' shlak zegake' na', biyon Jesúza' beṇ' zan beṇ' chak yillwe', na' lekzka' bibeje' dii xiw'ka' yoo beṇ', na' bene' ka ble'i beṇ' zan beṇ' lcholka'.

22 Na'ch che' Jesúza' beṇ'ka' bseḷ' Juanna':

—Li yiyaj na' li lljayell Juanna' daa ba ben ble'ile. Li lljayelle' beṇ' lcholka' chle'gakile', na' beṇ'ka' bi chak sa' chza'gake', na' beṇ'ka' chak yillwe'na' daa le lepra chiyakgakile', na' beṇ' kwellka' chengakile', na' chiban beṇ' wetka', na' chyixje'id' beṇ' yesh'ka' dill' wen dill' kob che Chioza'.

23 Chakomba beena' chajle' cha' na' bi chakchoplallee.

24 Na' ka biza' ben'ka' bsel' Juanna', Jesúza' bi'e xtill' Juanna' lao ben'ka' lle' na', chi'e:

—¿Nakra nak beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e?

25 Na' shi bi nake' ka', ¿nakran nak beena' jawiale, shka'? ¿Ato ben' nakwe' lech' dii zakii? La' nezczile ben'ka' nakw lech' dii zakii, na' naptegake' bittezə dii chzelall'gake', zoagake' lill ben' wñabia'ka', aga zoagake' latja' gana' bibi chashj chleb.

26 Na' ¿nakran nak beena' jawiale, shka'? ¿Ato ben' chyixjee daa che' Chioza'ne'? Dii li kan' chone', na' chontechle' ka to ben' chyixjee daa che' Chioza'ne'.

27 La' che beenin cho'e Cho'a Xtill' Chioza' dill' gana' nan:

Wselaa beena' kwialo lawo'na',
na' chixji'e xtilloona' kwenche soa ben' wzenag-
gake' cho' kat' illino'.

28 Na' nia' le', lao yog'lolte ben' yell-lioni, ni to konon' ichej ben' zak'teche' ka Juanna'. Per nottezə beena' choe' latj inabia' Chioza' loo yichjlall'do'ena', zak'teche' ka Juanna'.

29 Na' yog'lol ben'ka' bchoa Juanna' nisa', no ben' wichixjka' na' zan ben' yoblə, ka bengakile' daa wna Jesúza', gokbe'gakile' dill' li dill' shao' nak cho'a xtill' Chioza'.

30 Na' fariseoka' na' ben'ka' chli' chsedi leya' bi goongakile' wchoa Juanna' legake' nisa', ni bi gok-lall'gake' gon Chioza' dii wenna' cheenile' gone' chegake'.

31 Na'ch goll Xancho Jesúsza' legake':

—¿Bi ka wsaklebid' le' mbanle naa? ¿No ka inia' nakle?

32 Nakle ka bi'do'ka' chbe' gana' chak yaana' na' chosyaagakb' che' ljwellb': “Bkwellnto' bbleja' na' bi byaale, na' be_lnto' dii chon nyesh', na' ni bi wchell-le.”

33 La' bid Juan wichoa nisa', na' bi chawe' yetxtil ni bi cheeje' vino, na' nale che': “Dii xiwaan yo'e.”

34 Na'ch bid' nad', Ben' Bsel' Chioza' Yell-lioni, na' chle'ile cheej chaw', na' nale cha': “Le ben' waoxat nak beeni na' cheejtie', na' nllagteile' ben' saaxyaka' na' ben' wichixjka'.”

35 Per yel' sin' che Chioza' chli'lawin ka nsa' che ben'ka' chzenaggake' cheyin.

Jesúza' wyaje' lill Simónna', beena' nak fariseo

36 To fariseo wnie' Jesúsza' kwenche gaogake' lille'na'. Ka blline' na' wchi'e cho'a mesa'.

37 Na' to noolə wda zoa yella', ka wnezile' zjtao Jesúsza' lill farisewa', na'ch wyaje' noxee to lmet de yaj xochi na' yollan set zix.

38 De chbellzile' jabigeee xni'a Jesúsza' na' bis-bisile' ni'ena' nis xchell che'na'. Na' bisbillile'n yish' yichje'na', na' bnopé'n na' bwazje'n set zixa'.

39 Na' farisewa', beena' wnie' Jesúsza' lille'na', ka ble'ile' ka chon noola', na' gokile': “Shel'ka' dii li nak beeni to ben' chyixjee daa che' Chioza'ne', wakbe'ile' nan nooli chox' ni'ena' nake' ben' saaxya.”

40 Na'ch che' Jesúsza' farisewa':

—Simón, de to dii cheenid' inia' li'.

Na' che' Simónna':

—Wna, Maestro.

41 Na'ch che' Jesúza':

—Chop ben' chbag'gake' mech che to ben' chon yichjin. Toe' chbaguee gay' guiyoa mech plat*, na' stoe' chbaguee shiyonan.

42 Na' ni toe' bi bllelgakile'n yiyixjgake'n. Na'ch xan mecha' benxenlallee daa chal'gake' che'. Wnashki nad', ¿no ben'ka' chop gakchile'ne'?

43 Na'ch che' Simónna':

—Chakid' beena' chbag' dii xench.

Na' che' Jesúza'ne':

—Lekzilo', kan' nakan.

44 Na'ch bwia Jesúza' noola' na' chi'e Simónna':

—Bwiakachi nooli. Ka wyo'a loo lillo'ni bi beno' nisa' kwenche chib ni'ani, per nooli ba wdibile' nis xchell che'na' ni'ani na' bisbillile'n yish' yichje'na'.

45 Bi bnopo' nad', per nooli kon ka wyo'a chnoptezi chnope' ni'ani.

46 Bi wdebo' yichjii set, per nooli ba bwazje' set zixa' ni'ani.

47 Daan nia' li', la'kzi dii zan saaxya ba ben nooli, ba biyakxengakan daa le chakchgaile' nad'. Na' beena' lat'zə biyakxen che', lekzka' lat'chga chakile' nad'.

48 Na'ch golle' noola':

—Ba biyakxen saaxya cho'ka'.

49 Na' ben'ka' chi'lengake' Jesúza' txen wzologake' che' ljwellgake':

—¿Nora beeni, lla, axt saaxyaka' chizi'xene'?

50 Na' Jesúza' chi'e noola':

—Daa chonlilaloo nad', ba bilo' lao yel' zak'zi'na'. Biyaj mbalaz.

* **7:41** Mech plat: dill' griegona' nan denario, na' nakan to mech dii zak' che shlla llin.

8

Noolka' goklengake' Jesúza'

¹ Ka wde dga, wda Jesúza' zan yell xen na' zan yelldo', chyixji'e dill' koba' nan Chioza' chñabi'e loo yichjlall'do' beñ'ka' chzenag che'. Na' postl che'ka' shllin chdalengake'ne' txen.

² Na' lekzka' len bal noolka' ba biyone'. Bale' bibeje' dii xiw'ka' wyoogake', na' zi bale' gok-gake' yillwe' na' biyone' legake'. Na' ladje'ka' len Maríana', noola' nsi'gake' Magdalena, beena' bibej Jesúza' gall dii xiw'ka'.

³ Na' lekzka' len noola' le Juana, xool Chúzana', beena' ngoo lo nee chap chwie' lill Heródeza'. Na' len Susánana', na' zanch noolka' beñ'ka' jano Jesúza' na' bchingake' dii de chegake' kwenche goklengake'ne'.

Jempl che to beñ' goz goon

(Mt. 13:1-9; Mr. 4:1-9)

⁴ Beñ' zan bllesh to to yell jawiagake' Jesúza', na' ka bdop beñ' zan wal na'ch bseesile' legake' to jempl, chi'e:

⁵ —To beñ' goz goon wzee zeje' goza'. Na' ka zej chzalee biñna', balan bxop cho'a neza' na' blej bshoshj beñ' len, na' bllin byiñka' wdaogakban.

⁶ Na' zi balan bxop ladj yajka' gana' bitek chi' yona', na' ka bla'gakan to wbillzgakban, la' aga bi gop' de gana' bxopan.

⁷ Na' zi balan bxop ladj yag yesh'ka', na' ka bla'gakan aga be' yag yesh'ka' latj igolgakan.

⁸ Na' zi balan bxop lo yo wenna', na' le bgolgakan na' axt do to guioa wej wllia to ton.

Na' ka biyoll bseese jemplá', na'ch wñie' zilljə
chi'e:

—Le' chenile dga nia', li sen wñeyi.

Bzajnií Jesúza' biçhe chzoe' jemplka'
(Mt. 13:10-17; Mr. 4:10-12)

⁹ Na'ch wñab beñ'ka' nakgake'ne' txen bi zejin
jemplá' daa bseese.

¹⁰ Na' che' Jesúza' legake':

—Chioza' cho'e latj inezile daa kono ñezkzi, ka
chñabi'e loo yichjall'do' beñ'ka' chzenaggake' che'.
Na' beñ'ka' sto chseesid' legake' shgal' jempl, la'
la'kzi chle'gakile' bin chon', kon chongake' ka beñ'
bi chle'i. Na' la'kzi chengakile' bin nia', aga cha-
jni'gakile'n.

Bzajnií Jesúza' bi zeji jempl che beñ' goz gooña'
(Mt. 13:18-23; Mr. 4:13-20)

¹¹ 'Kin zeji jempl che beñ goz gooña': cho'a xtill'
Chioza' nakan ka biñna' daa goze'.

¹² Na' zoa beñ' chzenaggake' cho'a xtill' Chioza',
na' lii ze'te dii xiwaa chikwasan daa kwenche bi
shajle'gake' na' kwiayi'gake'. Chak chegake' ka gok
che biñna' daa bxop cho'a neza'.

¹³ Na' zoa beñ' chibagakile' chzenaggake' cho'a
xtill' Chioza' na' chlebgake'n, per kat' chak bi chak
chegake' na' chbej yichjgake'n. Chak chegake' ka
gok che biñna' bi bde loinna' daa bxopan lo yaja'.

¹⁴ Na' zoa beñ' chzenague' cho'a xtill' Chioza',
per chi'ch yichjgake' daa chak chegake' na' che yel'
wni'ana', na' che bichlə dii chzelall'gake', na' bi
chakchagake' lo xnez Chioza'. Chak chegake' ka
gok che biñna' bxop ladj yag yesh'ka'.

15 Na' zoa beṅ' chzenaggake' cho'a xtill' Chioza' do yichj do lall'gake' na' chongake' ka nan, na' chzo chzakgakile' bittezə dii chak chegake'. Beṅ'kin chak chegake' ka gok che biṅna' bxop lo yo wenna' daa le wllia.

Jempl che to kandil

(Mr. 4:21-25)

16 'Biga zoa to beṅ' chxene' kandila' na' chdose'n to dii kwashaan daa wa chzoe'n xan xlague'na', san chzoe'n sibə kwenche ile'i beṅ'ka' sho' loo yooṅa'.

17 Na' lekzka' yog'lolte dii ngash' ṅaa, wllin lla yila' lawin, na' daa kono nezi ṅaa, wllin lla inezi beṅaan.

18 'Li wzenag dga nia' le' ṅaa. Beena' chzenag zizikchli shajni'chile', na' beena' bi chzenag, daa ba bzenague' lat', yog'lolan yiyal-lallee.

Xṅa' Jesúza' len beṅ' bisheeka'

(Mt. 12:46-50; Mr. 3:31-35)

19 Na'ch bllin xṅa' Jesúza' len beṅ' bisheeka' gana' zoe', na' bi gok ibig'gake' kwite'na' daa lle' beṅ' zan.

20 Na' wbig' to beṅ' golle' Jesúza':

—Xṅooṅa' len beṅ' bishooka' lle'gake' lesh' chyooṅa' na' cheengakile' wshaljlengake' li'.

21 Na' goll Jesúza':

—Beṅ'ka' chzenaggake' cho'a xtill' Chioza' na' chongake' ka nan, legaken' nakgake' xṅa' na' beṅ' bishaa.

Jesúza' bkweze' to be' wal lo nisdo'na'

(Mt. 8:23-27; Mr. 4:35-41)

22 To lla wyoo Jesúza' to loo barkw len beṅ'ka' nakgake'ne' txen na' golle' legake':

—Techo shlaalə nido'ni.

Na'ch wza'gake'.

²³ Na' shlak ngoo barkwa' nez, wtes Jesúza'. Na'ch wze to be' wal lo nido'na' na' wzolo chas chat' nisa' na' biyollan loo barkwa', na' zi lat'zə nan kwe'n yel.

²⁴ Na' jasangake' Jesúza', che'gake'ne':

—¡Maestro! ¡Maestro! ¡Ba chbe'cho yel!

Na' wyas Jesúza' na' bsheshlene' be'na' len nido'na'. Na' wlezkakan, bich bi gok.

²⁵ Na'ch golle' legake':

—¿Abi chonlilall'kzle nad'?

Na' legake' le chllebgake' na' le chibangakile' na' che' ljwellgake':

—¿Nora beeni lla?, axt be'na' na' nido'na' chzenaggakan che'.

Bibej Jesúza' dii xiwaa yoo to ben' Gadara

(Mt. 8:28-34; Mr. 5:1-20)

²⁶ Na'ch bllingake' yell-lio che ben' Gadáraka', daa llia shlaa nido'na' ndil yell-lio che Galileana'.

²⁷ Ka bichej Jesúza' loo barkwa' jabig' to ben' Gadara kwite'na'. Ba wlla yo'e dii xiw'ka', na' bich bi xalaane' nakw, ni bich zoe' lille', san kapsanta' noni lille'.

²⁸ Na' ka ble'ile' Jesúza', besyee na' jachek' xibe' lawe'na', na' zillj inlleb chi'e:

—Jwayiz nad', Jesús Xiin Chios, ben' nak liizelozi ben' choo ben' xen. Ben goklen bi wsak'zi'o nad'.

²⁹ Gollan ka' daa ba chon Jesúza' byen yichejan. Ba wlla chnabi'an le' na' la'kzi chchejgake' ni'a neena' gdenna', lobe' chchogue'n. Na' dii xiwaa chtadon le' na' chjsoe' ga kono ben' lle'.

³⁰ Na' che' Jesúza':

—¿Bin lio'?

Na' chi'e:

—Legi^onan lia'.

Golle' ka', la' zanannan' yo'e.

³¹ Na' got'yogakin Jesúza' bi wseleegakan gana' kwiayi'gakan.

³² Na' gaozə zoa to yaa gana' lle' kush zan chaogakb. Na' dii xiw'ka' wzeyidgakan wⁿabgakin Jesúza' wi'e latj yiyoogakan kushka', na' bi'e latj.

³³ Na'ch bichej dii xiw'ka' yoo beena' na' biyoogakan kushka'. Na' lii gokleshtegakib na' jabixgakb to cho'a bdiⁿj na' jshoogakb loo nisa' na' witgakb.

³⁴ Na' beⁿ'ka' chap kushka' ka ble'gakile' daa gok, biyajdogake' jazengakile'n beⁿ'ka' lle' yella' na' beⁿ'ka' lle' lyixaa.

³⁵ Na'ch bllesh beⁿ'ka' jawiagake' daa gok. Na' ka bllingake' kwit Jesúza', na' chi' beena' wyoo dii xiw'ka' kwite'na'. Ba biyakw xalaane'na' na' ba biyeen biyeeniile'. Na' bllébgake'.

³⁶ Na' beⁿ'ka' ble'gakile' daa gok, gollgake' beⁿ'ka' zi' bllin nakan gok biyaki beena' wyoo dii xiw'ka'.

³⁷ Na' yog'lol beⁿ' Gadáraka' got'yogakile' Jesúza' yizee lalle'ka' daa le chllebgake' ka bene'. Na' biyo'e loo barkwa' ziyaje'.

³⁸ Na' beena' bichej dii xiw'ka' got'yoile' Jesúza' wi'e latj shajlene'ne'. Per Jesúza' chi'ene':

³⁹ —Biyaj lillo'na' na' jaye' dill' ka nak dii wen dii shawaa daa ba ben Chioza' cho'.

Na'ch biyaj beena' jayee dill' doxen yella' ka nak dii wen dii shawaa daa ben Jesúza' che'.

Biyon Jesúza' noola' bex̄ee xe'na' na' lekzka' xiin Jairona'

(Mt. 9:18-26; Mr. 5:21-43)

⁴⁰ Ka billin Jesúza' sh̄laa nido'na', le chiba chizaki ben'ka' lle' na', la' yog'zgake'n chbezgake' le'.

⁴¹ Na'ch bllin to ben' le Jairo, nake' to ben'ka' chgoo x̄nezi cheyi diika' chon ben' Israelka' gana' chdop chllaggake' choe'lwillgake' Chioza'. Na' b̄chek' xibe'na' lao Jesúza' na' got'yoile'ne' shaje' lille'na',

⁴² daa ba chakshwet bi' nool che'na'. Nakh' to bi' tlish' tyaj, na' ka do shllin̄ yizib'. Na' shlak zej Jesúza' ben' zan janogake'ne' axt̄ bdakwyillgake'ne'.

⁴³ Na' ladj ben'ka' zjano Jesúza' len to noolə ba gok shllin̄ yiz chzoe' wbaana'. Na' ba bliiayee yog' dii de che' daa chajtezi chaje' lao ben' wen rmechka', na' ni to kono gok yiyon le'.

⁴⁴ Na'ch wbiguee koll' Jesúza' bex̄ee xe'na', na' katena' lii biyakteile'.

⁴⁵ Na'ch goll Jesúza' ben'ka' zjano le':

—¿No beena' ba bex̄' nad'?

Na' ni to kono b̄cheb. Na'ch goll Pédrona'ne':

—Maestro, ben'kin chdakwyillgake' li' na' chllig'gake' li' to ki to ka'lə. ¿Biche nazo': "Non ba bex̄' nad'?"

⁴⁶ Na' che' Jesúza' legake':

—Nochodan' ba bex̄' nad', la' gokbe'teid' bchej yel' wak cha'na'.

⁴⁷ Na' noola', ka gokbe'ile' aga wak wkwashee, do chllebze' j̄chek' xibe'na' lao Jesúza'. Na' lao

yog'lol ben'ka' lle' na', golle' biche beᵗze' xe'na' na' daa beᵗee lii biyakteile'.

⁴⁸ Na'ch goll Jesúza'ne':

—Xiin', daa chonlilalloo nadaan biyakilo'. Biyaj mbalaz.

⁴⁹ Ni choe'telə Jesúza' dill' ka bllin to ben' wzee lill Jairona', na' jelle'ne':

—Ba wit bi' cho'na'. Bich gonilo' Maestroni zed.

⁵⁰ Na' ka beni Jesúza', na' golle' Jairona':

—Bi illebo'. Wyajle' cha', na' wiyakkzi bi' cho'na'.

⁵¹ Na' ka bllingake' lille'na', aga be' Jesúza' latj sho' ben' yoblə, lete Pédrona', Jacóbona', Juanna' na' xaxna' bi' weta'zə.

⁵² Yog'lol ben'ka' lle' lill Jairona' chbellgake' daa ba wit bi'do'na'. Na' goll Jesúza' legake':

—Bi kwell-le, aga witbaan, cheszbaan.

⁵³ Na' bxill-ləgake' che', la' nezgakile' ba witbaan.

⁵⁴ Na'ch beᵗ Jesúza' na' bi' wetdo'na' na' wnie' zilljə, chi'e:

—Biyas, bi'do'.

⁵⁵ Na'ch bibam' na' lii biyasteb'. Na' goll Jesúza' legake' we'gake' dii gaob'.

⁵⁶ Na' xaxna'baa le bibangakile', na' che' Jesúza' legake' ni to kono ye'gake' daa gok.

9

Ben'ka' shllin jtixje'gake' cho'a xtill' Chioza'

(Mt. 10:5-15; Mr. 6:7-13)

¹ Na' bitop Jesúza' ben'ka' shllin, na' bi'e legake' yel' wak na' yel' wᵗabia' kwenche yibejgake' yog'lol dii xiw'ka' yoo ben' na' yiyongake' ben' che'i yillwe'.

² Na' bselee legake' kwenche llje'gake' dill' ka nak yel' wñabia' che Chioza', na' yiyongake' ben'ka' bi shao'.

³ Na' chi'e legake':

—To ka chazlen li shaj. Bi gox'le yag bar, bi wa'zle yixj ga koo xshinlazle, bi wa'le dii gaole, ni mech, na' ni zi shkwe' xale.

⁴ Na' yooná' gana' illinle, na'tezə soale ax̄t ka illinch lla yiza'le.

⁵ Na' yella' gana' bi wlebgake' le', kat' yiza'le, yishible bishtena' lliá nialeka' kwenche gakbe'gakile' aga wenan chongake' bi chlebgake' cho'a xtill' Chioza'.

⁶ Na'ch wza' ben'ka' nakgake'ne' txen na' wyaj-gake' to to yell wdixje'gake' dill' wen dill' kob che Chioza' na' biyongake' ben'ka' bi shao'.

Wit Juanna', beena' bchoa ben' nisa'

(Mt. 14:1-12; Mr. 6:14-29)

⁷ Heródeza', beena' wñabia' gana' mbani Galileana', benile' yog' daa chon Jesúsá'. Na' chakile' nora beena', la' bal ben' nagake' dii Juan wichoa nisan' ba bibane' dii yoblə.

⁸ Na' zi bale' nagake' Elíazan' ba bila' dii yoblə. Na' zi bale' nagake' nochod' dii ben'ka' wdixjee daa goll Chioza' legake' kani'yin ba biban ladj ben' wetka'.

⁹ Na' Heródeza' wne':

—Nad' ben' mandad wchog yen dii Juanna'. ¿No-raz beena' chenzid' nagake' chiya dii chone', lla?

Na' le goklall' Heródeza' ile'ile' Jesúsá'.

Jesúza' bwawe' gayaa mil ben'

(Mt. 14:13-21; Mr. 6:30-44; Jn. 6:1-14)

10 Na' ka billin postilka' shllin, na' gollgake' Jesúza' yog'lol diika' jengake'. Na'ch bchi'e to lezgake' yella' le Betsaida.

11 Na' ka wnezi ben'ka' ba zej Jesúza', na'ch wloogake' nez zjanogake'ne' na' ka bllingake' lawe'na', blebe' legake' na' bzajniile' legake' ka nak yel' wñabia' che Chioza', na' biyone' ben'ka' bi shao'.

12 Na' ka ba wlle', ben'ka' shllin jabig'gake' kwit Jesúza' na' gollgake'ne':

—Goll ben'ki yiyajgake' yellka' wa no ran-shdo'ka' llia gaozə lljadiljgake' dii gaogake' na' ga guesgake', la' ga ni zoacho bikzə bi de.

13 Na' che' Jesúza' legake':

—Len', li we' dii gaogake'.

Na'ch che'gake'ne':

—Gay'lish'tgui yetxtilki napcho na' zi chopchga bel, lechozə shi willjxi'chno' che yoguee.

14 Gollgake'ne' ka' la' ka do gayaa mil ben' byoka' lle' na'. Na'ch che' Jesúza' ben'ka' shllin:

—Li ye'gake' kwe' shiyon wejgake'.

15 Na' bzoagake' xtillee na' wlekgake' ben'ka'.

16 Na'ch bex' Jesúza' yetxtilka' gay' na' belka' chop. Na' blis jalawe'na' yabana' bi'e Chioza' yel' choxken, na' bxoxje'n na' bi'en ben'ka' nakgake'ne' txen na'ch be'gake' che che ben'ka'.

17 Na' yog'gake' wdao ka beljgakile', na' diika' bichoonan bitopgake'n biyakten shllin xet'.

Pédrona' bi'e dill' nan Jesúza'n beena' wlej Chioza' inabi'e

(Mt. 16:13-19; Mr. 8:27-29)

18 To shii ka choe'lwill Jesúza' Chioza', na' lle' ben'ka' nakgake'ne' txen, na' wñabile' legake':

—¿Non na ben'ka' nak'?

¹⁹ Na' che'gake'ne':

—Ba_{le}' nagake' nako' dii Juan wichoa nisa', na' zi ba_{le}' nagake' nako' Elíaza', na' zi ba_{le}' nagake' nako' to ben' wdxjee daa goll Chioza'ne' kani'yi, na' ba bibane' ladj ben' wetka'.

²⁰ Na'ch chi'e legake':

—Shera le', ¿nora nale nak'?

Na'ch che' Pédrona'ne':

—Lin' Crístona', beena' ncheb Chioza' wselee.

²¹ Na'ch goll Jesúza' legake' ni to kono ye'gake' ka'.

Goll Jesúza' postl che'ka' wit ben' le'

(Mt. 16:20-28; Mr. 8:30-9:1)

²² Na' chi'e legake':

—Kon ka nchogbia' cha', nad', Ben' Bsel' Chioza' Yell-lioni, biya dii wchi' wsak'gake' nad'. Na' ben' golka' chnabia' wzoagake' nad' ka'lə na' ka'kzə bꞑozka' chnabia' na' ben'ka' chli' chsedi leya'. Na' chonan byen witgake' nad', na' ka gak shon lla yiban' ladj ben' wetka'.

²³ Na'ch golle' yog'lole':

—Shi no cheeni gon nad' txen, chiyal' wsanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa.

²⁴ La' beena' bi chzani yel' mban che'na' yen ile'ile' bittez ni cha', beenan' kwiayi'. San beena' chzani yel' mban che'na' ni cha', beenan' gat' to yel' mban che' zejli kani.

²⁵ Bibi zjanayin gap ben' yog'lol daa de yell-lioni, shi le' kwiayee.

²⁶ Nottezə ben' chiyi chido'i nad' na' che cho'a xtillaana', ka'kz nad', Ben' Bsel' Chioza' Yell-lioni,

yiyii yido'id' le' kat' yiyed' kon balaan xen cha'na',
na' che Xa' Chioza' na' che anjl che'ka'.

²⁷ Na' dii li nia' le', bal-le lle'le ni, ni mbanle kat'
wli' Chioza' yel' wñabia' che'na'.

Jesúza' biyake' nlla'lə

(Mt. 17:1-8; Mr. 9:2-8)

²⁸ Ka gok do to xman wna Jesúza' ka', na'ch
wyaje' to lo yaa kwenche jelwille' Chioza' na' bchi'e
Pédrona', Juanna' na' Jacóbona'.

²⁹ Na' shlak choe'lwille' Chioza', biyak
cho'alawe'na' nlla'lə, na' biyak xe'na' xtil axt chey
cheeni'n.

³⁰ Na' gokxe chop ben' bshaljlengake'ne', toe' dii
Moiséza' na' beena' sto Elíaza'.

³¹ Na' yel' chey cheeni'na' nechjan legake'. Na'
chshaljlengake'ne' che ka nak yel' wita' ile'ile'
Jerusalénna'.

³² Na' Pédróna' len Juanna' na' Jacóbona' le
chakxwesgake', per bendiplall'gake' bi wtesgake',
na'ch ble'gakile' yel' chey cheeni' che Jesúza' na'
che ben'ka' zi chop bllin kwite'na'.

³³ Na' ka ba chikwas dii Moiséza' na' Elíaza' kwit
Jesúza', Pédróna' golle' Jesúza':

—Maestro, ñle wen zoacho nizə! Gonnto' shonə
ransh, to cho', to che dii Moiséza' na' sto che Elíaza'.

Na' ni bi gokbe'i Pédróna' bin golle'.

³⁴ Na' ni choe'tie' dill', ka wze to bej gana'
lle'gake' na' bkwashaan legake'. Na' le bllebgake' ka
gokbe'gakile' ba yoogake' loo beja'.

³⁵ Na' loo beja' bengakile' shii Chioza', chi'e
legake':

—Beenin xiinaa, na' le chakidee. Li wzenag che'.

36 Na' ka wde goll Chioza' legake' ka', na' ble'gakile' stoza Jesúza' ze. Na' ni to kono gollgake' daa ben ble'gakile'.

Biyon Jesúza' to bi' wew' yoo dii xiwaa

(Mt. 17:14-21; Mr. 9:14-29)

37 Betiyo, ka biyetjgake' lo yaana', ben' zan wal jatilgake' legake'.

38 Na'ch ladj ben'ka' wne to ben' byo zillj, chi'e Jesúza':

—Maestro, ben goklen bwiagach bi' cha'ni, la' tlis' tyajchgabaan zoa.

39 Dii xiwaa choxa'n leb' na' tokonganz chosyaab', na' chonan ka chazb' shon axt chbia bllin' cho'abaa. Na' chiya dii chonin leb', na' aga cheenin wसान leb'.

40 Ba got'yoid' ben'ki nakgake' li' txen yibejgachgake' dii xiwaa yoob', na' bi gokgake' yibejgake'n.

41 Na'ch che' Jesúza':

—¿Zi'tegalə chelena', le' ben' mal na' ben' bi chajle! ¿Zi ka'k'tek chiyal' soalen' le'? Na' ¿zi ka'k'tek chiyal' soid' le'? Da diwa' bi' cho'na' ni.

42 Na' ka zej bi'na' kwit Jesúza' na' wchoon dii xiwaa leb' lo yona' na' wyazb' shona' sto shii. Na'ch bsheshlen Jesúza' dii xiwaa na' bichejan, na' biyakib'. Na' biyone'b' lall' na' xabaa.

43 Na' yog' ben'ka' lle' na' bibangakile' daa ble'gakile' yel' wak xen che Chioza'.

Sto shii wdixjee Jesúza' witgake'ne'

(Mt. 17:22-23; Mr. 9:30-32)

Na' shlak chibani yog' ben'ka' ble'i daa ben Jesúza', na' golle' ben'ka' nakgake'ne' txen:

44 —Li wzeyen' nagle dga inia' le': gongake' nad', Ben' Bsel' Chioza' Yell-lioni, lall' na' ben'ka' chakzi' chakzbani nad'.

45 Na' bi wyajni'gakile' bin golle', la' ni ngashaan lawe'ka' kwenche bi shajni'gakile'n. Na' blleb-gake' inabgakile'ne' bi zejin daa golle' legake'.

¿Noran zak'chi?

(Mt. 18:1-5; Mr. 9:33-37)

46 Na' wzolo chakdil-len ljwellgake' nogaken' nak ben' zak'chi.

47 Ka gokbe' Jesúza' daa chza'lall'gake', na'ch wdoyoe' to bi'do' na' bzie'b' kwite'na'.

48 Na' chi'e legake':

—Nottezə ben' wlebe' laa to bi'do'zə ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'. Na' beena' chaki bibi zakee lao yog'le, len' nake' ben' zak'chi ladjlena'.

Beena' bi chakile' cho' zi', txenkzan nake' cho'

(Mr. 9:38-40)

49 Na'ch goll Juanna'ne':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben'. Na' bllon-nto' gone'ka', la' bi nake' cho' txen.

50 Na' che' Jesúza' legake':

—Bi wllonle gone'ka', la' beena' bi chakile' cho' zi', txenkzan nake' cho'.

Jesúza' bsheshlene' Jacóbona' len Juanna'

51 Na' ka ba zoa yiyaj Jesúza' yabana', na'ch btoblallee yiyaje' Jerusalénna'.

52 Na' bselee ben' wllialozegagake' na' wyajgake' to yell daa mbani Samáriana' jtiljgake' gana' yigaane'.

53 Na' ben' Samáriaka' bi blebgake'ne' daa nezgakile' Jerusalénna'lan yiyaje'.

54 Na' chop ben'ka' nakgake'ne' txen, Jacóbona' len Juanna', ka ble'gakile' ka ben ben' Samáriaka', na' che'gake' Jesúza':

—Xan', ¿acheenilo' inabinto' Chioza' wselee yi'na' kwenche sheytega ben'ki?

55 Na' biyechj Jesúza' bsheshlene' legake', chi'e:

—Aga nezile non chnabia' yichjlall'do'lena' nazle ka'.

56 Nad', Ben' Bsel' Chioza' Yell-lioni, aga zaa kwenche wlliyaa yel' mban che ben', san zaa kwenche yisla' yel' mban che'kan'.

Na'ch biyajgake' yell yoblə.

Ben'ka' goklall' ljano Jesúza'

(Mt. 8:19-22)

57 Na' ka zejgake' tneza', to ben' chi'e Jesúza':

—Xan', cheenid' sa'len' li' gattezə shajo'.

58 Na' che' Jesúza'ne':

—Zoa yech ga chiyoo bez'ka', na' byindo'ka' non lilldo'gakb, san nad', Ben' Bsel' Chioza' Yell-lioni, biga de yigaan'.

59 Na'ch che' Jesúza' sto ben':

—Da dino nad'.

Na' beena' chi'ene':

—Xan', ben goklen be' latj zigaate lljakwashaa xa'na'.

60 Na'ch che' Jesúza'ne':

—Bibi gakilo', wikwash'kzə ljwell ben' wetka'. San li', jtixje'i ben' ka nak yel' wñabia' che Chioza'.

61 Na'ch sto ben' yoblə chizi'e Jesúza':

—Xan', cheenid' sa'len' li' per zigaate be' latj lljalaach' dill' bish' ljwell'ka'.

62 Na' che' Jesúza'ne':

—To ben' chwaane' goon, aga wak wwie' gozkoll'lə. Na' ka'kzan nakan che beena' noe' nad', shi bi nchoglallee aga wak gone' ka cheeni Chioza'.

10

Jesúza' bselee guiyon shllin ben' jtixje'gake' cho'a xtilleena'

¹ Na' ka wde dga, Jesúza' wleje' zi guiyon shi ben'* na' bselee chop weje' wllialogake' lawe'na' kwenche llje'gake' cho'a xtilleena' yellka' gana' llia bia' shaje'.

² Na' golle' legake':

—Dii li nia' le', dii xen wal daa yizi' yilaple de, na' to choptgui wen llinka' zoa. Na' li inabi Chioza', beena' nak xan llinna' wsel'stoe' wen llinka' kwenche yizi' yilapgake'n.

³ Li shajshki naa, nad' chselaa le' ka xil'do' ba zej ladj ba znia. ⁴ Bi wa'le ga koo xshinlazle, ni mech, ni zi shkwe' xel-le; na' bi shazile wwaple ben' chiox tneza'.

⁵ Na' ka sho'le to lill ben', zigaate wwaplene' chiox, ye'lene': “Soashgale mbalaz, le' zoale yooni.”

⁶ Na' shi zoa ben' cheenile' soe' mbalaz, na' yel' mbalaza' yigaanlenan le'. Na' shi bi cheenile', na' yibiilenan le'.

* 10:1

7 Na' yooná' gana' illinle na'tezə yigaanle na' yeej gaole kon bi gongake' le', la' to wen llin chiya' ikaa laxje'. Na' bi lljsoale to to yoo.

8 Kat' illinle to yell ga wlebgake' le', yeej gaotezle bittezə dii gongake' le'.

9 Na' yiyonle ben'ka' bi shao' yella', na' ye'le legake': "Yel' wñabia' che Chioza' ba bla'n laoleni."

10 Na' shi illinle to yell ga bi wlebgake' le', li yide lyell, li ye'gake':

11 "Axt bishte che yell cheleni wllia ni'anto'ni chibibnto'n kwenche gakbe'ile aga wenan chonle bi chleble cho'a xtil' Chioza'. Na' li koosha yichjle dga inanto' le', yel' wñabia' che Chioza'n ba bla'n laoleni."

12 Na' nia' le', ben'ka' lle' yellka' gana' bi wlebgake' le', dii xench nak yel' zak'zi'na' ile'gakile' aga ka ben' yell Sodómaka' llana' wchoglo Chioza' che ben'.

Ben'ka' bi bzenag xtil' Jesúza'

(Mt. 11:20-24)

13 'iNyesh'laz gak chele, le' ben' yell Corazín na' le' ben' yell Betsaida! La' shel' gok yel' wakka' yell Tírona' na' Sidónna' ka diika' ba gok ladjlena', kana'telja biyaj bilengakile' saaxya che'ka', na' ba wche'gake' bwazjgake' dena' yichjlaogake' na' gokwgake' lech' zeshaa, kwenche wli'gake' nan ba biyaj bilengakile' daa chongake', shel'ka'.

14 Kat' illin lla wchoglo Chioza' che ben', yel' zi' xench ile'ile aga ka ben' yell Tíroka' na' ben' yell Sidonka'.

15 Na' le' ben' yell Capernaúm, bi gonle lez yillinle yabana', la' Chioza' wzalee le' gana' sak'zi'le.

16 Na'ch che' Jesúza' ben'ka' bselee:
 —Ben'ka' chzenaggake' chele, cha'kzan
 chzenaggake'. Na' ben'ka' bi chlebgake' le',
 nad'kzan bi chlebgake'. Na' beena' bi chlebe'
 nad', lekzka' bi chlebe' Chioza', beena' bsele' nad'.

Billin ben'ka' guiyon shi

17 Na' ben'ka' guiyon shi† le chibagakile' ka
 billingake' kwit Jesúza', na' che'gake'ne':

—Xan', axt dii xiw'ka' chilleshgakan ka
 chzetjnto' lio'na'.

18 Na'ch che' Jesúza' legake':

—Ble'id' Satanáza' daa chnabia' dii xiw'ka' bx-
 opan yabana' ka chxop to yi' wziiw'.

19 Nad' ba ben' le' yel' waka' kwenche la'kzi gad'
 no bel znia wa no bexjoni' le' aga bi gakile', na' wlej
 wshoshjtele yog' daa chon dii xiwaa.

20 Per bi yibaile daa chisheshle dii xiw'ka', san li
 yibayi daa ba da' lлена' lee libra' de yabana'.

Jesúza' bibaile'

(Mt. 11:25-27; 13:16-17)

21 Na' katena' Espíritu Sántona' bene' ka bibach-
 gayi Jesúza', na' wne':

— Xa, li' nako' Xan yabana' na' yell-lioni, na'
 choe'lawaa li' daa ba bliilo' ben'ka' bibi chajni daa
 bi bliilo' ben' sin'ka' na' ben'ka' nteyi. Kan' ba
 wyazlalloo gono', Xa.

22 'Xa'na' ba none' lall' na' yog'te dii de. Na' ni
 to kono nezi noyen'an' nak' nad' Xiine'; toz Xa'na'
 nezile'n. Na' ni to kono nezi noyen'an' nak' Xa'na';
 toz nad' Xiine' nezid', na' chon' ka inezi ben'ka'
 cheenid' inezgakile'n.

† 10:17

23 Na'ch biyechje' bwie' ben'ka' nakgake'ne' txen, chi'e legake':

—Chakomba ben'ka' chle'gakile' diika' chle'ile naa.

24 Nia' le' ka', la' zan ben'ka' wdixjee daa goll Chioza' legake' na' zan ben' wñabia'ka' goklall'gake' ile'gakile' diiki chle'ile naa, na' bi ble'gakile'n. Goklall'gake' yengakile' dga chenile naa, na' bi bengakile'n.

To ben' Samaria bene' to dii wen

25 Na'ch wbig' to ben' chli' chsedi leya' wñabile' Jesúza' kwenchezə inezile' shi wak yillii Jesúza' xtilleena', na' wñabile'ne':

—Maestro, ¿bin chiyał' gon' kwenche gat' to yel' mban cha' zejli kañi?

26 Na'ch che' Jesúza'ne':

—¿Bin na leya' chiyał' goncho? ¿Bi na daa chlabo'?

27 Na'ch beena' chli' chsedi leya' chi'e:

—“Chiyał' gakicho Xancho Chioza' do yichj do lall'cho, do ka nak fuerz chechona', na' axt ga zeelo chajniicho; na' gaki bish' ljwellcho ka chaki kwincho.”

28 Na'ch che' Jesúza'ne':

—Kayen'nan nakan ka ba wno'. Shi gono' ka nan, na' gat' to yel' mban cho' zejli kañi.

29 Na' beena' bi goklall' wñit kwine', na'ch chi'ene':

—¿Noran bish' ljwell'?

30 Na'ch che' Jesúza'ne':

—To ben' ziyo'e nez daa ziza' Jerusalénna' daa ziyaj Jericólə, na' bchej wbanka' tneza' wlangake'

yog'te diika' zino'e ax̄t len xe'na' daa nakwe' golj-gake', na' bet wdingake'ne', sto chdoaze' bengake', na' bixonjgake'.

³¹ Na' shintk gok ka' ka wde to b̄xoz lo neza'. Na' ka ble'ile' beena' de na', to wdeze' ka'lə.

³² Na' lekzka' wde to ben' nake' xiin dia che dii Levína'. Na' ka ble'ile' chtoĭ beena' na', lekzka' to wdeze' ka'lə.

³³ Na' sto ben' Samaria lekzka' zeje' tneza' ka ble'ile' beena' chtoĭ na', na' biyeshile'ne'.

³⁴ Na' jabiguae kwite'na', na' ch bllie' lo we'na' set na' ch vino, na' b̄cheje'n. Na' bilepe'ne' koll' bayix' che'na', bīchi'ene' to yoo gana' wdape'ne'.

³⁵ Na' betiyo, ka ba zoa yiza' ben' Samáriana', wleje' chop mech plat‡, na' bi'en x̄an yoona' kwenche gap wwie'ne' zan lla, na' chi'ene': “Wdap bwiagach beeni, na' shi bi gaki mechi chkwaan', na' yiyixja'n kat' zizaa dii yoblə.”

³⁶ Na' ¿nora ben'ki shoñ chakilo' beni bish' ljwell beena' wlan ben' wbanka'?

³⁷ Na' beena' chli' chsedi leya' chi'ene':

—Beena' biyeshile'ne'.

Na' che' Jesúza'ne':

—Lekzka' li', kan' chiyal' gono'.

Jesúza' jawie' Márтана' na' Maríana'

³⁸ Na' shlak ngoo Jesúza' nez, blline' to yelldo' na' to noolə le Marta blebe'ne' lille'na'.

³⁹ Na' zoa to ben' bil Márтана' lie' María, na' Maríana' wchi'e lao Jesúza' chzenague' dillaa cho'e.

⁴⁰ Na' Márтана', dechga daa gone' na' wzeche' wñeyi cheyin, na' ch wyaje' kwit Jesúza', chi'ene':

‡ 10:35 Mech plat: dill' griegona' nan denario, na' nakan to mech dii zak' che shlla llin.

—Xan', goll-lat' ben' bila'ni gaklene' nad'. Toz' ndakw' yog' mandadka'.

⁴¹ Na' che' Jesúza'ne':

—Marta, Marta, chi'chga yichjo' na' zechgo' wneyi cheyi diika' gono'.

⁴² Per toz daa de nakan dii lialoch na' Maríani ba wleje'n, na' kono gak yikaan lawe'na'.

11

Bli' Jesúza' nak we'lwillgake' Chioza'

(Mt. 6:9-15; 7:7-11)

¹ Shlin choe'lwill Jesúza' Chioza' to latj, na' ka biyoll be'lwille'ne', to beena' nake'ne' txen golle'ne':

—Xan', bli'yi neto' nakan chiyal' we'lwillnto' Chioza', ka ben Juanna' bli' bsdile' ben'ka' benggake'ne' txen.

² Na'ch che' Jesúza' legake':

—Kat' we'lwill-le Chioza' kin inale:

Xanto' Chios, ben' zoa yaba,
we'la'oshga yog'lol ben' li'.

Na' inabia'gacho' loo yichjlall'do' yog'lol ben'
kwenche gak lo yell-lioni ka chazlalloo, kon ka
chak yabana'.

³ Ka nak daa choño' cheej chaonto' yog' lla,
bengachan naanlla.

⁴ Wxi'xen chento', ka chon neto' chzi'xennto' bit-
tezə dii choni ben' neto'.

Bi we'gacho' latj ibixnto' gonnto' daa bi nak wen,
san bislagach neto' lo ni'a na' dii mala'.

⁵ Na'ch che' Jesúza' legake':

—Inatezcho shi zoa to ben' nllaguile na' do chel
shajle lille'na' na' ye'lene': “Ben' bish'dawaa, ben'
shloll nad' shon yetxtil,

6 *la'* ba *bla'* *lilla'na'* to *ben'* *nllaguid'*, *zee zit'*, na' *bikzə bi de cha' wshabidee.*"

7 Na'ch *beena'* *yoo loolə lii inatie'* le': "Bi *gonzilo'* *nad' zed*, ba *nsejl'* *lillii na'* ba *delen'* *bi' cha'ki*. Aga *wak chas'* *gon'* *daa chyaljilo.'*"

8 Na' *nia'* le', *la'kzi nllagteile'ne'*, *bi chase'* *wi'ene'* *daa chnabile'ne'*. San *shi seyide'* *inabe'n*, *chen ki cheenile'* *chase'* *wi'e yog'* *daa chyaljile.*

9 Daan *nia'* le': *Li inabi Chioza'* *bin cheenile na' gone'n*. *Li yiyiljan na' willelkzilen*. *Li wtankw lee puerta'*, na' *wsaljkze'n*.

10 *La'* *beena'* *chnabile'* to *bi chnabile' ben'*, *cho'ene'n*; na' *beena'* *chiyilje' bi chiyilje'*, *chillelkzile'n*; na' *beena'* *chtankwe'* to *lee puert*, na' *chsaljkzgake'n*.

11 *Ka chak chele'* *nakle ben'* *chisgol chischoo bi'do'*, *ka inabi xiinlena'* le' *yetxtila'*, *aga we'leb'* to *yaj*. *Wa shi inabib'* le' to *bel gaob'*, *aga we'leb'* to *bel znia*.

12 *Wa shi inabib'* le' to *llit gaob'*, *aga we'leb'* to *bexjoni'*.

13 *Le' naktele ben'* *mal*, *chak we'le xiinleka'* *daa nak dii wen*. *¡Na' Xacho Chioza'* *zoa yabana'* *nakteche'* *ben'* *wench!* Na' *wi'e Espiritu Santo che'na'* *soe' loo yichjlall'do'* *yog' ben' inabe'ne'*.

Nagake' Jesúsza' chibeje' dii xiw'ka' kon yel' wak che Bezlona'

(Mt. 12:22-30; Mr. 3:19-27)

14 *Jesúsza'* *chibeje'* to *dii xiw'* *yoo to ben'* *bi chak inie'*, na' *ka bichejan na'ch gok binie'*. Na' *ben'ka'* *lle' na'*, *bibangakile'* *daa bene'*.

15 Na' *bale'* *che'gake'*:

—Kon yel' wak che Bezlona', daa chnabia' dii xiw'kan', chibeji beeni dii xiw'ka'.

16 Na' zi bale' wñabgakile'ne' gone' to yel' wak dii ile'gakile' kwenche wli'n shi Chioza'kzan bseleene'.

17 Na' ba nezli Jesúza' daa chza'lall'gake', na'ch chi'e legake':

—Shi ben'ka' lle' to yell gakgake' choplæ na' til-len ljwellgake', na' kwiayi' yella', shi naa. Na' lekzka' shi ben'ka' lle' toz yoo til-len ljwellgake', aga ssha soagake' toz.

18 Na' ka'kzæ Satanáza' na' dii xiw'ka' yoo lo na'yin, shi gakkakan choplæ na' kwiayi' yel' wñabia' cheyinna'. Nia' le' ka' daa nale yel' wak che Bezlonan* chibejid' dii xiw'ka' yoo ben'.

19 Shi chibej' dii xiwaa yoo ben' kon yel' wak che Bezlona', † ¿sheralæ ben'ka' nakle txen? ¿Alezkka' lennan' chibejlengake' dii xiwaa yoo ben'? Daa bi nakan ka', chli'n naklejljen.

20 Na' daa chibej' dii xiwaa yoo ben' kon yel' wak che Chioza', lennan' chli'n ba bla' yel' wñabia' che Chioza' ladjleni.

21 'Kat' to ben' wal nape' dii gonile' znia na' chape' lille'na', aga no gak lljtoyo dii de che'.

22 Per shi illin sto ben' walch til-lene'ne', na' gone'ne' gan, na'ch yigoyoe' yog' daa none' lez wñiaile', na' kwantie' yog' daa yoo loo lille'na' na' wi'e lat' wej che ben'ka' nakgake'ne' txen.

23 'Beena' bi nake' nad' txen, chakzbanile' nad'. Na' beena' bi chaklen kwenche wzenag ben' cho'a xtill' Chioza', len' chsej chllone' wzenaggake'n.

* **11:18** Bezlonan': lekzannan' Beelzebú de xtil na' nakan sto le Satanáza'. † **11:19** Bezlona' : lekzannan' Beelzebú de xtil na' nakan sto le Satanáza'.

*Chillin dii xiwaa sto shii gana' bichejan**(Mt. 12:43-45)*

²⁴ 'Kat' chichej to dii xiw' dii yoo beñ', na' ch-jadan ga bibi dekzə na' chyiljan gana' yizi'lalliin. Na' shi bi chllelin gana' yizi'lalliin na'ch chakin: "Yiyaachkz' dii yoblə gana' bichejkz'."

²⁵ Na' ka chillinan gana' bichejan, nakan ka to loo yoo dii nxi nloa na' nakan xochi.

²⁶ Na'ch chza'n chjxi'n zi gall dii xiw'ka' daa nakch dii malch aga ka len, na' yogaan choogakan beena'. Na' chaktechlə mal che beena' aga ka gok che' dii nech.

Chakomba beena' chzenag cho'a xtill' Chioza'

²⁷ Na' shlak che' Jesúza' ka', to noolə zie' ladj beñ'ka' lle' na' wnie' zilljə, chi'e:

—jChakomba noola' wxane' li' na' bwall bxope' li'!

²⁸ Na' che' Jesúza'ne':

—jMbalazch beñ'ka' chzenaggake' cho'a xtill' Chioza' na' chongake' ka nan!

*Beñ'ka' bi chajle' che Jesúza' wñabgake' wli'e to yel' wak**(Mt. 12:38-42; Mr. 8:12)*

²⁹ Na' bdi'a bllagch beñ'ka' kwit Jesúza' na' golle' legake':

—Le' zoale naa, nxinj yichjlall'do'leka'. Chñable wliid' le' to yel' wak, na' aga wliid' le' daa cheenile. Lete ile'ile to dii nak ka yel' waka' daa ben Chioza' che dii Jonáza'.

³⁰ Daa gok che Jonáza' bli'n yel' wak che Chioza' lao beñ' Níniveka'. Kakzə nad', Beñ' Bsel' Chioza' Yell-lioni, wli'a yel' wak che Chioza' laolena', le' zoale naa.

³¹ Na' llana' wchoglo Chioza' che ben', na' yiban noola' wñabia' do lli'lə, na' gawe' xya chele lao Chioza', le' zoale naa, ine' chiya' sak'zi'le. La' noola', zit' wal wzee bidzenague' dill' sin'na' daa be' dii Salomónna', na' nad' zoa' ni, nak' ben' zak'chi ka dii Salomónna', na' bi chzenagle cha'.

³² Na' lekzka' llana' wchoglo Chioza' che ben', na' yiban ben' Níniveka' na' gaogake' xya chele lao Chioza', le' zoale naa, inagake' chiya' sak'zi'le. La' legake' biyaj bileni saaxya che'ka' ka be'len Jonáza' legake' cho'a xtill' Chioza', na' nad' zoa' ni, nak' ben' zak'chi ka dii Jonáza', na' bi chzenagle cha'.

*Jalaochona' nakan ka to yi' che kwerp chechona'
(Mt. 5:15; 6:22-23)*

³³ Na' lekzka' chi'e legake':

—Biga zoa ben' chxene' to kandil na' chzoe'n to ga ngash' wa wdoseen to dii wkwashaan len, san chzoe'n sibə kwenche ile'i ben'ka' sho' loo yooná'.

³⁴ Jalawo'ka' nakan ka to yi' che kwerp cho'na'. Shi jalawo'na' nakan wen, doxen kwerp cho'na' zoan lo beeni'na'. San shi bi chle'i jalawo'na', kwerp cho'na' zoan lo yel chola'.

³⁵ Na' bsak' wze wneyi kwenche ki lwaa to' lo beeni'na', tazo' lo yel chola'lə.

³⁶ Shi doxen kwerp cho'na' yoon beeni', na' ni to dii shgasj shcho' bi yoon, na' ile'ilo' kwaslo' ka chle'ilo' kat' ze to yi' chzeeni'n doxen.

*Jesúza' chsheshlene' fariseoka' na' ben'ka' chli'
chsedí leya'*

(Mt. 23:1-36; Mr. 12:38-40; Lc. 20:45-47)

37 Na' ka biyoll be' Jesúza' dillaa, na' bche' to fariseo le' lljtawe' lille'na'. Na' wyoo Jesúza' lille'na' na' wchi'e cho'a mesa'.

38 Na' farisewa' bibanile' ka ble'ile' bi bina' Jesúza' ka yoologake' chongake' ka zi' gaogake'.

39 Na'ch che' Xancho Jesúza'ne':

—Le' fariseo nakle ka xig' yeen dii nyib xise' tcho'a tlawin na' lo'inna' besjan. Chaki ben' le ben' wen nakle, len le' chibaile chkaale bi de che ben' na' chibaile chonle bichlə dii mal.

40 ¡Le' ben' bi nteyi! ¿Abi chakbe'ile Chioza', beena' ben kwerp chechoni, lekze'n bene' yichjlall'do'choni?

41 Li izani bi de chele, li we'n ben' bibi de che', na'ch yixi' yiyech yichjlall'do'lena'.

42 'iNyesh'laz gak chele, le' fariseo! Choe'le Chioza' lat' wej‡ no yixwej, no kwanirod na' bichlə yix' kwan dii mbekle. Na' bi chonle daa nak shlichá na' bi chakteile' Chioza'. La' daayen'an llialach gonle per lekzka' bi wsanle kwejle daa chnab Chioza'.

43 'iNyesh'laz gak chele, le' fariseo! Le chibaile kwe'le gana' chbe' ben'ka' zakii gana' chdop chllagcho choe'lwillcho Chioza', na' cheenile yog' ben' kwee le' balaan ga lle' lla' ben'.

44 'iNyesh'laz gak chele, daa nakle ben' wxiye'! Nakle ka to ba che ben' wet dii bi nla' lawinna' dii bi chle'i ben' na' chaj chdegake' lawinna', ni bi chakbe'gakile' bin naki loolə.

45 Na'ch to beena' chli' chsedi leya' golle' Jesúza':

—Maestro, daa no' ka' len neto' chzoazi'yoo.

46 Na' goll Jesúza':

‡ 11:42 Lat' wej: literalmente la décima parte.

—ǝLekzka' nyesh'laz gak chele, le' chli' chsedile leya! Dii zan dii che'le ben' chiyal' gongake', na' nakan ka to yoa' xen dii chwa'le legake' dii kono soyi, na' le' bikz bi chda na'le kwenche gaklenle legake'.

47 'ǝNyesh'laz gak chele! Le' chonshao'zle cho'a ba che dii ben'ka' wdixjee daa goll Chioza' legake', ben'ka' bet dii xozxto'leka'.

48 Na' daa chonle ka' zevin chonle txen dii xozxto'leka' ka nak daa bengake'. La' legaken' betgake' ben'ka', na' le' chonshao'le cho'a ba che'ka'.

49 'Na' daan, lo yel' sin' che Chioza' wne': “Wselaa ben' chixjee daa yeppee na' len ben' wi'e cho'a xtillaana', na' bale' witgake' na' zi bale' biya dii gongakile'ne'.”

50 Na' le' zoale naa, lenle ile'ile ka yel' zi'na' ile'i ben'ka' blalj xchen dii ben'ka' wdixjee daa goll Chioza' legake', wzolozan ka wxe wzil yell-lioni.

51 Le' zoale naa, lenle chido'le sak'zi'le ni che yel' wit che dii Abela' axt dii Zacaría'za', beena' betgake' cho'a yoodo'na' kwit gana' chzeygake' bayix'ka'.

52 'ǝNyesh'laz gak chele, le' chli' chsedile leya! La' nazle chsedile ben' che Chioza', per ni le' bi cheenile wzenagle daa nan, na' chllontele shajni ben'ka' chzenagan.

53 Na' ka goll Jesúza' ka', ben'ka' chli' chsedi leya' na' fariseoka' zizikli bllaagake' na' wzologake' chongakile'ne' zed wal wñabgakile'ne' chiya dii nak lallj,

54 goklall'gake' we' Jesúza' dill' dii wchixa'n le'.

12

Dill' wxiye' che fariseoka' zaklebin levadúrana'

¹ Na'ch bdop bllag ben' zan inleeb gana' zoa Jesúza' axt chdakw ljjwellgake', na' wzoloe' zigaate be'lene' ben'ka' nakgake'ne' txen dill', chi'e:

—Wsak'gale bi shajle'le dill' wxiye' che fariseoka' daa zaklebi levadúrana'.

² La' daa kono nezi naa, wllin lla inezi beanaan, na' yog'lol daa ngash' naa, wllin lla ila' lawin.

³ Na' yog' daa chakile kono beni daa wnale, wllin lla inezgakile'n. Na' daa wnale ka yoole loola nsejshoshle yoona', axt gosya'i ben' wzie'n dill'.

Beena' chiya' illebcho

(Mt. 10:26-31)

⁴ 'Le' nllaguid', nia' le' bi illeble ben'ka' witgake' le', la' kachokzan zeelo gak gongakile' le'.

⁵ Per ni inia' le' non chiya' illeble: li illeb Chioza', la' ka yiyoll yikee yel' mban chelena' lezkza' nape' yel' wñabia' wzalee le' lo yi' gabi'a'. Len', li illeb.

⁶ 'Nezicho wak si'cho gay' byindo' kon chop sintabdo'. La'kzi aga bitek zak'gakb, ni tob bi mbej yichj Chioza'.

⁷ Na' ka'kzə le', axt to to yish' yichjlēna' mbab. Na' bi illeble, la' zak'chle aga ka zan byindo'ka'.

Ben'ka' chchebgake' nakgake' Crístona' txen

(Mt. 10:32-33; 12:32; 10:19-20)

⁸ 'Na' nia' le', beena' wcheb lao ben' nake' nad' txen, lezkza' nad', Ben' Bsel' Chioza' Yell-lioni, wi'a dill' lao yog'lol anjl che Chioza', yepgakee beeni nake' nad' txen.

9 San beena' bi w_{ch}eb nake' nad' txen, lekzka' nad', wi'a dill' lao yog'lol' anjl che Chioza', yepga-kee beeni bi nake' nad' txen.

10 'Na' beena' biz gon ina cha', nad', Ben' Bsel' Chioza' Yell-lioni, wizi'xen Chioza' che', san beena' ine zban che Espíritu Sántona', aga wizi'xen Chioza' che'.

11 'Kat' lljwa'gake' le' lao ben'ka' ch_nabia' gana' chdop chllagcho choe'lwill-cho Chioza', wa lao ben' ch_hogbia' che ben' wa lao jos_{ch}is, bi sele w_neyi nakl_ə yilliile cho'a xtil' ben'ka' wa bin inale.

12 La' kat' inele, Espíritu Sántona'kzan wzajniile' le' daa chiya'l' inale.

Dii nxolla' nsa' yel' wni'ana'

13 Na' ladj ben'ka' ndop nllag w_ne to ben', golle' Jesúza':

—Maestro, gollgach ben' bishaana' gone' daa chidol' ikaa che dii xanto'na'.

14 Na' che' Jesúza'ne':

—¿Nora bzoa nad' ladjleni ka to ben' chon yel' jos_{ch}is che ben' wa ben' chl_{aa} bi dii de che ben'?

15 Na' lekzka' chi'e:

—Li wsak' kwen_{che} bi selall'le gat'ch bi gat' chele, la' aga dii kan' llialo lo yel' mban chelena'.

16 Na'ch bzoe' to jempl, chi'e legake':

—Wzoe to ben' wni'a na' dii zan bizi' bilape' lo yell-lío che'na'.

17 Na'ch chakile': “¿Nakra ka gona'n naa? Biga de kooshawaa dga bizi' bilap'.”

18 Na'ch wne': “Ba nezid' bi gon'. Yichinj' yoona' gana' chgooshawaa daa chizi' chilap' na' yiyona'n dii xench, na' kooshawaa daa bizi' bilap' na' bichl_ə dii de cha'.

19 Na'ch zan yiz yizia' banez che daa ngooshawaa, na' yizi'lallaa na' yeej gaw', na' soa' mbalaz.”

20 Na' goll Chioza'ne': “Li', beñ' bi nteyi, ñaanlle' gueto' na' daa ngooshawoo, nola cheyi gakan.”

21 Kan' gak che beena' chtop chshag yel' wni'ana', na' bibi zakee lao Chioza'.

Chioza' chap chwie' beñ'ka' nak xiñe'

(Mt. 6:25-34)

22 Ka wde dga, Jesúza' golle' beñ'ka' nakgake'ne' txen:

—Ñaa nia' le': Bi sele wñeyi che daa yeej gaole, ni bi sele wñeyi che xalaanlena'.

23 La' zak'techlə yel' mban chelena' aga ka daa yeej gaole, na' zak'tech xkwerplena' aga ka xalaanlena'.

24 Li wwiakachi bechjka', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Chioza' legakb. Na' le', ñaa, zak'techle aga ka bado'ka' ze lo llazə.

25 Ni tole bi gak yischoochle yel' mban chelena' ni zi tgor la'kzi nall inleeb selen wñeyi.

26 Shi dga nak diido'zə bi chak gonlen, ¿berache zezle wñeyi che bichlə dii yoblə?

27 Li wwiakachi ka chgol yejdo'ka', len aga bi llin chongakan ni bi cholgakan do. Na' nia' le', ni Salomónna', beena' wdapchga yel' shao'ka', bi bllin gak xe'na' xochi ka yejdo'ka'.

28 Shi Chioza' none' xochi yejdo'ka' ze lyixaa, la'kzi xtitchgan mbanan na'ch wtop beñ' len wlli'en lo yi'na', ¿alechlin ki gone' chele, la'kzi bitek chajle'le gaklene' le'?

29 Na' daan bi setekle wneyi ga sa' daa yeej gaole.

30 La' ben'ka' bi nonlilall'gake' Chioza' to daazə chinogake'. Per le', Chioza' nake' Xale, na' nezile' chyalljilen.

31 Li se wneyi wzenagle che Chioza' kwenche inabi'e le', na' gonkze' yog' daa chyalljile.

Yel' shao' daa de yabana'

(Mt. 6:19-21)

32 'Bi illeble. La'kzi bi nyanle, Xacho Chioza', yel' ben' wen che'na', chaklallee yillinle inabia'lenlene' gana' chnabi'e.

33 Li wit' wde bi de chele, na' li gaklen ben' bibi de cheyin. Shi ka' gonle, na' gat' yel' shao' chele dii bi te cheyin yabana' gana' bi gak kwan wbanna'n, ni bi iteban.

34 Na' gana' de yel' shao' chelena', na'kzan se yichjlall'do'lena' wneyi.

Chiyal' se kwascho ka yiyed Jesúsza'

35-36 Na' lekzka' chi'e legake':

—Li gakto ka wen llinka', ben'ka' chbezgake' xane'ka' yilline' daa zeje' to ga chak wishagna'. Na' toshiizi chi'gake' chbezgake'ne' na' nox'tegake' yi' che'ka' kwenche kate wtankwe' lee puerta' lii wsaljtegake'n.

37 Chakomba wen llinka' chbezgake' kat' yillin xane'ka', la' dii li nia' le', kwine' kweke' legake' cho'a mesa' na' wi'e dii gaogake'.

38 Chakomba ben'ka' chbezgake' yillin xane'ka' la'kzi yilline' do chel wa do zbalzə.

39 Na' chiyal' shajniile dga, shel'ka' to xan yoo inezile' bi gor illin wbanna' lille'na', wbe'noe'ne' na' bi wi'e latj sho'e lille'na' kwane'.

40 Ka'kzan le' chiyal' sele wñeyi toshiizi kwezle nad', Ben' Bsel' Chioza' Yell-lioni, la' tokonganzə yiyed'.

*Wen llinna' chon wen na' beena' bi chon wen
(Mt. 24:45-51)*

41 Na'ch wñabi Pédróna' Jesúza', chi'ene':

—Xan', ¿ato neto'zan no' ka', anti che yog' beñaan no' ka'?

42 Na'ch goll Xancho Jesúza':

—¿Nakra chakile chon to wen llin wen, ben' nezi nak gone' llinna', shi xane'na' gone' lall' nee yog'te ben'ka' zoa loo yoo lille'na' kwenche wweej wwawe' legake' gor cheyin?

43 Chakomba wen llinna' chilalile' chone' daa nak lall' nee ka yillin xane'na'.

44 Dii li nia' le', xane'na' gone' lall' nee yog'lol dii de che'.

45 Na' shi wen llinna' gakile': “Akza naa yila' xan'na'”, na'ch soloe' gonile' zban wen llinka' sto, ka nool ka ben' byo, na' soloe' yeej gawe' na' sollile'.

46 Na' tokonganzi yillin xane'na' llana' bi none' lez, na' wdie'ne' to yel' zi' wal kon ka ba nchogloe' gak che ben'ka' bi chongake' daa chiyal' gongake'.

47 'Ben' wen llinna' nezi bin cheeni xane'na' gone', na' bi chone'n ni bi zie'n wñeyi, na' wit chinchga xane'na' le'.

48 Per beena' bi nezi bin cheeni xane'na' gone', na' chone' dii chonan ka wsak'zi' xane'na'ne', agalə wsak'zi'teke'ne'. La' beena' be'lenyenee dill' nakan gone', chonan byen gonyenēe ka bzajniile'ne'. Na' beena' ba bene' lall' nee gone' dii zan dii cheenile'

gone', chonan byen gone' yog'lo_lte diika' bene' lall' nee.

Gak ben' choplə ni che Jesúza'

(Mt. 10:34-36)

⁴⁹ 'Daa bid' yell-lioni nakan ka inacho yin' bidxen'. Na' cheenchgaid' shel' naate ba chal'ninan.

⁵⁰ Biya dii yen ile'id', na' le ba chakyeshid' axt ni illini llana'.

⁵¹ ¿Achakile bid' yell-lioni kwenche gon' ka soalen ljwell ben' mbalaz? Aga kan', san daa bid' illaa ljwellgake' na' gakgake' choplə.

⁵² La' naa, shi to yoo lle' gayee, na' gakgake' choplə, shone' til-lengake' ben'ka' chop, na' ben'ka' zi chop til-lengake' ben'ka' zi shonə.

⁵³ Xa bi' byona' til-lene'b', na' leb' til-lem' xabaa. Na' xna' bi' noola' til'lene'b', na' leb' til-lem' xna'baa. Na' noola' til-lene' xoolille'na', na' xoolille'na' til-lene' le'.

Bi chajni'gakile' bi zejin daa chon Jesúza'

(Mt. 16:1-4; Mr. 8:11-13)

⁵⁴ Na' lezkka' che' Jesúza' ben'ka' lle' na':

—Kat' chle'ile ziza' beja' gana' chxoalə wbillə, lii natele: “Wakə yeja”, na' kayen' chak.

⁵⁵ Na' kat' chde be'na' daa za' lli'lə, na' nale: “Le zey'chga yizak”, na' kayen' chak.

⁵⁶ ¡Le' ben' wxiye! Kat' chle'ile bin chak xan yabana' na' lo yell-lioni nezile beran gak. ¿Biçhe bi chakbe'ile bin zeji daa chon Chioza' llaki zoacho naa?

Chiyal' yiyoe'xencho ben'ka' chao xya checho

(Mt. 5:25-26)

57 '¿Biçhe ki chiyilje to kwinzle daa nak dii li dii shao'?

58 Shi no chao xya çhele na' wçhi'e le' lao joschiska', li gon byen yiyoe'xenlene' tneza'. La' shi lljwee le' lao beena' chçhogbia' che beñ', na' le' gone' le' lo na' beena' wseje' le' lillyana'.

59 Na' nia' le', aga wichejle lillyana' axt ki çhixjle doxen daa chiyal' çhixjle.

13

Chiyal' yiyaj yilenicho dii malka' choncho

1 Na' lo llana'tezə bllin bal beñ' lao Jesúza' gollgake'ne' ka ben Pilátona' bene' mandad betgake' bal beñ' Galiléaka' ka chitgake' bayix'ka' choe'la'ogake' Chioza'. Na' xçhene'ka' biyakan toz kon xçhen bayix'ka' betgake'.

2 Na' che' Jesúza' legake':

—¿Achakile beñ' Galiléaka' betgake' nakçhgake' beñ' malch aga ka nochlə beñ' wlall çhe'ka'?

3 Nia' le' bi nakan ka'. Shi le' bi yiyaj yilenile dii malka' chonle, lezkka' yog'le kwiayi'.

4 Shera beñ' Jerusalénka' shin'shonə, beñ'ka' wit daa bdakwgake' yoo siba' daa zoa Siloéna', ¿achakile' napçhgake' dol' aga ka beñ' wlall çhe'ka'?

5 Nia' le' bi nakan ka'. Na' shi le' bi yiyaj yilenile dii malka' chonle, lezkka' yog'le kwiayi'.

Jempl çhe yag yixwewa' daa bi wllia

6 Na'ch bzoa Jesúza' to jempl, chi'e beñ'ka':

—To beñ' zoa to yag yixwew lo yell-lio çhe'na' gana' naze' yag uvaka', na' wyaje' jawie' shi llian yixwewa', na' ka blline' ni tlish' bi llian.

7 Na'ch chi'e beena' chap yell-lío che'na': "Ba gok shon̄ yiz chidwia' shi llian yixwewa', na' ni to bibi chbian. Bchogchoklan, la' nlan̄chokzan yell-lioni."

8 Na' beena' chape' yell-lío che'na' chi'e: "Xan', zi' zoashkin zi twiz na' wcheen' xaninna' na' wlla'n ben'na'.

9 Shera shicholə wbian. Na' shi bi wlliakzan, na' wchogo'n."

Biyon Jesúza' to noolə llana' chombaan̄ ben' Israelka'

10 Na' to lla sabd, llana' chombaan̄ ben' Israelka', chli' chsedi Jesúza' ben'ka' chdop chllag gana' choe'lwilgake' Chioza'.

11 Na' len to noolə ba gok shin̄'shon̄ yiz nlew̄ dii xiwaa le', na' bichkzə gok yizie' shli.

12 Na' ka ble'i Jesúza'ne' wnie'ne' na' golle'ne':
—Noolə, ba bikwas yillwe' cho'na'.

13 Na'ch bxōa neena' koll' noola' na' katena' lii bizetie' shlich̄a, na' wzoloe' choe'lawee Chioza'.

14 Na' beena' chgoo x̄nezi cheyi diika' chongake' gana' chdop chllaggake' bllee daa biyon Jesúza' noola' llana' chombaangake', na'ch chi'e ben'ka' lle' na':

—De x̄op lla goncho llinna', na' bittezə llaka' yidle kwenche yiyakile, na' bi gonle lez yiyakile' llani chombaan̄cho.

15 Na'ch che' X̄ancho Jesúza' legake':

—Le' ben' wxiye', ¿abi wsell-le goon̄ cheleka' wa burr cheleka' lljaweejlegakb nisa' llani chombaan̄cho?

16 Nooli nake' xiin̄ dia che dii Abrahama', na' ba gok shin̄'shon̄ yiz Satanáza' daa chñabia' dii xiw'ka'

nonan le' ka ben' ncheje'. ¿Ana' chakile bi nakan wen biyonee llani chombaanchó?

17 Na' ka goll Jesúza' ka', yog' ben'ka' chakzban-gakile'ne' biyii bido'gakile', na' yog' ben'ka' sto bibagakile' daa ble'gakile' yel' wakka' chone'.

Jempl che sa mostásana'

(Mt. 13:31-32; Mr. 4:30-32)

18 Na'ch wna Jesúza':

—¿Nakra ka nak yel' wñabia' che Chioza', lla? Na' ¿bera ka wsaklebida'n?

19 Zaklebin sa mostásana' daa goz to ben' lo yell-lio che'na', na' ka bla'n na' bgolan gokan to yag xen na' axt byindo'ka' ben lillbka' lo xoziiinna'.

Jempl che levadúrana'

(Mt. 13:33)

20 Na' lekzka' chize' Jesúza':

—Dga sto wsaklebida'n yel' wñabia' che Chioza'.

21 Zaklebin levadúrana' daa chchix to noolə shoṇa rob yezj kwenche yisgolan kwa che yetx-tila'.

Chiyal' sho'cho puertdo'naz

(Mt. 7:13-14, 21-23)

22 Shlak ziyaj Jesúza' Jerusalénna', bidie' yell yelka' na' yelldo'ka' na' bli' bsdile' ben'.

23 Na' bchej to ben' wñabile'ne', chi'ene':

—Maestro, ¿ato chopchga ben' yila bi kwiayi'gake'?

Na'ch che' Jesúza'ne':

24 —Li gon byen sho'le cho'a puert daa nak diido'zə kwenche soalenle Chioza'. La' ben' zan gaklall'gake' sho'gake'n, na' bi gak sho'gake'.

25 Na' ka solla' xan yoona' wseje' puerta', na' le', igaanle cho'a puerta' wtankwle le'inna' na' ye'lene': "Ben'do', bsaljgach kwenche sho'nto'." Na' xan yoona' ine' le': "Bi nombi'a le' ni bi nezid' ga ben' le'."

26 Na'ch ye'lene': "Weej wdaolennto' li' txen, na' bli' bsedilo' neto' yell chento'na'."

27 Na'ch ine' le': "Bi nombi'a le', ni bi nezid' ga ben' le'. Li lljayaak do na'lə yog'lole le' ben' wen dii mal."

28 Na' kwellchgale axt gaoxaxj leylena' daa le gak-shejlall'le ka ile'ile dii Abrahama', dii Isaaca', dii Jacoba' na' yog' dii ben'ka' wdixjee daa goll Chioza' legake' lle'gake' yabana' gana' chnabia' Chioza', na' le', bi gok yiyoole.

29 Na' wde wdeli ben' lle' zbii zkaan yell-lioni yillingake' yabana' gana' chnabia' Chioza' na' kwe'gake' gaogake'.

30 Na' bal ben' bi nak ben' zakii naa gagkake' ben' zakii, na' ben'ka' nak ben' zakii naa bich gagkake' ben' zakii.

*Wchell Jesúza' ni che ben' Jerusalénka'
(Mt. 23:37-39)*

31 Na' lo llana'tezə bllin bal fariseoka' kwit Jesúza' na' che'gake'ne':

—Biyaj gan yoblə. Cheeni Heródeza' wite' li'.

32 Na' che' Jesúza' legake':

—Li yiyaj na' li lljayell ben' wxiye'na': "Nin soa' to chop shon lla kwenche yibej' dii xiw'ka' yoo ben' na' yiyon' ben' bi shao', na' sheelo diika' chon'."

33 Chonan byen kooch' nez naa, wxə len willj kwenche yiyaa Jerusalénna' gana' chitgake'

ben'ka' chyixjee daa che' Chioza', la' agagan' witgake' legake' gan yoblə.

³⁴ 'iLe' ben' Jerusalén, chitle ben'ka' chidtxjee daa che' Chioza' legake', na' yaja' chitile ben'ka' chselee choe'gake' cho'a xtilleena! Dii zan shii goklallaa yitop' le' ka chon jeda' chiyellb xiindobka' xan xilba', na' le' bi goonile'.

³⁵ Li koo yichjle dga inia' le', Chioza' kwey yichje' gani zoale. Na' nia' le', aga wle'chile nad' axt kat'ch illin lla inale: “iGaklenshga Xancho Chioza' beeni ba bselee!”

14

Jesúza' biyone' to ben' yo'e yi

¹ To lla sabd, llana' chombaan ben' Israelka', wyaj Jesúza' jtawe' lill to fariseo, ben' chnabia', na' fariseoka' sto china' chinogake'ne'.

² Na' lawe'na' ze to ben' yo'e yi.

³ Na'ch Jesúza' wnable' fariseoka' na' ben'ka' chli' chsedi leya', chi'e legake':

—¿Ade lsens yiyoncho to ben' bi shao' llani chombaancho, anti bi den?

⁴ Na' legake' bikzə bi gollgake'ne'. Na'ch Jesúza' bexee beena' yoo yina' na' biyone'ne', na' golle'ne':

—Wak yiyajo'.

⁵ Na'ch chi'e fariseoka':

—Shi to burr chele wa to goon chele ixopb to loo yech to lla chombaancho, ¿abi yibejleb katena' la'kzi nakan llana' chombaancho?

⁶ Na' bikz bi billet-lall'gake' ye'gake'ne'.

Ben'ka' chaxgake' to ga chak wishagna'

⁷ Na' ble'i Jesúza' ka chon beṇ'ka' wdaolene' lill farisewa', wche'gake' gana' chbe' beṇ'ka' zakii. Na'ch bseese to jempl, chi'e legake':

⁸—Kat' no gax le' to ga chak wishagna', bi kwe'le gana' chbe' beṇ'ka' zakii. La' shera shi ila' beṇ' zak'chi ka le',

⁹ na' beena' goxe' le' ine': “Wzolla' kwenche kwe' beeni gani chi'o.” Na'ch do chido'zile yizolla'le na' lljache'le xanteyin.

¹⁰ Na' bi gonle ka'. San kat' no gax le', chiyaḷ' lljche'le xanteyin kwenche kat' ila' beena' goxe' le' na' ine': “Bish'dawaa, nilə wda kwi'o gani zak'chi.” Na' ka' sho'le balaan lao beṇ'ka' chi'lenle cho'a mesa'.

¹¹ La' beena' chon kwine' beṇ' choo beṇ' xen, Chioza' gone'ne' beṇ' bibi zakii; na' beena' chakile' bibi zakee, Chioza' gone'ne' beṇ' choo beṇ' xen.

¹² Na' lekzka' che' Jesúza' beena' goxe'ne' lille'na': —Kat' cheenilo' wwawo' beṇ', bi gaxo' beṇ' zoalenzo' wen, no beṇ' bishoo, no beṇ' dialla cho', ni no beṇ' wlill cho', beṇ' nake' beṇ' wni'a, la' legake' lekzka' wak yigoogake' wzonna' yiwaogake' li' ka beno' chegake'.

¹³ Aga kan' gono', san byi beṇ' yesh', beṇ' net ni'a nee, beṇ' bi chak sa' wen na' beṇ' lchoḷ. Beṇ'kan' chiyaḷ' gaxo',

¹⁴ na'ch so' mbalaz. La' beṇ'kan' aga wak yigoogake' wzon cho', san Chiozan' yigwee wzon cho'na' llana' kat' yisbane' beṇ' wenka' ladj beṇ' wetka'.

Jempl che to beṇ' ben to lni xen

¹⁵ Na' to beena' chi'lene' Jesúza' cho'a mesa', ka benile' wne' ka', na' chi'ene':

—¡Chakomba ben'ka' lljadaogake' gana' chñabia' Chioza!

¹⁶ Na'ch che' Jesúza'ne':

—Wzoa to ben' bene' to lñi xen, na' goxe' ben' zan kwenche shajgake' lille'na' lljtaogake'.

¹⁷ Na' ka gol' gaogake', bselee to wen llin che'na' jelle' ben'ka' ba bye': “Li dagach, la' ba gok daa gaocho.”

¹⁸ Na' yog' ben'ka' janie' wzologake' chche'gake' dill'. Toe' golle'ne': “Zi' bizi'a lat' yell-lio na' chonan byen lljawia'n. Ye'gacho'ne' si'xene' bi gak yid'.”

¹⁹ Na' beena' sto chi'ene': “Zi' bizi'a gay' kwe' goon na' chonan byen wwia' shi wak gaangakb. Ye'gacho'ne' si'xene' bi gak yid'.”

²⁰ Na' beena' sto chi'ene': “Zi' bshagna', na' bi gak yid'.”

²¹ Na'ch biza' wen llinna' jayelle' xane'na' yog' daa goll ben'ka' le'. Na'ch blaa xane'na' na' chi'e wen llin che'na': “Lobe' jta lyell na' bche' kon no ben' yillago', no ben' yesh', no ben' net ni'a nee, no ben' lchol, na' no ben' bi chak sa' wen.”

²² Na' ka jasane' ben'ka' jatope', na'ch chi'e xane'na': “Xan', ba ben' ka wno', na' ni dech latj sho' ben'.”

²³ Na'ch che' xane'na': “Wyaj do yawi nezka' na' ben byen yid ben'ka' yillago' kwenche yilla' loo lilla'ni.

²⁴ Na' nia' le', ka nak ben'ka' bya' dii nech, ni toe' bi gaogake' daa ba bsini'a.”

Yel' zak'zi'na' yen ile'icho ni che Jesucristona'

²⁵ Ben' zan zjanogake' Jesúza', na'ch biyechje' chi'e legake':

26 —Shi nole cheeni gakle nad' txen, chiyaḷ' gakhile nad' aga ka xaxna'le, xool-le, xiinle, beṅ' bish'le, beṅ' zanle, na' axt yel' mban cheḷena'. Shi bi gakile' nad', aga wak gakle nad' txen.

27 Na' lekzka' beena' bi chzanile' yel' mban che'na', gakhittezə dii gakhche', kwenche gone' daa chazlallaa, aga wak gake' nad' txen.

28 Shi nole cheenile gonle to yoo sib wal, zigaate chiyaḷ' wwiale ka'k' gaki na' shi waki xmechlena' sheeloin.

29 La' shi ba wlekwle leninna' na' tena' bich bi de wzeeloilen, na' yog' beṅ'ka' ile'gakile' bi biyollan wxillgakile' le'.

30 Na' inagake': "Kon wdishj beena' len yoona' na' bi goki xmeche'na' wzeeloe'n."

31 Na' ka'kz to beṅ' wṅabia', shi cheenile' til-lene' sto wṅabia' yoblə, na' lekzka' chiyaḷ' wsakee shi wzoi shi mil beṅ'ka' nape' til-lengake' beena' nap galja mil beṅ'.

32 Na' shi gakhbe'ile' bi soi beṅ'ka' nape', na' zi' illinlə beṅ' wṅabia'na' sto, wselee to chop beṅ' lljell-gake'ne': "Bizə tilcho."

33 Na' ka' le', shi bi choonlall'le yog' dii de chele, aga wakə gakle nad' txen.

Kat' bich xzi' zedaa
(Mt. 5:13; Mr. 9:50)

34 'Zedaa nakan dii wen, na' shi bich xzi'n aga wakch yiyonchon xzi' dii yoblə kwenche wchinchon.

35 Ni bi gakh wchinchon lwaa beṅ', san choonchon. Na' le' chenile dga nia', li sen wneyi.

15

Jempl che xilaa wnit

(Mt. 18:10-14)

¹ Yog' beŋ' wiçhixjka' na' beŋ' saaxyaka' jabig'gake' kwit Jesúza' kwenche bzenaggake' dillaa cho'e.

² Na' fariseoka' na' beŋ'ka' chli' chsedi leya' wzologake' biz chon chnagake' che Jesúza', che'gake':

—Chlebtezə beeni beŋ' saaxyaka' na' chaolenteze' legake'.

³ Na'ch bzoa Jesúza' to jempl, golle' legake':

⁴ —Shi tole napple to guiyoa xil' na' nit tob, na' wkwaanle baka' taplalj twalj lyixaa na' lljadiljle bana' wnit, na' axt kon ka yillelb gonle.

⁵ Na' ka yillelb, yibaile yixoaleb yaaxizlena'.

⁶ Na' ka yillinle lill-lena' wtope beŋ'ka' nllaguile na' beŋ' wlill cheleka', na' ye'le legake': “Li yibaleni nad', la' ba billeg xil' cha'na' bana' wnit.”

⁷ Na' nia' le', ka'kzan chibayi Chioza' len anjl che'ka' yabana' kat' to beŋ' wen dii mal chiyajile' saaxya che'na' aga ka taplalj twalj beŋ'ka' bi chonan byen yiyajgakile'.

Jempl che mecha' wnit

⁸ Wa shi to noolə de shi mech plat che' na' nit ton, na' wxene' yi' che'na' na' wloe' loo lille'na' na' yiyilje'n axt ki yillelile'n.

⁹ Na' ka yillelile'n na' wtope' noolka' nllaguile' na' beŋ' wlill che'ka', na' yee legake': “Li yibaleni nad', la' ba billeg mech cha'na' daa wnit.”

¹⁰ Na' nia' le', ka'kzan chibayi Chioza' len anjl che'ka' kat' chiyaj chileni to beŋ' saaxya.

Jempl che bi'na' benditj xmech xabaa

11 Na' lekzka' che' Jesúza' legake':

—To ben' wzoa chop xiine',

12 na' bi' neshaa gollb' xabaa: “Xa, bla daa de cho' na' ben nad' daa chiya' ikaa.” Na'ch bla xabaa daa de che' na' bi'en legakb'.

13 Na' aga wlla, biyit' bide bi' neshaa daa bi'eb', na' mecha' daa be'x'b' cheyin wyajlema'n to yell zit' na' jenditjba'n na' jem' kon daa nazan cheb'.

14 Na' ka biyoll benditj xmechbaa wche' to wbin xen yella' gana' chdab', na'ch wzolo chdeb' wbinna'.

15 Na' wyajb' janabb' llinna' gom' lao to ben' yella' gana' chdab', na' beena' bseleeb' lyixaa gana' nlee kushka' kwenche jtapb' legakb'.

16 Na' daa le chdom' goklall'b' gaob' daa chao kushka', na' ni len bi be'gake'b'.

17 Na' gokib': “Ben' zan wen llin che xa'na' lle' na' chichoonzan dii cheej chaogake', na' nad', ba chetid' wbinni.

18 Ba ziyaachoklā kwit xa'na' na' yepee: Xadawaa, ba bxinj' blen' lao Chioza' na' lawo'na'.

19 Bich chido'laa gak' xiino', san beni nad' ka nottezə wen llin cho'ki.”

20 Na'ch biza'b' ziyajb' lill xabaa.

'Na' zi dii xench yillim' lillbaa ble'i xabaa leb' na' biyesh'lallile'b'. Na'ch zejdoe' jatile'b' na' wdele'b' na' bnop'e'b'.

21 Na'ch che'b' xabaa: “Xadawaa, ba bxinj' blen' lao Chioza' na' lawo'na', bich chido'laa gak' xiino'.”

22 Na' xabaa chi'e wen llin che'ka': “Lobe'zə li lljlej tgot lech' daa liizelozi nakch na' li wwakwba'n, na' lekzka' li wllin to niy xbemaa na' li wllin yel ni'abaa.

23 Na' li lljxi' me'do'na' mbejchlawin, li with kwenche gaochob na' goncho to lni,

24 la' xiindawaani gok cheb' ka bi' ba wit, na' naa ba bila'b' mbam'. Gok cheb' ka bi' wnit, na' naa ba billelb'." Na'ch wzologake' bengake' lnina'.

25 'Na' ka wzolo lnina', xiine' bi' necha' chdab' lyixaa. Na' ka billim' gaozə lillbaa, benib' chkwel wikwellka' na' chakte wiyaana'.

26 Na'ch wneb' to wen llinka' na' wñabibee bin chak lillbaa.

27 Na' wen llinna' chi'e: "Bi' bishoonan' ba bila', na' ben xo'na' mandad betgake' me'do'na' mbejchlawin daa bila'b' shi'a shao'."

28 Na' xiine' bi' necha' bllaab' na' bi goonib' yiyooob'. Na'ch bchej xabaa got'yoile'b' kwenche yiyooob'.

29 Na'ch che'b' xabaa: "Nezkzilo' ba gok zan yiz chon' yog' daa no', na' ni shlin bin' chishj' cho'a xtilloona'. Na' bigan' goño' nad' la'ch' to shibdo' kwenche wit'b yeej gaolem' bi'ka' nllaguid'.

30 Na' naa bila' xiino'ni biyit' bideb' yog' daa bi'ob' na' benditjb' xmecho'na' kon noolə wdaka', na' ba betzo' me'do'na', bana' le nak, ni cheb'."

31 Na'ch che' xabaa: "Xiindawaa, li' zoaleno' nad' toshiizi, na' yog' bi' de cha' chekzo' daa.

32 Per chonan byen naa yibaicho na' goncho lnini, la' ba bila' bi' bishooni. Ba gok cheb' ka bi' ba wit, na' naa ba bila'b' mbam'; gok cheb' ka bi' wnit, na' naa ba billelb'."

16

Jempl che wen llinna', beena' benditj daa de che xane'na'

1 Na' lekzka' goll Jesúza' beṅ'ka' nakgake'ne' txen:
—Wzoa to beṅ' wni'a nape' to wen llin che', na' bene' lo nee yog' dii de che'. Na' wyaj baḷ beṅ' jellgake'ne': “Le chonditj beena' daa beno' lo nee.”

2 Na'ch wṅe xane'na' le', chi'ene': “Ba benid' ka nagake' chono', na' chiyal' yidio' kwent diika' ngoo lo no', la' bich goṅ' xshino'na'.”

3 Na'ch chaki wen llinna': “¿Nakra gona'n ṅaa, bich goṅ' xan'na' llinna' gon'? Bi soid' gon' llin wal, na' chido'id' yep' beṅ' yiyesh'gakile' nad' gongake' lat' wej xmech'.

4 Ba nezid' nak gon' kwenche wleb beṅ' nad' lille'ka' kat' bich gat' llin cha'na'.”

5 Na'ch goxe' to to beṅ'ka' chal'gake' che xane'na', na' beṅ' necha' wṅabile'ne', chi'ene': “¿Ka'k' chaloo che xan'na'?”

6 Na' beena' chi'e: “Chalaa to guiyoa medid* set.” Na'ch chi'ene': “Ni de yisha', lobe'zə wche' na' bda'n shiyonzannan' chaloo.”

7 Na'ka wde, wṅabile' beena' sto, chi'ene': “¿Shera li? ¿Ka'k' chaloo?” Na' beena' chi'ene': “Chalaa to guiyoa gush trigo.” Na'ch chi'ene': “Ni de yisha' na' bda'n taplalj gushzannan' chaloo.”

8 Na' xan wen llinna' be'lawee wen llin mal che'na' daa biyiljlallee naklan gone'n. La' beṅ'ka' zech wṅeyi che daa chak lo yell-lioni, chiy-iljlall'chgake' nak soalen ljwellgake' wen kwenche ile'shii ljwellgake', aga ka beṅ'ka' ba yoo beeni' che Chioza' loo yichjlall'do'eka'.

9 'Na' nia' le', li wchin yel' shawaa de chele yell-lioni kwenche gaklenle beṅ', na' kat' ba wde che

* 16:6 Medid: to to medidki gokan ka do 37 litr.

yel' shawaa, Chioza' wlebe' le' soalenlene' zejli kani.

¹⁰ Na' beena' chon ka chiyał' kon lat' daa nak lall' nee, ka'kzan gone' shi bichlə dii xench koo lall' nee. Na' beena' bi chon ka chiyał' kon daa nak lall' nee, ka'kzə gone' shi bitekchlə dii xench koo lall' nee.

¹¹ Shi bi chonle ka chiyał' kon yel' shawaa de yell-lioni, bi gonzle lez ikaale yel' shawaa de yabana'.

¹² Na' shi bi chonle ka chiyał' kon yel' shawaa nak lall' na'le yell-lioni, ¿nakra gon Chioza' gone' le' yel' shawaa daa gaki chele?

¹³ 'Aga ga zoa to beŋ' wlane' xshin chop beŋ', la' wakzbanile' beena' to, na' gakchile' beena' sto, wa gone' xshin beena' to do lallee na' xshin beena' sto gone'n nakzi. Aga wak gonle ka cheeni Chioza' shi le chzelall'le yel' wni'ana'.

¹⁴ Na' fariseoka' le chzelall'gake' mecha', na' ka bengakile' dillaa choe' Jesúza', bxillgakile'ne'.

¹⁵ Na'ch che' Jesúza' legake':

—La'kzi nale nakle beŋ' wen, Chioza' nezile' nakan nak yichjlall'do'lena'. La' daa chaki beŋ' yell-lioni nakan dii lliarote, leyeŋ'lannan' chakzbani Chioza'.

Leya' na' yel' wñabia' che Chioza'

¹⁶ Na' lezkza' che' Jesúza':

—Leya' na' daa bli' bsemi dii beŋ'ka' wdixjee daa goll Chioza' legake', legakannan' wñabia'gakan ax̄t ka bllin lla bid Juanna'. Na' ka bid Juanna', wzolo chzenag beŋ' dill' wen dill' kob che yel' wñabia' che Chioza', na' chongake' to dii byen kwenche inabi'e loo yichjlall'do'eka'.

17 'Dii li nia' le', lobe'ch te che yabana' len yell-lioni, aga ka daa tegonz shcho'a daa na leya'.

Bi chiyal' yilaa ben'ka' nshagna'

(Mt. 19:1-12; Mr. 10:1-12)

18 'Shi to ben' byo yilee xoolena' na' yikee noolə yoblə, chone' ka chon beena' zoate nool che'na' na' chdalene' noolə yoblə. Na' beena' yikee noola' bilaa ben' che'na' le', lekzka' chone' ka chon beena' zoalente nool che'na' na' chdalene' noolə yoblə.

Ben' wni'ana' na' Lázarona'

19 Na' chize' Jesúsza' ben'ka':

—Wzoa to ben' wni'a na' chakwe' shgal' lech' dii wen na' yog' lla chaoshawe'.

20 Na' lekzka' wzoa to ben' yesh' wlie' Lázaro, na' llia we'na' doxen kwerp che'na'. Na' tlizi chjchi'e cho'a yoo che ben' wni'ana',

21 gokile' gawe' la'ch' blaaka' chxop xan mes che'na', na' ax̄t bekw'ka' chleegakb we'na' llie'.

22 Na' bllin lla wit ben' yeshaa, na' biche' anjl che Chioza'ne' kwenche jazoalene' dii Abrahama'. Na' lekzka' wit ben' wni'ana' na' bkwash'gake'ne'.

23 Na' dii ben' wni'ana' chdezi'chgue' gana' lle' ben' wetka', na' blis jalawe'na' na' zit'lə ble'ile' dii Lázarona' chi'e kwit dii Abrahama'.

24 Na'ch wnie' zilljə chi'e: “Xadawaa Abraham, biyesh'gachi nad' na' bsel' Lázarona' kwenche wleejlat' xbene'na' loo nisa' na' yidshone'n lo lollaani, la' le chllaglochgan' lo yi'ni.”

25 Na' Abrahama' chi'ene': “Xiin, jadini ka mbalaz gok cho' shlak wbano' yell-liona', na' Lázaroni aga bi dii wen gok che'. Na' naa chizi'e banez ni, na' li' chzak'zi'o.

26 Na' ziznakan sto, ze to bdiñj xen gcholi, na' aga wak te beñ'ki yidgake' gana' lle'le, na' beñ'ka' lle' na' aga wak tegake' yidgake' gani zoanto'."

27 Na'ch che' beñ' wnia'na'ne': "Chñabid' li' shka', xadawaa Abraham, ben goklen bseñ'gach Lázarona' lill xa'na'

28 gana' zoa zi gay' beñ' bishaaka', llje'lene' legake' dill' kwenche bi lengake' yiyedgake' gani de yel' zak'zi'ni."

29 Na' Abrahama' chi'ene': "Napkzgake' daa bzej dii Moiséza' na' daa bzej dii beñ'ka' wdixjee daa goll Chioza'. ¡Na' chiyal' wzenaggake'n!"

30 Na' che' beñ' wnia'na'ne': "Aga wakan, xadawaa Abraham, san shel' to beñ' ba wit yibane' na' yiyaje' lljaye'lene' legake' dill', na' wiyaj wilengakile' saaxya che'ka'."

31 Na' che' Abrahama'ne': "Shi bi chzenaggake' daa bzej dii Moiséza' na' daa bzej dii beñ'ka' wdixjee daa goll Chioza', lekzka' aga wyajle'gake' la'kzi yiban to beñ' wet."

17

Bi goncho ka ixop beñ' yoblə gone' dii mala'
(Mt. 18:6-7, 21-22; Mr. 9:42)

1 Na'ch che' Jesúsza' beñ'ka' nakgake'ne' txen:

—Bia'kzə de dii gon ka ixop beñ' gone' dii mala', per jnyesh'laz gak che beena' wchixe' beñ' yoblə gone' dii mala'!

2 Wenlan shel' wwal'gake' yene'na' to yaj che molin na' lljazal'gake'ne' loo nisdona' aga ka daa wchixe' to beñ'ki chajle'gake' cha'.

3 Daan, li wsak'.

'Shi to bish' ljwell-le gone' mal chele, li wshesh-lene', na' shi yiyajile' daa bene' chele, li yizi'xen che'.

⁴ La'kzi axt gall shii shlla gone' bi gone' chele, na' gall shiite ine' le': "Chiyajid' daa ben' cho'", chiyal' yizi'xenle che'.

Daa gak gon to ben' chajle'

⁵ Na'ch goll postlka' Xancho Jesúsza':

—Goklen neto' gonlilall'chnto' Chioza'.

⁶ Na'ch che' Xancho Jesúsza' legake':

—Shel' yel' chajle' chelena' nakan la'ch' ka nak sa mostásana', daa nak diido'zə, wak ye'le yag xen wala': "Blall'shki, na' jsoa loo nisdō' na'lə", na' gon yaga' daa ye'len, shel'ka'.

Daa chiyal' gon to wen llin

⁷ Shi nole zoa to wen llin chele na' zizee lyixaa jawaane' goonna' wa jtapeeb, aga we'lene': "Biyoo, na' wche' kwenche gawo'."

⁸ Aga we'lene' ka', san ye'l-lene': "Bsini'a daa gaw' xshe'na', na' wze wneyi kwenche wdio' daa yeej gaw', na'techlə yeej gawo'."

⁹ Na' ni bi we'lene' yel' choxken daa ba bene' daa che'lene' gone'.

¹⁰ Lekzka' le', kat' ba biyoll benle yog' daa non Chioza' mandad gonle, chiyal' inale: "Neto' bi chizo chizakinto' gonnto' yog'lolten, shinchga bizointo' ba bennto' daa chonan byen gonnto'."

Biyon Jesúsza' shi ben' chak yillwe' daa le lepra

¹¹ Na' shlak zjada Jesúsza' Jerusalenna', wdie' gana' ndil yell-lioka' mbani Samariana' na' Galileana'.

12 Na' ka blline' to cho'a yelldo', bllesh shi ben' chakgake' yillwe' daa le lepra kwenche ll-jatlgake'ne', na' de zit'lə wzegake'

13 besyaagake' zilljə, che'gake'ne':

—¡Jesús, Maestro, biyesh'lall'gachi neto'!

14 Na' ka ble'i Jesúza' legake', na' golle':

—Li shaj lao bꞑozka' kwenche ile'gakile' le'.

Na' shlak zejgake' bigaa yillwe' che'ka'.

15 Na'ch toe' bibi'e ka gokbe'ile' ba biyakile', na'ch axt chosya'ile' choe'lawee Chioza'.

16 Na' bꞑhek' xibe'na' lao Jesúza' na' bdose' lo yona' kwenche bi'ene' yel' choꞑken. Na' beena' ben ka' nake' ben' Samaria.

17 Na'ch che' Jesúza':

—¿Aga shigaken' biyaki? ¿Garaꞑ ben'ka' zi ga?

18 ¿Atochga ben' zitiin bibi'e choe'lawee Chioza'?

19 Na'ch che' Jesúza' beena':

—Bizolla' na' biyaj. Ba biyakilo' daa wyajli'o cha'.

Yel' wꞑabia' che Chioza'

(Mt. 24:23-28, 36-41)

20 Na'ch wꞑabi fariseoka' Jesúza' batran solo inꞑabia' Chioza' lo yell-lioni. Na' chi'e legake':

—Ka nak yel' wꞑabia' che Chioza', aga nakan ka to dii ile'tekzicho.

21 Aga no ina: “Ni chꞑabia' Chioza'”, wa “Na' chꞑabi'e”, la' ladjlenikzan ba bla' yel' wꞑabia' che'na'.

22 Na'ch chi'e ben'ka' nakgake'ne' txen:

—Wllin lla kat' gaklall'le la'ch' zi shlla ile'chile inꞑabi'a, nad', Ben' Bsel' Chioza' Yell-lioni, na' aga wle'chile nad'.

23 Na' ichej ben' ine': "Ni zoe'", wa "Na' zoe'." Na' bi shajle, ni bi gonle ben'ka' txen.

24 La' ka chak kat' chep yes, chzeeni'n doxen xan yabana', ka'kzan gak llana' kat' zizaa, nad', Ben' Bsel' Chioza' Yell-lioni.

25 Na' chonan byen zigaate biya daa yen ile'id', na' ben'ki zoa naa wzoagake' nad' ka'lə.

26 Kon ka gok kana' wzoa dii Noéna', ka'kzan gak kat' ba zoa illin lla yiyed' dii yoblə, nad', Ben' Bsel' Chioza' Yell-lioni.

27 Kana' wzoa dii Noéna', ben' yell-lioka' cheej chaogake', chshagna'gake', na' choe'gake' yel' wishagna' che xiine'ka' blinte llana' wyoo dii Noéna' loo barkwa'. Na' wzolo chak yejsiwaa yell-lioni ax̄t billa'cha lawinna' nisa', na' bliayi'n yog'ləle'.

28 Na' lekzka' wizak kana' wzoa dii Lota'. Cheej chaogake', chiya'o chidegake' bi de chegake', na' chaz chaangake', na' chon lillgake'.

29 Per ka bchej dii Lota' yell Sodómana', Chioza' bletje' yi'na' xan yabana' nchixan daa ne' azufre na' betan yog' ben' yell Sodómaka'.

30 Na' ka'kzan gak llana' kat' yiyed', nad', Ben' Bsel' Chioza' Yell-lioni.

31 'Llana' zizaa, shi to ben' llie' yichj lille'na' na' xshinlaze'na' den loo yoo che'na', bi yiyetjze' kwenche lljaleje'n. Na' shi to ben' zeje' lyixaa, bi yiyajze' lille'na'. 32 Li lljadini ka gok che dii xool Lota'.

33 Beena' bi chsanlall' yel' mban che'na', beenan' kwiayi'; san beena' chsanlall' yel' mban che'na', beenan' gat' to yel' mban che' zejli kani.

³⁴ Na' nia' le', lle'na' kat' zizaa, chop ben' die' toz blag, toe' yich'i'a na' stoe' yigaan.

³⁵ Na' gana' lle' chop noolə chotgake', toe' yich'i'a na' stoe' yigaan.

³⁶ Na' chop ben' byo chongake' llin lyixaa, toe' yich'i'a na' beena' sto yigaane'.

³⁷ Na'ch wnabgakile'ne':

—¿Garan gak dga, Xan'?

Na' chi'e legake':

—Gana' de ba weta', nan' chdop chllag llodka'.

18

Jempl che to nool wizeb na' to ben' wen yel' joschis

¹ Na' bzoa Jesúza' to jempl kwenche bli' bsedile' legake' bi lljshyagakile' we'lwillgake' Chioza'.

² Chi'e legake':

—Wzoa to ben' wen yel' joschis to yell, na' bi chall chllebe' Chioza', ni bibi chakile' shi bi chiyoolallii ben' ka chone'.

³ Na' yella' wzoa to noolə wizeb na' chajtezi chaje' lawe'na', chi'ene': “Bensha yel' joschis cha'ni.”

⁴ Na' ssha ba gok chaje' lawe'na' na' bikzə chone' bin chi'ene', na' bllin lla kat' chakile': “La'kzi bi chall chlleb' Chioza' na' ni bibi chakid' shi bi chiyoolallii ben' ka chon',

⁵ gonch' yel' joschis che nooli kwenche bich yidyembeguile' nad'.”

⁶ Na' Xancho Jesúza' chi'e legake':

—Li wzenag ka ben ben' wen yel' joschisa', beena' bi chall chlleb Chioza'.

7 ¿Achakile Chioza' bi gaklene' ben'ka' ba wleje' nakgake' lall' nee, ben'ka' choe'lwillgake'ne' ka wal ka tella? ¿Awllaile' gaklene' legake'?

8 Bi nakan ka', san nia' le' katena' gaklene' legake'. Per kat' zizaa, nad', Ben' Bsel' Chioza' Yell-lioni, ¿alle'ch ben' nonlilall' nad' yell-lioni, lla?

Jempl che to fariseo na' to ben' wichixj

9 Na' bzoo Jesúza' sto jempl che ben'ka' chakgatile' nakgake' ben' wen lao Chioza' na' chongakile' ben' yoblə nakzi. Na' wne':

10 —Chop ben' wyajgake' yoodo'na' kwenche je'lwillgake' Chioza'. Toe' nake' fariseo na' beena' sto nake' ben' wichixj.

11 Na' farisewa' zie' chshalj chshon che kwine', chi'e: “Chios cha', choxkeno' bi chon' ka chon ben' yoblə, bi chzi' chban', bi nak' ben' wen dii mal, agagan' kwej yichj' nool cha'na' kwenche soalen' nool yoblə, na' ni bi chon' ka chon ben' wichixji.

12 Chop shii to xman chzoa' wbas', na' lawi yog' daa chon' gan chbej' daa chidoḷoo ikoo.”*

13 Na' ben' wichixja', zit'lə wzie' na' ni bi biyaxjile' wlis lawe'na' wwie' yabana', san chballee cho'a lcho'ena' chi'e: “¡Chios cha', biyesh'gachi nad' daa nak' ben' saaxya!”

14 Na' nia' le', Chioza' bzenague' che ben' wichixja' na' bizee biyaje' lille'na' ba biyakxen saaxya che'na'. San bi bzenague' che farisewa'. La' beena' chon kwine' ben' choo ben' xen, Chioza' gone'ne' ben' bibi zakii. Na' beena' chakile' bibi zakee, Chioza' gone'ne' ben' choo ben' xen.

* **18:12** Daa chidoḷoo ikoo: literalmente la décima parte.

Benleey Jesúza' bi'do'ka'
(Mt. 19:13-15; Mr. 10:13-16)

¹⁵ Na' lekzka' beṅ' zan jwa' bi'do' che'ka' lao Jesúza' kwenche bxoá neena' yichjb'ka' na' wṅabile' Chioza' gaklene'gakb'. Na' ka ble'i beṅ'ka' nakgake'ne' txen, bsheshlengake' legake'.

¹⁶ Na' Jesúza' goxe' bi'do'ka', na' chi'e beṅ'ka' nakgake'ne' txen:

—Li we' latj yid bi'do'ki lawa'ni, bi wllonle, la' Chioza' chṅabi'e loo yichjlall'do' beṅ'ka' nak ka legakb'.

¹⁷ Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

To beṅ' zakii beṅ' nak beṅ' wni'a be'lene' Jesúza' dill'
(Mt. 19:16-30; Mr. 10:17-31)

¹⁸ To beṅ' zakii wṅabile' Jesúza', chi'ene':

—Maestro, li' nako' beṅ' wen. Wna nad' beran chiyal' gon' kwenche gat' to yeḷ' mban cha' zejli kani.

¹⁹ Na'ch che' Jesúza'ne':

—¿Berache nazo' nad' beṅ' wen? Toz Chioza' nake' beṅ' wen.

²⁰ Ba nezkzilo' daa nllia Chioza' bia' goncho: “Bi soaleno' nool bi nak nool cho', bi wito' beṅ', bi kwano', bi chiljalloo bizə gon ino' che beṅ', na' wdap balaan xaxṅoo.”

²¹ Na'ch che' beena'ne':

—Kana' naktia' bi' xkwid' chon' yog' diika'.

²² Na'ch ka beni Jesúza' ka goll beena'ne', na' chi'ene':

—Stozə daa chyallj gono': jayet' jade yog' daa de cho' na' be'n be'n' yesh'ka'. Na' shi gono' ka', na' gat' to yel' shao' cho' yabana'. Na' da, dino' nad'.

²³ Na' ka beni beena' ka goll Jesúza'ne', le gokyeshile', la' be'n' wni'a nlleban'.

²⁴ Na' ka ble'i Jesúza' le gokyeshile', na' chi'e:

—iLallj inleeb chonan che be'n' wni'aka' we'gake' latj inabia' Chioza' legake'!

²⁵ Lobe'ch te to kamey xan yeshaa aga ka to be'n' wni'a yiyo'e yabana'.

²⁶ Na' be'n'ka' beni, gollgake'ne':

—¿Noran yila shka'?

²⁷ Na'ch che' Jesúza' legake':

—Daa bi chak gon be'ne'cha', Chioza' chak gone'n.

²⁸ Na'ch che' Pédrona' Jesúza':

—Xan', ba wlej yichjnto' yog' dii de chento' kwenche naknto' li' txen.

²⁹ Na'ch che' Jesúza' legake':

—Dii li nia' le', nottezə be'n' ba bzanile' no lille', no xaxnee, no be'n' bishee, no be'n' zane', no xiin xoole' kwenche cho'e latj chnabia' Chioza'ne',

³⁰ Chioza'kzə wi'e dii zak'chi che' yell-lioni aga ka diika' wlej yichje', na' ka yilline' yabana' wi'ene' to yel' mban zejli kani.

De wyon shii wdixjee Jesúza' guete'

(Mt. 20:17-19; Mr. 10:32-34)

³¹ Na'ch wlej Jesúza' be'n'ka' shllin ka'lə, be'n'ka' nakgake'ne' txen, chi'e legake':

—Dga ziyajcho Jerusalenna' naa, yillinin daa bzej dii be'n'ka' wdixjee daa goll Chioza' kani'yi daa gak cha', nad', Be'n' Bsel' Chioza' Yell-lioni.

³² La' gongake' nad' lo na' ben'ka' bi nombia' Chioza', na' gonlegake' cha', biya dii inagake' nad', na' wlla' xeneeka' nad'.

³³ Na' wit chingake' nad' na'tech witgake' nad', na' yiyon lla yiban' ladj ben' wetka'.

³⁴ Na' ben'ka' nakgake'ne' txen ni lat' bi wya-
jni'gakile' daa golle' legake', na' ni bi wnezgakile'
berache chi'e legake' ka', la' daa golle' legake' nakan
dii bi gak shajni'gakile'.

Biyon Jesúza' to ben' lchol yell Jericóna'
(Mt. 20:29-34; Mr. 10:46-52)

³⁵ Na' ka ba chllin Jesúza' yell Jericóna', na'
chi' to ben' lchol cho'a neza' chnabile' ben'
yiyesh'lall'gakile'ne' we'gake' lat' wej xmeche'.

³⁶ Na' ka benile' chde ben' zan na'ch wñabe' bin
chak.

³⁷ Na' gollgake'ne':

—Jesús, ben' Nazaretan', chda ni.

³⁸ Na'ch besyee, chi'e:

—¡Jesús, Xiin dia che dii Daví, biyesh'lall'gachi
nad'!

³⁹ Na' ben'ka' llialo lao Jesúza' chsheshlen-
gake'ne' kwenche kwi'e llizə, na' zizikchlə
chosyee, chi'e:

—¡Xiin dia che dii Daví, biyesh'lall'gachi nad'!

⁴⁰ Na'ch wlez Jesúza' na' bene' mandad
lljxi'gake'ne'. Na' ka bllin ben' lchola' lawe'na'
na'ch wñabile'ne':

⁴¹ —¿Beran cheenilo' gon' cho'?

Na'ch che' ben' lchola'ne':

—Xan', cheenid' ile'id'.

⁴² Na'ch che' Jesúza'ne':

—Daa ba chonlilalloo nad' na' ile'ilo'.

43 Na' katena' lii bile'teile', na'ch janoe' Jesúza' choe'lawee Chioza'. Na' yog' beṅ'ka' ble'i daa ben Jesúza' be'la'ogake' Chioza'.

19

Jesúza' na' Zaquewa'

1 Na'ch bllin Jesúza' yell Jericóna' na' wdie' gchol yella'.

2 Na' yella' zoa to beṅ' wni'a lie' Zaqueo, na' ngoo lall' nee xonj wixhixjka'.

3 Na' goklallee ile'ile' Jesúza', per bi gok ile'ile'ne' daa nake' beṅ' bchekwdo' na' daa zejlen Jesúza' beṅ' zan.

4 Na'ch wllialodoe' lawe'ka' na' wyep'e' to lo yag xen kwenche ile'ile'ne' ka tie'.

5 Na' ka bllin Jesúza' xan yaga', na' blis lawe'na' chi'ene':

—Zaqueo, btalaloo biyetj, la' lillo'nan' yigaana' naa.

6 Na'ch biyetjdo Zaquewa' chibaile' bichi'e Jesúza' lille'na'.

7 Na' ka ble'i beṅ'ka' lle' na' ka gok, yog'ze' wzolo biz chon chnagake' che', che'gake':

—Yigaanxgale' lill beṅ' saaxyani, na.

8 Na'ch wzolla Zaquewa' na' chi'e Xancho Jesúza':

—Xan', cheenid' wi'a gashjə daa de cha' beṅ' yesh'ka', na' yog' beṅ'ka' ba bchixj' dii xench, yiyoe'gakee taplə ka daa ba wlan' chegake'.

9 Na'ch che' Jesúza'ne':

—Naanlla ba bisla Chioza' beṅ'ki zoa loo yooni kwenche bi kwiayi'gake', daa len Zaquewi nake' xiin dia che dii Abrahama'.

10 La' ka nak' nad', Ben' Bsel' Chioza' Yell-lioni, bid' kwenche yiyilj' na' yisla' ben'ka' yoo nez daa wlliyi'n legake'.

Jempl che beena' bkwaanlen wen llin che'ka' mech

11 Shlak chzenag ben'ka' daa che' Jesúza', bseesile' legake' to jempl, daa ba zoa illine' Jerusalénna' na' legake' gokgakile' daa nake' ben' bsel' Chioza' lii solotie' inabi'e.

12 Na'ch chi'e legake':

—To ben' zakii bcheje' wyaje' to yell zit' wal kwenche lljalane' yel' wnabia' che lalle'na', na' ka yilline' inabi'e.

13 Na' ka zi' see, wnie' shi wen llin che'ka' na' bi'e legake' twej mech dii zak' dii xen na' chi'e legake': “Ni de mech, li gonlanan delgens shlak bi soa.”

14 Na' ben' wlall che'ka' le chakzbangakile'ne', na' ka wde wzee bsel'gake' xonj ben' wyajgake' lao beena' we' lsens inabi'e kwenche jellgake'ne': “Bi cheeninto' inabia' beeni neto.”

15 Per bia'kzə gok lo nee inabi'e, na' biyaje' lalle'na'. Na' ka billine' goxe' ben'ka' bkwaanlene' mecha' kwenche inezile' ka'k' wej ben mecha' gan daa bkwaanlene' to toe'.

16 Na' ka bllin ben' necha' lawe'na' na' chi'ene': “Xan', xmecho'na' bkwaan'leno' nad' bena'n gan shin.”

17 Na'ch ben' wnabia'na' chi'ene': “Wenkzan beno'. Daa beno' ka chiyal' kon lat' mecha' bkwaanlen' li', wzoa' li' inabi'o shi yell.”

18 Na' ka bllin beena' sto lawe'na' na' chi'ene': “Xan', xmecho'na' bkwaan'leno' nad' bena'n gan gayaan.”

19 Na' lekzka' chi'e beena': "Wzoa' li' inabi'o gay' yell."

20 Na'ch bllin stoe' lawe'na' na' chi'ene': "Xan', ni de xmecho'na' bkwaan'leno' nad'. Blall'tipteza'n to lech' na' wlooshawaan

21 daa blleb' li', la' le ben' znia nako'. Chkaatezo' dii bi naki cho', na' chizi' chilaptezo' dii goz goon ben' yoblə."

22 Na'ch che' ben' wnabia'na' le': "Bikzbi yejni'alalii beno'. Kon kā ba wno' ka'kzan gak cho'. Nezilo' nak' ben' znia, na' chkaatez' dii bi naki cha' na' chizi' chilap' dii goz goon ben' yoblə.

23 Na' daa nezilo' ka' chon', ɔberache ki bi'o xmechaa gon yichjin kwenche yikaan naa ba biyed'?"

24 Na'ch chi'e ben'ka' lle' na': "Li yikaa mecha' daa bi'ane' na' li we'n beena' bene' gan shin."

25 Na'ch che' ben'ka'ne': "Xan', ba napkzə beena' shin."

26 Na' che' ben' wnabia'na' legake': "Nia' le', beena' chonlene' llin daa yoo lo nee, wakch lall' nee dii xench; san beena' bi chonlene' llin daa yoo lo nee, axt daa ngoo lo nee lat' yidoyo.

27 Na' ka nak ben'ka' chakzbangakile' nad', ben'ka' bi cheengakile' inabi'a, li lljxi'gake' ni na' li witgake' ile'teid'."

Billin Jesúza' Jerusalénna'

(Mt. 21:1-11; Mr. 11:1-11; Jn 12:12-19)

28 Na' ka wde wna Jesúza' ka', na'ch bigoolene' nez ben'ka' nakgake'ne' txen ziyajgake' Jerusalénna'.

29 Na' ka billingake' xni'a yaa daa le Yaa Olivos, gaozə yellka' le Betfagé na' Betania, na'ch bselee chop ben'ka' nakgake'ne' txen,

30 na' chi'e legake':

—Li shaj yella' llia na', na' ka illinle ile'ile to burr chbando', ba konon' kwia, da'b yag. Na' wsell-leb wche'leb nilə.

31 Na' shi no inaz le': “¿Berache chsellzleb?”, na' ye'lene': “Xanchonan' chyalljile'b.”

32 Na'ch wyaj ben'ka' bselee, na' ka bllingake' ble'gakile' to burr chbando' da'b yag, kon kayen' goll Jesúza' legake'.

33 Na' ka chsellgake' burra' na'ch che' xama' legake':

—¿Berache chsell-leb?

34 Na'ch che'gake'ne':

—Xanchonan' chyalljile'b.

35 Na'ch bche'gake'b jwa'gake'b lao Jesúza' na' bxoagake' xe'ka' koll'ba' na' blligake' Jesúza' koll'ba'.

36 Na' shlak zej Jesúza' llie' burra', chshilj xa ben'ka' tlo neza'.

37 Na' ka ba chillingake' gaozə gana' chiyetj nez daa ziza' Yaa Olívoza', yog'lol ben'ka' nakgake'ne' txen chosyaagake' daa chibagakile' na' choe'la'ogake' Chioza' daa ble'gakile' yog' ye'l' wakka' bene'.

38 Na'ch nagake':

—¡Gaklenshga Xancho Chioza' beeni ba bselee inabi'e! ¡Li da, we'la'ocho Chioza' zoa yabana' daa bene' ka zoalenchone' mbalaz!

39 Na' bal fariseoka' len ladj ben'ka' no Jesúza', che'gake'ne':

—Maestro, goll beṅ'ki nakgake' li' txen soagake' llizə.

⁴⁰ Na' che' Jesúza' legake':

—Nia' le', shi beṅ'ki soagake' llizə, na' yaj kilə solo gosyaagakan we'la'ogakan nad'.

⁴¹ Na' ka billine' gaozə yell Jerusalénna', gokyeshile' ka ble'ile'n na' wchelle' che beṅ'ka' zoa na'.

⁴² Na' chi'e:

—iShe'l'ka' naanlla gakbe'ile nakan gonle kwenche soale mbalaz! Per ngashaan laolena' na' aga wakbe'kzile.

⁴³ Wllin lla ila' beṅ'ka' chakzbangakile' le' na' wzehjgake' yelli leej na' kono gak sho' ichej.

⁴⁴ Na' ni sto yaj che lill-leka' bich yikwaangake' koll' ljwellin, na' witgake' le' len xiinleka', la' bi gokbe'ile ka bla' Chioza' ladjleni.

Bishesh Jesúza' beṅ'ka' chit' chde lesh' chyoodo'na'

(Mt. 21:12-17; Mr. 11:15-19; Jn 2:13-22)

⁴⁵ Na'ch ka bllin Jesúza' cho'a yoodo'na' na' bisheshe' beṅ'ka' chit' chde.

⁴⁶ Na' chi'e legake':

—Cho'a Xtill' Chioza' nan: “Lilla'na' nakan ga choe'lwill beṅ' nad'”, na' le' naa ba nonzlen ka to ga chdop chllag wban.

⁴⁷ Na' yog' lla bli' bsemi Jesúza' beṅ' gana' zoa yoodo'na', na' bxozka' chṅabia' na' beṅ'ka' chli' chsemi leya' na' nochlə beṅ' wṅabia' che beṅ' Israelka' la'kzi biyiljlall'gake' naklə gongake' kwenche witgake'ne'

⁴⁸ bikzə bi gok gongake', la' yog'zə beṅ' chibagak-ile' chzenaggake' dill'ka' cho'e.

20

Yel' wñabia' che Jesúza'

(Mt. 21:23-27; Mr. 11:27-33)

¹ Na' bllin to lla, shlak chli' chsedi Jesúza' ben'ka' lesh' chyoodo'na' na' chyixje'ile' legake' dill' wen dill' kob che Chioza', bllin bꝑozka' chñabia' na' ben'ka' chli' chsedi leya' len ben' golka' chñabia'.

² Na' che'gake'ne':

—Wnashki neto', ¿bi yel' wñabia' napo' chono' diiki? Na' ¿nora ben' li' yel' wñabia'ni?

³ Na'ch che' Jesúza' legake':

—Lekzka' nad' de to dii inabid' le', li inashki nad':

⁴ ¿Noran bsel' Juanna' kwenche bidchoe' ben' nisa'? ¿AChiozan' bseleene'? ¿Anti ben' yelliona'zan bseleene', lla?

⁵ Na'ch wzologake' choe'len ljwellgake' dill', che'gake':

—¿Nakra ka ye'chone', lla? Shi ye'chone' Chioza' bseleene', lobe' ine' cho': “¿Berache ki wyajle'le che', shka'?”

⁶ Na' shi yize'chone' nozə ben' bseleene', yog' ben'ki wlligake' cho' yaj witgake' cho', la' yog'gake' chajle'gake' Juanna' bi'e dill' daa goll Chioza'ne'.

⁷ Na'ch gollgake' Jesúza':

—Bi nezinto' no bsel' beena'.

⁸ Na'ch che' Jesúza' legake':

—Lekzka' nad' aga wnia' le' noran ben' nad' yel' wñabia'na' kwenche chon' diiki.

Jempl che wen llin malka'

(Mt. 21:33-44; Mr. 12:1-11)

⁹ Na' Jesúza' bseese to jempl lao ben'ka' lle' na':

—To beṅ' billee yag uva, na' bene'n lall' na' beṅ'ka' gap wwian, na' wzee wyaje' ssha gan yoblə.

¹⁰ Na' ka bizi' bilap beṅ'ka' uvana', xaninna' bselee to wen llin che' kwenche lljelle' beṅ'ka' nak lall' na'gake' yag uvaka' we'gake'ne' daa chidolee yikee. Na' beṅ'ka' chapgake' yag uvaka' beṅ'gake'ne' bet wdingake'ne', na'tech bilaggake'ne' to ka' che'.

¹¹ Na'ch bselee sto wen llin che'na'. Na' lekzka' bet wdingake'ne', na' biya dii bengakile'ne', na' bizlaggake'ne' to ka' che'.

¹² Na'ch de wyon shii, bizselee wen llin yoblə, na' lekzka' bengake'ne' bido we'zi, na' bizlaggake'ne'.

¹³ 'Na'ch chaki xan yag uvaka': “¿Nakra ka gona'n? Wsel'shkid' bi' cha'ni, bi'ni le chakid'. Shera shicholə wzenaggake' cheb'.”

¹⁴ Na' ka ble'i beṅ'ka' chap yag uvaka' xiine'na', na'ch che' ljwelle': “Bi'nin yigaanlem' yell-lioni. Li da witchob' kwenche yigaanlenchon.”

¹⁵ Na' wlejgake'b' gana' lle' yag uvaka' na' bet-gake'b'.

Na'ch wnabi Jesúza' beṅ'ka' chzenag:

—¿Nakra ka chakile goni xan yag uvaka' beṅ'ka', lla?

¹⁶ Ba nakten shaje' na' lljete' beṅ'ka' chap yag uva che'na' na' yiyone' yell-lio che'na' lall' na' beṅ' yoblə.

Na' ka beni beṅ'ka' wne' ka', na' wnagake':

—¡Bat we' Chioza' latj gak ka'!

¹⁷ Na' bwia Jesúza' legake', chi'e:

—¿Beran zejin Cho'a Xtill' Chioza' gana' na: Yaja' daa bi wyoolall' wen yooka', leyen'lannan' yaja' daa ba nchejcha yoona'?

18 Nottezə ben' lljchaze' lawinna' kwiayee, na' shi idakwan ben', axt wshoshjan le'.

Janabgakile' Jesúza' shi chiyal' chixjgake' daa chñab beena' chñabia' Rómana'
(Mt. 21:45-46; 22:15-22; Mr. 12:12-17)

19 Na' bxoꝝka' chñabia' na' ben'ka' chli' chsedi leya' goklall'gake' gox'gake' Jesúza' ka biyoll golle' ka', la' gokbe'gakile' chezgaken' wnie' daa bi chajle'gake' che'. Per bllebgake' ben'ka' ndop nllag na'.

20 Na'ch bsel'gake' to chop ben' wiwia wiyi, na' bentezgake' ka ben' cheenchgayi wzenag che'. Per aga do lall'gaken' wyajgake', san kwenchezə kwejyelgakile' Jesúzan' na' lljadaogake' xya che' lao beena' chñabia' gana' mbani Judeana'.

21 Na' wnabgakile'ne':

—Maestro, nezinto' daa no' na' daa chli'o nakan dii li, na' aga chwio' nak nak ben', shi nake' ben' zakii wa shi bi nake'. Nezinto' chli'o nez li che Chioza' kon ka nakan.

22 Wnashki neto': ¿Achiyal' chixjcho daa chñab Césara', beena' chñabia', anti bi chiyal' chixjchon?

23 Na' gokbe'i Jesúza' aga do lall'gaken' wnabgakile'ne', na'ch chi'e:

24 —Li wli'shkayi nad' to mech. ¿Nora cho'alawin na' no leyin da'n?

Na' che'gake'ne':

—Che Césaran', beena' chñabia' Rómana'.

25 Na'ch chi'e:

—Na'len, li we' Césara' daa naki che', na' lekzka' li we' Chioza' daa naki che'.

26 Na' ni shcho'a dill' daa bi'e lao ben'ka' bi gok wchingake'n kwenche gaogake' xya che'. Na' bibangakile' ka golle' legake' na' bibe'gake' llizə.

Wnabgakile' Jesúza' nak gak kat' yiban ben' wetka' (Mt. 22:23-33; Mr. 12:18-27)

27 Ka wde dga, bllin bal saduceoka' lao Jesúza', ben'ka' bi chajle' daa yiban ben' wetka'. Na'ch che'gake' Jesúza':

28 —Maestro, leya' bzej dii Moiséza' nan: shi to ben' byo guete' na' igaan̄ xoole'na' wizeb na' kono xiingake' wzoa, ben' bish' ben' weta' chiyal' yikee nool wizeba' kwenche soa xiin̄ dia che dii ben' bisheena'.

29 Ki gok to shii, wzoa gall bish' ben', na' ben' necha' bshagnee, na' wite' na' kono xiine' wzoa.

30 Na' ben' wchopina' bikee noola', na' lekzka' wite' na' kono xiine' wzoa.

31 Na' ben' wyonina', lekzka' bizkee noola', na' wizete' na' kono xiine' wzoa. Na' lekzka' ben'ka' zi tap bizkaagake' noola' na' witgake', na' ni to ben'ka' gall bi wzoa xiingake' kon noola'.

32 Na' ka bllin lla lekzka' wit noola'.

33 Na' kat' yiban ben' wetka', ¿norayen'en' gak ben' che', lla?, la' galltien' wzoalene'.

34 Na'ch che' Jesúza' legake':

—Ben'ka' lle' yell-lioni naa chkaa ljwellgake', na' lekzka' choe' ye! wishagna' che xiine'ka'.

35 San ben'ka' ina Chioza' zak'gake' yiyajgake' gana' zoe' ka yibangake' ladj ben' wetka', aga ka'chan gongake'. La' koch no wshagna' gana' zoa Chioza',

³⁶ ni koch no guet, san soagake' ka zoa anjlka'. Na' gakgake' xiin Chios daa ba bisbane' legake' ladj ben' wetka'.

³⁷ Kwin dii Moiséza' bzeje' kwenche inezicho yiban ben' wetka' kana' bzeje' che yag yeshaa daa ble'ile' chal'nin. Na' wne' Xancho Chioza' nake' Chios che Abrahama', Isaaca' na' Jacoba'.

³⁸ Na' Chioza' aga nake' Chios che ben' wet, san nake' Chios che ben' de yel' mban cheyin. La' yog'lol ben' nxenilalii Chioza', dekzə yel' mban chegake'.

³⁹ Na'ch bal ben'ka' chli' chsedi leya' gollgake'ne':
—Maestro, ka ba wneyenoon nakan.

⁴⁰ Na' bich bi biyaxjchgakile' inabchgakile'ne'.

Crístona' nake' xiin dia che dii Davina'
(Mt. 22:41-46; Mr. 12:35-37)

⁴¹ Na' che' Jesúsza' legake':

—¿Berache nazə ben' Crístona' nake' xiin dia che dii Davina'?,

⁴² len kwin dii Davinan' bzeje' lee libr che Sálmoka' gana' na:

Xancho Chioza' golle' Xan'na':

“Wche' kwit' de shli ni

⁴³ shlak wzoa' xni'ona' ben'ka' chakzbani li'.”

⁴⁴ ¿Berache chakzile Crístona' nake' xiin dia che dii Davina', len kwin Davina' golle'ne': “Xan”?

Jesúza' wne' nan ben'ka' chli' chsedi leya' chongake' mal

(Mt. 23:1-36; Mr. 12:38-40; Lc. 11:37-54)

⁴⁵ Na' shlak chzenag yog' ben'ka' lle' na', Jesúsza' golle' ben'ka' nakgake'ne' txen:

46 —Li wsak' bi gonle ka chon ben'ki chli' chsedi leya'. Le chibagakile' gon xe'ka' dii ton, na' cheen-gakile' yog'zə ben' gapgake' legake' balaan ladj lkwe' ben'. Na' gana' chdop chllagcho choe'lwillcho Chioza' chbagakile' kwe'gake' gana' chbe' ben'ka' zakii, na' ka'kzə chongake' ga de yel' waw.

47 Na' lezkza' chkaatezgake' lill nool wizebka', na' chongake' ka chshaljlen Chioza' ssha nleb kwenche gaki ben' le wen chongake'. Na' daa chongake' ka', ba nakten ile'gakile' yel' zak'zi wala'.

21

Daa bzani to nool wizeb, bi'en Chioza' (Mr. 12:41-44)

1 Na' ble'i Jesúza' ka chgoo ben' wni'aka' mecha' gana' chgoo ben' mech che yoodo'na'.

2 Na' lezkza' ble'ile' to nool yesh', ben' wizeb, wlo'e chop sintabdo'.

3 Na' goll Jesúza' legake':

—Dii li nia' le', la'kzi nool wizebi nake' ben' yesh', ba be'che' dii xench aga ka yog'te ben'ka'.

4 La' yog'gake' choe'gake' daa chichoonan che'ka', na' le', naktie' ben' yesh', wlo'e doxen daa nape', la'kzi chyalljile'n.

Jesúza' chi'e wllin to lla kwiayi' yoodo'na' (Mt. 24:1-2; Mr. 13:1-2)

5 Na' bal ben'ka' choe'gake' xtill' yoodo'na' ka xochi nak yajka' nongakile'n na' diika' bzani ben' be'gake'n yoodo'na'. Na'ch che' Jesúza' legake':

6 —Ka nak diiki chwiale naa, wllin lla kwiayi' yogaan, ni sto yaj bich kwia koll' ljwellin.

*Diika' gak kat' ba zoa te che yell-lioni
(Mt. 24:3-28; Mr. 13:3-23)*

⁷ Na'ch wṇabgakile' Jesúza', che'gake'ne':

—Maestro, ¿batran gak dga ba wno'? ¿Bera ka ile'into' gak kwenche inezinto' nan ba zoa gaoshosh gakan?

⁸ Na'ch che' Jesúza' legake':

—Li wsak' bi we'le latj no siye' le'. La' beṇ' zan zi ichej gonzgake' ka nad', na' inazgake': “Nadaan Crístona”, na' lezkka' inazgake': “Ba bllin lla kwiayi' yell-lioni.” Bi gonle legake' txen.

⁹ Na' ka yenile chak no wdil wa chtop chshag ljwell beṇ' kwenche soshyi'gake' beṇ' wṇabia'ka', bi illeble. Chonan byen zigaate gak diiki, per aga lii tete che yell-lioni kat' ba chakgakan.

¹⁰ Na'ch golle' legake':

—Ganga kwe' wdila' na' til yell kon yell.

¹¹ Na' gak no bedxo' wal, na' gat' wbin, na' biya yillwe' kwe' lo yell-lioni, na' biya dii gak xan yabana' dii wwall wsheban beṇ'.

¹² 'Na' ka zi gak diiki, gox'gake' le' na' biya dii gongakile' le'. Na' lljwa'gake' le' gana' chdop chllagcho choe'lwil-cho Chioza' na' yiya yiyiljgake' le' na' koogake' le' lillya, na' lljwa'gake' le' lao beṇ' wṇabia' xenka' na' lao beṇ' wṇabia'ka' sto ni cha'.

¹³ Na' kat' gak chele ka', na'chlə gat' latj we'le cho'a xtillaana' lawe'ka'.

¹⁴ Na' bi sezle wṇeyi naklə inale kat' lljsele lao beṇ' wṇabia'ka',

¹⁵ la' nad'kzan wzajniid' le' nakan inale na' gon' le' ye! sin'na' kwenche ni to beṇ'ka' chakzbangakile' le' bi sogakile' inagake' bi nakan ka nale.

16 Na' no xaxna'tezle, no ben' bish'le, no dialla chele, na' no ben' zoalenle wen gongake' le' lo na' ben' wñabia'ka', na' witgake' bal'-le.

17 Na' axt yog'zə ben' gakzbangakile' le' daa nonlilall'le nad'.

18 Per li koo yichjle, Chioza' gaklene' le' na' ni tlish'yish'yichjlēna' bi kwiayi'.

19 Na' shi sechale lawi daa yen ile'ile na' bi gakhoplall'le, na'chan gat' to yel' mban chele dii bi te cheyin.

20 'Na' kat' ile'ile nechj soldadka' Jerusalēni, kanan' inezile nan ba zoa kwiayi'n.

21 Na'ch ben'ka' lle' gani mbani Judeani, chiya' wxonjgake' lljakwash'gake' do yaa yaoka', na' ben'ka' lle' yelli, chiya' wxonjgake', na' ben'ka' zej lyixaa, bichoklə yiyedgake' yelli.

22 La' kanan' gon Chioza' yel' zi' che yog'ze' kwenche yillinin doxen ka na Cho'a Xtilleena'.

23 jNyesh'laz wal gak che noolka' noa' na' noolka' chwall' chxop llana' gak diiki! La' dii xen daa yen ile'i ben' Israelki.

24 Balgake' guet lo wdila' na' zi bale' wche'gake' pres yell zit'ka'. Na' ben' zit'ka' wlej wshoshjgake' yell Jerusalēni axt kat'ch illin lla yiyoll yido ka llia bia' gongake'.

Kat'ka' yiyed Jesúza'

(Mt. 24:29-35, 42-44; Mr. 13:24-37)

25 'Na' lo wbillā', lo bewaa na'ch lo beljka' gak dii gonan ka yibani ben'. Na' ben'ka' lle' yell-lioni gakshejlall'gake' na' illebgake' kat' gon nisdona' sshag wal daa so' kwe'n.

26 Na' axt ichol-lall' ben' daa chllebgake' kwiayi'lengake' yell-lioni, la' axt yog' diika' lia xan yabana' inibgakan.

27 Na'ch ile'gakile' nad', Ben' Bsel' Chioza' Yell-lioni, zizaa to lo bej kon yel' wak xen na' balaan xen.

28 Na' kat' solo gak diiki, li wtipch lall'le, la' ba zoa gaoshosh yidsla' len'.

29 Na' lekzka' bsees' Jesúza' to jempl chi'e:

—Li wwiakachi yag yixwewa' wa bichlə yag.

30 Kat' chle'ile ba chibia xlaguiinka', chakbe'ile ba zoa yiyoo la'o linna'.

31 Ka'kzə, kat' ile'ile ba chak diiki ba wnia', chiyal' inezile ba zoa gao wli' Chioza' yel' wñabia' che'na'.

32 'Dii li nia' le', aga ba wit ben'ka' zoa naa kat' gak yog' diiki.

33 'Yabana' na' yell-lioni te chgakin, san cho'a xtillaana' aga wde bi gak ka nan.

34 'Li wsak' bi we'le latj sho' diika' wxinjan yichjlall'do'lena'. Bi wlanzle yel' weezo, na' bi sezle wneyi bi chak chele. Li wsak' kwenche aga sha chel-le chon llana' zizaa.

35 La' tokonganzen gak diiki yen ile'i yog'te ben'ka' lle' doxen yell-lioni.

36 Na' le', li se wneyi, li inabi Chioza' toshiizi gaklene' le' kwenche yilale lao yog' diiki lia bia' gak, na' kwenche bi gall illeble sele lawa'na', nad', Ben' Bsel' Chioza' Yell-lioni.

37 Na' Jesúza' bli' bsedile' ben' yog' lla yoodo'na', na' ka chal, chjagaane' lo Yaa Olivoza'.

38 Na' yog' zil yog' ben' chajgake' yoodo'na' ch-jazenaggake' daa chli' chsedile'.

22

Wloogake' x̄nezin witgake' Jesúza'

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Ba zoa gaozə l̄ni Paskwa' kat' chaogake' yetxtil daa bi n̄chix̄ levadúrana'.

² Na' b̄xozka' ch̄n̄abia' len beñ'ka' chli' chsedileya' chiyiljall'gake' naklə gongake' witgake' Jesúza' ka kono gakbe'i, l̄a' bllebgame' shi bi goni beñ' wlall che'ka' legake'.

³ Na'ch x̄an dii x̄iw'ka' daa le Satanás wyoon loo yichjlall'do' Jud Scariota', beena' nak txen beñ'ka' shllin.

⁴ Na' wyaje' lao b̄xozka' ch̄n̄abia' len lao beñ'ka' ngoo lall' na' beñ'ka' chap yoodo'na', na' bi'e dill' nakan gone' Jesúza' lall' na'gake'.

⁵ Na' le bibagakile' na' b̄chebgake' we'gake'ne' mech.

⁶ Na'ch b̄chebe' gone'ne' lall' na'gake'. Na' wzolo chinoe' batan gat' latj kat' kono beñ' lle' gone' Jesúza' lall' na'gake'.

Lle'na' zeelo wdaolengake' Jesúza'

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Na' bllin llana' chsini'agake' che l̄nina', llana' chzolo chaogake' yetxtil daa bi' n̄chix̄ levadúrana' na' chitgame' to xil'do', bana' gaogake' lle' Paskwa'.

⁸ Na'ch wlej Jesúza' Pédrona' len Juanna' na' chi'e legake':

—Li lljasini'a daa gaocho l̄ni Paskwi.

⁹ Na'ch che'gake'ne':

—¿Garan cheenilo' lljasini'anto'n?

10 Na' che' Jesúza' legake':

—Ka sho'le Jerusalénna', na' ile'ile to beñ' byo zino'e to chee nis, na' li lljanoe' axt yoona' gana' yilline'.

11 Na' ye'le xan yoona': “Maestrona' chñabile' li': ¿Garan zoa yoona' wyoone' gana' gaolene' beñ'ka' nakgake'ne' txen lle' Paskwi?”

12 Na' wliile' le' to yoo xen dii llia shkwiana' cha'lə ga ba nonshao'tie'. Nan' wsini'ale daa gaochoshe'na'.

13 Na' wloogake' nez zejgake', na' kon kayen' golle' legake' gok. Na' bsini'agake' daa wdaogake' lle' lni Paskwa'.

14 Na' ka gol' gaogake' xshe'na', Jesúza' wche'lene' postl che'ka' cho'a mesa'.

15 Na'ch chi'e legake':

—Ba goklall'chga' yeej gaolen' le' lni Paskwi naa bin' witgake' nad'.

16 Na' ba nia' le', zeelo naa cheej chaw' dga. Bichga yeej gawa'n axt ki illin llana' wli' Chioza' yel' wñabia' xen che'na', kana'ch yeej gawa'n dii yoblə.

17 Na' bexee kopa' na' bi'e Chioza' yel' choxken, na' chi'e:

—Li gox' dga, li yeejan lat' wej.

18 Na' nia' le', bichga yeej' nis uvani axt ki illin lla wli' Chioza' yel' wñabia' xen che'na'.

19 Na'ch bexee yetxtila' na' bi'e yel' choxken Chioza'. Na' bxoxje'n bi'en legake' kwenche wdaogake'n, na' chi'e:

—Dgan kwerp cha'ni, chzanlallidaan ni chele. Kin gonle kwenche lljadinile nad'.

²⁰ Na' lekzka' bene' ka wde wdaogake' xshe'na', beḡee kopa' sto shii, na'ch chi'e:

—Dga yoll loo kopi zejın xḡhen'na' daa laljə ni ḡhele daa gonan ka gaki dii koba' bḡheb Chioza' gone'.

²¹ 'Na' naa, beena' gone' nad' lo na' beḡ'ka' chakzi'gakile' nad' chi'lene' nad' cho'a mesi.

²² La' ba bllin lla gak ka nak daa lliā bia' gak ḡha', nad', Beḡ' Bseḡ' Chioza' Yell-lioni, per jnyesh'laz gak ḡhe beena' gone' nad' lo na' beḡ' malka'!

²³ Na'ch beḡ'ka' nakgake'ne' txen wzologake' chḡabi ljwellgake' noen' gone'ne' lo na' beḡ'ka'.

Gokgued beḡ'ka' nak Jesúza' txen nogaken' zak'chi

²⁴ Na' lekzka' chakdil-len ljwellgake' nogaken' nak beḡ' zak'chi.

²⁵ Na' che' Jesúza' legake':

—Zoa beḡ' wḡabia' to to nación, na' chongake' byen chzenag beḡ' ḡhegake', na' nagake' ḡhe kwingake' le chaklengake' beḡ'.

²⁶ San le', bi chiyaḡ' gonle ka'. Shi nole nakle beḡ' zakii, chiyaḡ' wḡhek' yichjle ka to bi' xkwid', na' shi nole chḡabia', chiyaḡ' gonle ka nottezə beḡ' wen mandad.

²⁷ ¿Noran nak beḡ' zak'chi?, ¿abeena' chbe' cho'a mesa' chawe'?, ¿anti beena' chon mandadan', lla? Beena' chi' cho'a mesan' nake' beḡ' zak'chi. San nad', la'kzi naktia' xanle, zoa' ladjleni ka to beḡ' wen mandad ḡhele.

²⁸ 'Le' ba wzoalenle nad' lao yog'te daa ba gok ḡha'.

²⁹ Na' daan, gon' le' yeḡ' wḡabia'na' ka daa beḡ' Xa'na' nad'.

³⁰ Na' yeej gaolenle nad' gana' inabi'a. Na' kwe'le gana' inabia'le yizi'le kwent che shllin kwen ben'ka' nak xiiñ dia che dii Israela'.

Jesúza' wne' bi wcheb Pédróna' shi nombi'ene'
(Mt. 26:31-35; Mr. 14:27-31; Jn. 13:36-38)

³¹ Na' lezkka' golle' Simón Pédróna':

—Simón, Simón, Satanáza', daa chñabia' dii xiw'ka', ba wñaban le' gagle lo na'yin kwenche gondinj gonganin le'.

³² Na' nad' ba wñabid' Chioza' gaklene' li', Simón, kwenche gonlilall'cho nad'. Na' kat' ba biyajilo' cheyi daa gono', na' gakleno' ben'ki nako' txen kwenche soachehgake' gonlilall'gake' nad'.

³³ Na' che' Simónna':

—Xan', ba nchoglallaa laa lillyana' sa'len' li' wa axt guetlen' li' txen.

³⁴ Na' che' Jesúza':

—Pedro, nia' li', naanlle' shon shii bi wchebo' shi nombi'o nad' ka zi' kwell shikwteza'.

Ba zoa gaoz wtil Jesúza' daa gak che'

³⁵ Na'ch che' Jesúza' legake':

—¿Azyalljile bi byalljile kana' bselaa le' na' bibi beñ'le, ni ga koo xalaanle, ni mech na' ni xel-le?

Na' che'gake':

—Bibi byalljinto'.

³⁶ Na'ch golle':

—Per naach nia' le', shi de ga chgoo xalaanle, li goxaan, na' shi de xmechle, li wa'n; na' shi nole bi de spad chele, li lljayet' xalena' na' li si' tlisha'n.

³⁷ Nia' le', chonan byen gak cha' kon ka na Cho'a Xtill' Chioza' gana' na: “Gongakile'ne' ka chongakile' to ben' wen dii mal.”

38 Na' che'gake':

—Xan', ni napnto' chop spad.

Na' chi'e:

—Lliz li soachoklə.

Be'lwill Jesúza' Chioza' gana' le Getsemaní

(Mt. 26:36-46; Mr. 14:32-42)

39 Na'ch biza' Jesúza', na' kon ka yooloe' chone' biyaje' lo Yaa Olívoza', na' zjano beŋ'ka' nakgake'ne' txen.

40 Na' ka bllingake' latja', na' chi'e legake':

—Li we'lwill Chioza' kwenche bi we'zle latj gon beli chenna' le' gan.

41 Na' bkwase' kwite'ka', ka to ga zeelo chllin to yaj dii chzal'cho, na'ch bchek' xibe'na' be'lwille' Chioza'.

42 Na' golle':

—Xa, shi li' cheenilo', bislagach nad' lawi dga ba zoa idił illag'; per aga gak ka cheenid', san gak ka cheenilo'.

43 Na'ch bli'lao to anjl beŋ' za' yabana' le', na' biyo'ene' fuerz.

44 Na' daa le chakyesh'chgaile', zizikli be'lwillche' Chioza' axt biyaklolje'. Na' nis yes che'na' daa chxop lo yona' nakan ka to bllon wej chen.

45 Biyoll be'lwille' Chioza', na' bizollee biyaje' gana' lle' beŋ'ka' nakgake'ne' txen, na' ka billine' kwite'ka' ba chesgake' daa chakyesh'gakile'.

46 Na' chi'e legake':

—¿Berache cheszle? Li chas na' li we'lwill Chioza' kwenche bi we'zle latj gon beli chenna' le' gan.

Bex'gake' Jesúza'

(Mt. 26:47-56; Mr. 14:43-50; Jn. 18:2-11)

47 Ni choe'te Jesúza' dill', ka bllin ben' zan, na' beena' le Jud, beena' nak txen ben'ka' shllin, nchi'e legake'. Na' ka blline' jabiguee kwit Jesúza' na' bnopo' xagueena'.

48 Na'ch che' Jesúza'ne':

—Jud, ¿akon dga bnopo' nad' chono' nad', Ben' Bsel' Chioza' Yell-lioni, lo na' ben'ki?

49 Na' ben'ka' lle'len Jesúza', ka ble'gakile' ka ba chak che', na'ch gollgake'ne':

—Xan', ¿awñiyainto' spadki?

50 Na' toe' lii wdintie'n to mos che b̄xoz choo b̄xoz xenna' b̄chogtie' nague' de sh̄lina'.

51 Na' che' Jesúza':

—Bich bi gonile ben'ka'.

Na'ch bida' Jesúza' nag beena'.

52 Na' daa bllin b̄xozka' chñabia' len ben'ka' chap yoodo'na', na' ben' golka' chñabia', kwenche gox'gake'ne', chi'e legake':

—¿Berache za'zle nox'le yag na' spad kwenche zidnizle nad' ka to no ben' wban?

53 Yog' lla wzoa' ladjlena' yoodo'na' na' bi bex'le nad'. Per ñaach bllin lla gonle ka cheenile na' ñaayen' chñabia' dii mala' daa chñabia' gana' shgasj shchol̄.

Bi b̄cheb Pédrona' shi nombi'e Jesúza'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Na'ch bn̄izgake' Jesúza' na' b̄che'gake'ne' lill b̄xoz choo b̄xoz xenna', na' zit' zit'lə zjano Pédrona'ne'.

55 Na' bxengake' yi'na' lesh' chyoo che b̄xoz choo b̄xoz xenna' na' wche'gake' cho'a yi'na', na' wlen Pédrona' legake'.

56 Na' to noolə wen mandad, ka ble'ile' chi' Pédrona' cho'a yi'na', lii wzetie' chwie'ne', na' chi'e:

—Lekzka' len beenin nake' Jesúza' txen.

57 Na' Pédrona' aga bchebe', na' chi'ene':

—Noolə, aga nombi'a beena'.

58 Na' gokzə xtit bizle'i beŋ' yoblə Pédrona' na' chizi'ene':

—Lekzka' lenon' nako' beŋ'ka' txen.

Na' Pédrona' chi'ene':

—Bi len' nak' beŋ'ka' txen.

59 Na' wizak ka do zi' tgor na' wize' sto beŋ' yoblə:

—Dii likzan len beeni nake' txen Jesúza' la' lekzka' beŋ' Galilean.

60 Na'ch che' Pédrona'ne':

—iNi bi nejid' bi dillaan choo!

Na' ni che'telə Pédrona' ka', ka wchell to shikwtez.

61 Na'ch biyečhj Xancho Jesúza' bwie' Pédrona', na' Pédrona' jadinile' daa golle'ne', kana' chi'e: “Naanlle' shon shii bi wchebo' shi nombi'o nad' ka zi' kwell shikwteza'.”

62 Na' bichej Pédrona' gana' lle' beŋ'ka' na' wchellyeshee.

Btitjgakile' Jesúza'

(Mt. 26:67-68; Mr. 14:65)

63 Na'ch beŋ'ka' chapgake' Jesúza' btitjgakile'ne' na' wdap' wlall'gake'ne'.

64 Na' bsejgake' jalawe'na', na'ch wlall'gake'ne', che'gake'ne':

—iWnashki non wlall' li'!

65 Na' biya dii gollgake'ne' kwenche gakile' zi'.

Wde Jesúza' lao beŋ'ka' chnabia'gake' beŋ' Israelka'
(Mt. 26:59-66; Mr. 14:55-64; Jn. 18:19-24)

66 Na' ka wyeeni', bidop ben'ka' chñabia' ben' Israelka', len bñozka' chñabia' na' ben'ka' chli' chsedi leya'. Na' bdegake' Jesúza' lawe'ka'. Na'ch wñabgakile'ne', che'gake':

67 —Wnashki neto' shi li'kzan Crístona', beena' chbeznto'.

Na' che' Jesúza':

—Shi inia' le': “Awe, nadaan”, aga wyajle'le cha'.

68 Na' shi inabid' le' bi dii inabid' le', aga williilen na' ni bi yisanle nad', shi ñaa.

69 Na' ñaate, nad', Ben' Bsel' Chioza' Yell-lioni, kwi'a kwit de shli che Chioza', beena' nap yel' wak xenna'.

70 Na'ch yog'ze' wñabgakile'ne':

—¿Ana' lin' nako' Xiin Chioza'?

Na'ch che' Jesúza':

—Awe, shlikzan ba wnale.

71 Na'ch che' ljwellgake':

—Kochno chyalljicho gawe' xya che beeni. Kwintekzcho ba benicho ka ba wne'.

23

Wde Jesúza' lao Pilátona'

(Mt. 27:1-2, 11-14; Mr. 15:1-5; Jn. 18:28-38)

1 Na'ch yog'lol ben'ka' bizolla'gake' na' jwa'gake' Jesúza' lao Pilátona'.

2 Na'ch wzologake' chaogake' xya che Jesúza', che'gake':

—Ba bidolinto' beeni chta chnie' ben' wllall chento'ka'. Chi'e bi chiyal' chixjcho daa chñab Césara', beena' chñabia', na' lezkza' naze' nake' Crístona', na' daa ne' ka' zejín nake' to ben' wñabia'.

3 Na'ch wñabi Pilátona' Jesúza', chi'ene':

—¿Alin' nako' ben' wñabia' che ben' Israelki?

Na'ch che' Jesúza'ne':

—Kan' nakan.

⁴ Na'ch che' Pilátona' b̄xozka' ch̄n̄abia' na' yog' ben'ka' lle' na':

—Ni to dii mal bi chillelid' chon beeni.

⁵ Na' zizikchli che'gake':

—Diika' chli' chsedile' chta ch̄nen yog'lol' ben' lle' doxen lallnto'ni. Wzoloze' Galileana', na' axt Judeani ba bide'.

Bde Pilátona' Jesúza' lao Heródeza'

⁶ Ka gollgake' Pilátona' ka', na'ch w̄n̄abile' legake' shi nak Jesúza' ben' Galilea.

⁷ Na' ka w̄nezile' nake' ben' Galilea, na'ch b̄die'ne' lao Heródeza', beena' n̄lane' ch̄n̄abi'e Galileana', la' kana'yen' zoa Heródeza' Jerusalénna'.

⁸ Na' le bibayi Heródeza' ka ble'ile' Jesúza', la' ba wlla cheenile' ile'ile'ne' daa ba benile' choe' ben' xtilleena'. Na' goki Heródeza' ile'ile' gone' to yel' wak.

⁹ Na' biya dii w̄n̄abile' Jesúza', na' ni to daa w̄n̄abile'ne' bi billi'e.

¹⁰ Na' lekzka' na' lle' b̄xozka' ch̄n̄abia' len ben'ka' chli' chsedi leya', na' zizikli chaogake' xya che Jesúza'.

¹¹ Na'ch Heródeza' len soldad che'ka' biya dii bengakile'ne', na' b̄tit̄gakile'ne' bwakwgake'ne' to lech' ka daa chakw to ben' w̄n̄abia'. Na'tech bizsel' Heródeza'ne' lao Pilátona'.

¹² Na' lo llana' bizoalen Pilátona' Heródeza' wen, la' kana'te chakzbani ljwelle'.

Bchoglogake' guet Jesúza'

(Mt. 27:15-26; Mr. 15:6-15; Jn. 18:39-19:16)

13 Na'ch bití'a Pilátóna' b̄xozka' ch̄n̄abia', na' beñ'ka' ch̄n̄abia'gake' beñ' Israelka' na'ch beñ' yell,
 14 na' golle' legake':

—Le' bidwa'le beeni lawii, nale chta ch̄nie' beñ', na' nad' ba w̄n̄abidee laoleni, na' bi chillelid' ni to daa nale che' shi li ka chone'n.

15 Na' ni Heródeza' bi billelile' shi bi dol' nap beeni, na' ba bizseleene' laochoni. Na' ba ble'teile aga bi bene' in̄acho w̄choglozcho guete'.

16 Na' naa gon' mandad wit ch̄ingake'ne' na'tech yisane.

17 Na' ka chakz yog' yiz, chiya! yisane' to beena' nej lillyana' kat' cha! In̄i Paskwa'.

18 Na' yog' beñ'ka' ndop nllag na', wzologake' chosyaagake', che'gake':

—¡Guettega beeni! ¡Na' bisan Barrabáza'!

19 Nyix̄jgake' Barrabáza' lillyana' daa b̄xie' wd̄ila' yell Jerusalénna', na' bettie' to beñ'.

20 Na' daa cheeni Pilátóna' yisane' Jesúza', na' stokzə w̄n̄abile' beñ'ka' shi wisane'ne'.

21 Na' beñ'ka' zizikchli chosyaagake', che'gake':

—¡Bdee lee yag cruza'! ¡Bdee lee yag cruza'!

22 Na' de wyon̄ shiyi che' Pilátóna' legake':

—¡Bera dii malan' nezile ba ben beeni, lla? Bi chillelid' ni to dii mal dii ba bene' kwenche guete'. Gonch' mandad wit ch̄ingake'ne' na'tech yisane.

23 Na' beñ'ka' wzeyidgake' chosyaagake' ch̄n̄abgakile'ne' wdeene' lee yag cruza'. Na' daa wzeyidgake' chosyaagake', bengake' gan wzoa xtilleeka'.

24 Na' b̄choglall' Pilátóna' gone' ka cheeni beñ'ka'.

25 Na' bisane' beena' w̄n̄abgake', beena' de lillyana' daa b̄xie' wd̄ila' na' daa bettie' to beñ'. Na'

bene' Jesúza' lo na'gake' kwenche gongakile'ne' ka chaklall'gake'.

*Bda'gake' Jesúza' lee yag cruza'
(Mt. 27:32-44; Mr. 15:22-32; Jn. 19:17-27)*

²⁶ Na' ka nche'gake' Jesúza' lljada'gake'ne' lee yag cruza', billaggake' to ben' Cirene lie' Simón zizee lyixaa. Na' be'gake'ne' bwa'gake'ne' yag cruz che Jesúza' na'ch janoe'ne'.

²⁷ Na' ben' zan zjanogake'ne', na' zan noolka' chbellgake' na' chosyaagake' ni che Jesúza'.

²⁸ Na' biyechj Jesúza' bwie' legake' na' golle':

—Le' nool Jerusalén, bi kwelzle cha'; li kwel che kwinkle na' che xiñleka'.

²⁹ La' wllin lla kat' ina ben': “Chakomba nool willka', ben'ka' bi wxan na' bi bwall bxopgake'.”

³⁰ Na'ch ben'ka' zoa llana' gak ka', solo inagake': “Shel' iyinjtega yaa yaoki idakwtegan neto'.”

³¹ Shi yag yaa yag banna' chongakile'n kon daa nazan chegake', ¿alechla ki gongakile' yag billa'?

³² Na' lekzka' nche'gake' chop ben' wen dii mal kwenche witgake' legake' txen len Jesúza'.

³³ Na' ka bllingake' latja' gana' le Llit Yichj Ben' Wet, bda'gake' Jesúza' lee yag cruza'. Na' lekzka' bda'gake' chopte ben' wen dii malka' shlaa wej kwite'na'.

³⁴ Na' ka chda'gake' Jesúza' lee yag cruza', chi'e:

—Xa, wxixen chegake', la' aga ne'zgakile' bin chongake'.

Na' soldadka' bengake' to wyitj kwenche wne'zgakile' nogake' yidol' xe'na'.

³⁵ Na' lle' ben' zan chwiagake', na' axt ben'ka' chñabia'gake' ben' Israelka' btitjgake'ne', nagake':

—Gok bisle' ben' yoblə, na' naa yislashki kwine' shi leile' len' Crístona', beena' ba wlej Chioza'.

³⁶ Na' lekzka' soldadka' btitjgakilene', na' jabig'gake' kwit yag cruza' gana' nda'gake'ne' na' bshabgakile'ne' to vino dii nak zichj zla'.

³⁷ Na' che'gake'ne':

—Shi lin' nako' ben' wñabia' che ben' Israelki, bislashki kwino'.

³⁸ Na' yichj yag cruz che'na' bda'gake' to dii cho'en dill' biche nda'gake'ne' lee yag cruza', nan: “Beenin ben' wñabia' che ben' Israelka'.” Bzej-gake'n dill' griego, dill' latín na' dill' hebreo.

³⁹ Na' to ben' wen dii mala', beena' da' kwit Jesúza', biya dii golle'ne', chi'ene':

—Shi lin' Crístona', Beena' Bsel' Chioza' inabia', bislashki kwino' na' lekzka' bisla neto'.

⁴⁰ Na' beena' sto bsheshlene'ne', chi'e:

—¿Abikzə chall chlleblatoo Chioza'?, len kon ka chak chen' ba chak cho'.

⁴¹ Cho', ka chiyal'kz gak chechon' kwenche chixjcho che dii mala' daa bencho; san beeni aga bi dii mal bene'.

⁴² Na'ch golle' Jesúza':

—Jesús, lljadingachilo' nad' kat'ka' solo inabi'o.

⁴³ Na'ch che' Jesúza'ne':

—Dii li nia' li', naanlla soaleno' nad' latja' gana' nak mbalaz.

Wit Jesúza'

(Mt. 27:45-56; Mr. 15:33-41; Jn. 19:28-30)

⁴⁴ Na' do ka gobill bichol doxen yell-liona', bllinte do ka chida shon,

⁴⁵ daa bich bzeeni' wbilla'. Na' lechaa ze loo yoodo'na' bllon' gokan chop laalə.

46 Na'ch besyaa Jesúza' zilljə, chi'e:
 —Xa, chiyon' bishbe cha'ni lall' noo.
 Na' biyoll golle' ka' na'ch wite'.

47 Na' ka ble'i beena' chñabia' soldadka' diika' gok, be'lawee Chioza', chi'e:

—Dii li beeni nake' dowalj ben' wen.

48 Na' yog' ben'ka' lle' na', ka ble'gakile' ka gok, ziyajgake' chball'gake' cho'alcho'eka'.

49 Na' yog' ben'ka' nombia'gake' Jesúza', do noolka' za'lengake'ne' axt Galileana', wzegake' zit'lə chwiagake' ka gok.

Bkwash'gake' Jesúza'

(Mt. 27:57-61; Mr. 15:42-47; Jn. 19:38-42)

50 Wzoa to ben' wlie' José, ben' yell Arimatea, daa mbani Judéana'. Na' Joséna' nake' txen ben'ka' chñabia' ben' Israelka'. Nake' to ben' wen na' to ben' chon ka cheeni Chioza',

51 na' zoe' chbeze' wsel' Chioza' beena' inabia'. Na' Joséna' aga wyoolallee ka ben ben'ka' chñabia'lene' daa betgake' Jesúza', na' bi benlene' legake' txen.

52 Na'ch wyaje' lao Pilátona' na' wnabe' lsens yiletje' kwerp che Jesúza'.

53 Na' biletje'ne' lee yag cruza', na'ch bitobe'ne' to lech' xen na' jlo'ene' to loo blej daa benshawee, ga bin' wakash'gake' ni tlish' ben' wet.

54 Na' llana' gok diiki nakan lla chsini'a ben' Israelka' chegake' kwenche bibi llin gongake' lla sabda', llana' chombaangake', na' zi lat'zə chyallj solo llana' chombaangake'.

55 Na' noolka' za'lengake' Jesúza' axt Galileana', wyajgake' jawiagake' bleja' na' jale'gakile' nak wdixjgake' kwerp che'na'.

⁵⁶ Na'ch biza'gake', na' ka billingake' gana' zoagake', benshao'gake' daa chla' zix. Na' bizi'lall'gake' lla sabda' kon ka na leya'.

24

Biban Jesúza' ladj beṇ' wetka'
(Mt. 28:1-10; Mr. 16:1-8; Jn. 20:1-10)

¹ Na' lla necha' chizolo xmanna', wizaj noolka' ni baḷ cho'a bana', nox'gake' diika' chla' zix daa benshao'gake', na' wyaj zi baḷ noolə yoblə kon legake'.

² Na' ble'gakile' aga chi'ch yaja' cho'a bana'. ³ Na' wyoogake' loo bleja', na' ble'gakile' aga bich bi kwerp che Xancho Jesúza' de na'.

⁴ Na' shlak chakgakile' bera zejin dga, kat'kzali ble'gakile' chop beṇ' byo, nakwgake' lech' dii chey cheeni', zegake' kwite'ka'.

⁵ Na' noolka' blebchgagake' na' bchek' yichje'ka' axt lo yona'. Na'ch beṇ'ka' zena' che'gake':

—¿Berache chiyiljzle beena' mban ladj beṇ' wetki?

⁶ Kochno de ni. Ba bibane' ladj beṇ' wetki. Li lljadini daa wne' le' kana' zوالene' le' Galileana'.

⁷ Wne' chonan byen Beena' Bsel' Chioza' Yellioni gake' lo na' beṇ' malka', na' witgake'ne' lee yag cruza', na' ka yiyon lla yibane' ladj beṇ' wetka'.

⁸ Na'ch jadini noolka' daa goll Jesúza' legake'.

⁹ Na' biza'gake' biyajgake' gana' lle' postlka' shnej len yog' beṇ'ka' sto gokgake'ne' txen, na' be'gake' dill' yog' daa gok chegake'.

10 Na' noolkin jayellgake' postlka' daa gok chegake': María ben' yell Magdálana', Juánana', María x̄na' Jacóbona', na' len zi ba_l nool yobl̄a.

11 Na' postlka' ni lat' bi wyajle'gake' daa goll noolka' legake' daa gokgakile' bizan chon chnagake'.

12 Na' Pédrona' wzee zejdoe' cho'a bana', na' ka blline', bwie' loo bleja' na' ble'ile' lech'ka' chi'gakan ka'l̄a. Na'ch bizee zjade' gana' zoe' chibanile' ka nak daa ba gok.

Bli'lao Jesúza' chop ben' tnez Emaúza'

(Mr. 16:12-13)

13 Na' lo llana' gok ka', chop ben'ka' nak Jesúza' txen wyajgake' to yell dii le Emaús, na' n̄laa ljwellin ka do shnej kilometro kon Jerusalénna'.

14 Na' lo zej ngoogake' nez choe'gake' dill' cheyi diika' ba gok.

15 Na' shlak choe'gake' dill' cheyi diika' gok, na' jabig' kwín Jesúza' kwite'ka' na' zejlene' legake' txen.

16 Na' la'kzi chwiagake'ne', aga gokbe'gakile' no beena'.

17 Na'ch w̄nabi Jesúza' legake':

—¿Bera dillaan choe'le za'le ni? ¿Berache chakyesh'zile?

18 Na' toe', beena' le Cleofas, chi'ene':

—Yog'zə ben' nezgakile' daa ba gok Jerusalénna' llaki ba wde. ¿Astozo' li' bi nezilo' daa ba gok?

19 Na'ch chi'e legake':

—¿Beran gok?

Na'ch che'gake':

—Diika' gok che Jesús, ben' Nazareta'. Goke' to ben' wdixjee daa che' Chioza'ne', na' bene' yel'

wak na' bi'e dill' zakii dii nak shli lao Chioza' na' lao beṅ'.

²⁰ Na' b̄xozka' chn̄abia' na' beṅ'ka' chn̄abia'gake' cho' beṅ' Israel bengake'ne' lo na' joschiska' kwenche b̄choglogake' che' guete', na' bda'gake'ne' lee yag cruza'.

²¹ Neto' nonnto' lez nan len' yibeje' cho' beṅ' Israel lo na' beṅ' zit'ka'. Na' ba gok shon̄ lla gok diiki.

²² Na' bal̄ noolka' nak neto' txen wyajgake' cho'a bana' daa baabali, na' le bibaninto' ka wngake'

²³ bich ble'gakile' kwerp che'na' gana' bkwash'gake'ne'. Na'ch bila'gake' nagake' ble'gakile' chop anjl, beṅ' goll legake' mbankzə Jesúza'.

²⁴ Na'ch wyaj bal̄ beṅ' byoka' nonlennto' txen cho'a bleja', na' nakan kon ka wna noolka', per aga no Jesúza' ble'gakile'.

²⁵ Na'ch che' Jesúza' legake':

—¡Le' beṅ' bi chajni! ¡Bi llabia' bat shajle'le daa bzej dii beṅ'ka' wdixjee daa goll Chioza' legake'!

²⁶ ¿Abi nezile lliakzə bia' biya daa yen ile'i beena' nak Crístona' ka zi' yiyo'e gana' sho'e balaan̄ xenna'?

²⁷ Na'ch wzoloe' chzajniile' legake' Cho'a Xtill' Chioza' gana' cho'en dill' che kwine', wzoloe' zigaaete kon daa bzej dii Moiséza', na'tech diika' bzej yog' beṅ'ka' wdixjee daa goll Chioza' legake'.

²⁸ Na' ka bllingake' yella' gana' zejgake', bentezə Jesúza' ka beṅ' shaj gan yoblə.

²⁹ Na' beṅ'ka' bengake' byen yigaanlene' legake', che'gake'ne':

—Bigaanlen neto', la' ba wlle' naa, na' ba chal̄.

Na'ch wyoo Jesúza' bigaanlene' legake'.

³⁰ Na' ka ba chi'gake' cho'a mesa', bexee to yetxtil na' bi'e yel' choxken Chioza', na'tech bxoxje'n na' bi'en legake'.

³¹ Na'ch biyombia'yen'gake' nan len' Jesúza', na' to binitloze'.

³² Na'ch che' ljwelle':

—jBera daan, axt mbalaz inleeb chibayi lall'do'chona' kana' za'cho tneza' choe'lene' cho' dill' chzajniile' cho' Cho'a Xtil' Chioza'!

³³ Na'ch lii biza'tegake' ziyajgake' Jerusalénna'. Na' ka billingake', ndop nllag postlka' shnej na' nochlə ben'ka' nakgake'ne' txen,

³⁴ na' gollgake' legake':

—Dii likzan ba biban Xanchona' ladj ben' wetka'. Ba bli'lawe' Simónni.

³⁵ Na'ch ben'ka' chop gollgake' legake' ka gok chegake' tneza', na' ka biyombia'gake' Jesúza' ka bxoxje' yetxtila' bi'en legake'.

Jali'lao Jesúza' ben'ka' nakgake'ne' txen

(Mt. 28:16-20; Mr. 16:14-18; Jn. 20:19-23)

³⁶ Na' shlak ni choe'gake' dillaa, tokonganzi jaze Jesúza' ladje'ka' na' bwape' legake' chiox, chi'e legake':

—Soashgale mbalaz.

³⁷ Na' le bllebgake' daa chakgakile' yel bxēzan chwiagake'.

³⁸ Na' che' Jesúza' legake':

—¿Berache chllebzle? ¿Biçe chak choplall'zle?

³⁹ Li wwia ni'a na'ki kwenche inezile nad'kzan. Li gox' nad' kwenche inezile aga nak' to yel bēn, la' to yel bēn bibi bel' bibi llit yoon ka nak' nad'.

40 Na' ka golle' legake' ka', bliile' legake' ni'a neena'.

41 Na' yel' chiba chizaki che'ka' na' yel' chibanina', ni bi chakbe'gakile' shi lekzen'. Na'ch chi'e legake':

—¿Abi de lat' dii gaocho?

42 Na'ch be'gake'ne' lat' bel ba bwey'gake' lo yi'na'.

43 Na' bexeb wdawe'b chwiategake'.

44 Na' chi'e:

—Ka nak daa ba gok cha', lënnan' wnia' le' kana' ni zoalen' le', kana' wnia' lia' bia' yillinin gak cha' yog' diika' bzej dii Moiséza', na' diika' bzej dii ben'ka' wdi'jee daa goll Chioza' legake' na' diika' da' lee sálmoka'.

45 Na'ch ben Jesúza' ka wyajni'gakile' diika' na Cho'a Xtill' Chioza',

46 chi'e legake':

—Cho'a Xtill' Chioza' nan: chonan byen Crístona', biya dii yen ile'ile' na' witgake'ne' na' yiyon lla yibane' ladj ben' wetka'.

47 Na' lekzka' nan: ides cho'a xtilleena' daa nan shi yiyaj yileni ben' dii malka' chongake' na' yiyakxen chegake'. Na' solozan Jerusalénni na' illiljan doxente.

48 Na' le' chiyal' ye'le ben' yog' diiki ba ble'ile gok cha'.

49 Na' nad' wselaa beena' bcheb Xa' Chioza' gone' gaklene' le', na' li soatezə Jerusalénni ax̄t kat'ch Xa'na' gone' le' yel' waka' daa za' yabana'.

Biyep Jesúza' yabana'
(Mr. 16:19-20)

50 Na'ch b̄che' Jesúza' l̄egake' wyajgake' yell Betániana'. Na' bl̄is neena' benl̄eeye' l̄egake'.

51 Na' ni chonl̄eeytie' l̄egake', ka bikwase' kwite'ka' na' biyep̄e' yabana'.

52 Na' ben'ka' nakgake'ne' txen, biyoll be'la'ogake'ne', biza'gake' ziyajgake' Jerusalénna' chiba chizakgakile'.

53 Na' wzoatezi wzoagake' be'la'ogake' Chioza' yoodo'na'.

**Dill' wen dill' Kob Che Jesucristona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
f98bf0c8-4467-559d-82ab-96644a44d38f